

# Matayo ma Peba

## Matayomna Iriki God ma B'ogil Yirkokar Bage Yit

### Isipkita Yitkak

Onggityam God ma b'ogil yirkokar bage yit peba irika riga re teks wulkip imdayam riga Matayote. I ton re Yesumna twelp (12) itmikitijog riga wingirind yipa riga na dide ti kwa yipa nyi re Lebite. Si onggit peba irikam re win awir e b'obogil yisipkis, minda ama rika onggit A.D. siksti dide sebenti (60-70) kemag gangga nat. I ton itemb peba yirikonj re Ju riga wa mana.

I onggit pebat pitapita yomnenny re b'ogil yirkokar bage yit e it re da Yesu re tirir omni e yirkokar okawam riga. I Yesum pilnat God Tina tirir yit ririrkip amninonj tina riga wa pilwa, rinsim re kesam peband iriki wekeny. I itemb b'ogil yirkokar bage yit re ma Ju riga wa nena mana, ya wingir nat re Yesu ukendonj dide wimena yikenonj. Aji itemb b'ogil yirkokar bage yit re toda kwa kupka gowukoi riga wa mana.

Matayo itemb peba yikalkonj re b'obogil yir iyena kima na. I ton yotom re Yesumna ukenda gatab kae. I ket yuseneny Yesumna baptiso dide b'atonkena gatab. I ket kwa akasiny Yesumna wiko gatab, opi re God ma yitkak pitapita omnena, ouyaena, i dide kopa ke riga isakenda rina re Ton amnikeninonj Galili eriyand. I kwa onggit kak ke pitapita yomnenny Yesumna menon Galili ke de ama re Yerusalem wa. Si kwa pitapita amneniny re Yesumna kikitumam wikind omniki mile gatab im. I yitkak ket yundwas re Yesumna uj dide utnyita gatab kae. I daka ket pebat yisipkeny da Yesu re ukoi jog ouyaena riga e yama re juwai yibnau God ma gog yit isipkenam dide God ma pumb tungg gatab ouyaenam.

### Yesumna B'usmureni Nya

*(Luk 3:23-38)*

**1** <sup>1</sup>Si itemb ji Yesu Kerisomna b'usmureni nya gatab iriki yit, yete re Dawidim pilke b'usmureni b'iga dide Abraamim pilke b'usmureni b'iga.

- 2 Si Abraam Isakind yorakonj,  
 i daka Isak Yakobind yorakonj,  
 i daka Jakob Yudand dide ti nanywar dide ti yingganwar arakinonj,  
 3 i daka Yuda Tamarim pilind Peres ake Jera arakonj,  
 i daka Peres Esromind yorakonj,  
 i daka Esrom Ramind yorakonj,  
 4 i daka Ram Aminadabind yorakonj,  
 i daka Aminadab Naasonind yorakonj,  
 i daka Naason Salmonind yorakonj,  
 5 i daka Salmon Yeriko kongga Raabim pilind Boasind yorakonj,  
 i daka Boas Rutim pilind Obedind yorakonj,  
 i daka Obed Yesaind yorakonj,  
 6 i daka Yesai king Dawidind yorakonj.  
 I daka Dawid Uriyamna konggam pilind Solomonind yorakonj,  
 7 i daka Solomon Roboamind yorakonj,  
 i daka Roboam Abiyand yorakonj,  
 i daka Abiya Asand yorakonj,  
 8 i daka Asa Yosapatind yorakonj,  
 i daka Yosapat Yoramind yorakonj,  
 i daka Yoram Ujiyand yorakonj,  
 9 i daka Ujiya Yotamind yorakonj,  
 i daka Yotam Aajind yorakonj,  
 i daka Aaj Ejekiyand yorakonj,  
 10 i daka Ejekiya Manasend yorakonj,  
 i daka Manase Amosind yorakonj,  
 i daka Amos Yosiyand yorakonj,  
 11 i daka Yosiya Yekoniya dide ti nanywar dide ti yingganwar arakinonj,

onggit winind re Babilon kantrit Yuda kantri negir yomnonj dide Ju riga Babilon kantri wa werenam omnam amninonj.

- 12 I onggit kak ke re ket Ju riga Babilon kantri wa werento,  
 Yekoniya Salatiyelind yorakonj,  
 i daka Salatiyel Jerubabelind yorakonj,  
 13 i daka Jerubabel Abiyudind yorakonj,  
 i daka Abiyud Eliyakimind yorakonj,  
 i daka Eliyakim Ajorind yorakonj,  
 14 i daka Ajor Sadokind yorakonj,  
 i daka Sadok Akimind yorakonj,  
 i daka Akim Eliyudind yorakonj,  
 15 i daka Eliyud Eleajarind yorakonj,  
 i daka Eleajar Matanind yorakonj,  
 i daka Matan Yakobind yorakonj,

16 i daka Yakob Mariyam leo Yosepind yorakonj.

I Yosepim kongga Mariya Yesund yukendonj yena re yogenayo da Keriso.

17Si ket Abraamim pilke b'usmureni b'iga de Dawidim pilwa re komkesa potin (14) b'usmureni b'iga na. I daka Dawidim pilke b'usmureni b'iga de ngirpu Ju riga Babilon kantri wa werento re kwa potin (14) b'usmureni b'iga na. I kwa daka Babilon kantri wereni ke b'usmureni b'iga de Kerisom pilwa re kwa potin (14) b'usmureni b'iga na.

### Yesumna Ukendi gatab Yit

(Luk 2:1-7)

18I Yesu Kerisomna ukendi yit re ija emb ji. Si Ti mog Mariya re kea yit tirir omni na wibnawonj Yosep kima molkongga awowim. I yimta kena ton molkongga awonda, aji Mariya kea naska nata ngor kima awonj rina re Yinayina Wingawingat b'iga yoramitonj ti pilind. 19Aji ti leo Yosep re negir kesa dimdimjog riga na. Si ton kea wumir yokatonj ti konggamna ngor kima gatab yit, aji ton ma singi na ti konggand riga wa pilwa pita tominy negir ma b'isagika okatam tina ngor kima ai mopip. Si ton ket ti nony mana yisamkonj wigawiga tin bondik omnam. 20I re Yosep onggityam yit nonyik b'amenand yibnonj, yipa Yonggyamimna aneru pita awonj ti wimand, i ket tin yomnonj da, "Yosep, Dawidimna b'iga! Man goro moga taet Mariyand okatam mor konggam. Mop nokip B'iga rinte re yibim ti kom borand re Yinayina Wingawingamna oramiti e. 21Si ton ita leo b'iga ukenj dem, i man b'ogla onggit B'igand nyi oeket dem da 'Yesu'. Mop nokip Ton opima Tina riga tetringasiny dem towaina negir mile wa pilke, i ket yirkokar takainy dem."

22Si komkesa onggityam mile aukito re nok mana da idenat Yonggyamimna yitkak ririrkip tainy rina re yipa bageyamimna tugim ke yopulitonj da,

23 "Yir de, yipa pil esopai kesa ngimngai ita ngor kima tainy dem dide ket ton leo B'iga ukenj dem.

I rigap ket tin nyi ogenai dem da 'Emmanuwel'."

Si Emmanuwel engenda yitkak re noke da, "God ita men kima".

24I re ket Yosep yutunga ke utnyitonj, si ton ket ija na mile amnikinonj rija na re Yonggyamimna anerut tin yingawonj omnikam, ngirpu ton ket Mariyand ti konggam wokatonj. 25I Yosep maka Mariyand pil wesopayonj, ngirpu ton ket leo B'iga yukendonj. I ton ket onggit leo B'igand nyi yoekonj da "Yesu".

### Hemet Gatab ke B'ogil Multekip Rigap Yesund Oraka Yiyo

**2** I re Yesu ukendonj Betleem taunind de Yuda eriyand, onggit winind Erod Yuda king pipmet nat yibnonj. I ninda b'ogil multekip

riga ilemet ke opekto de Yerusalem taun wa. <sup>2</sup>I ton ket riga erkena eyento da, “Rokate Ju riga waina king yibim yet re ukenjim. Nokip sin kea Tina iki yir yongonda ilitand sowa tunggind deta ilemet gatab wa i sin ket tuyin re tin kumsos emka mim.” <sup>3</sup>I re king Erod onggit Ju riga waina king ukenda gatab yit utkundonj, ton ma sobijog na nony bebig awonj. I toda kwa kea komkesa Yerusalem riga gar moga aukito onggit B'iga gatabim. <sup>4</sup>I ket king Erod komkesa yina mopyam si riga dide Ju riga waina gog ouyaena riga ara emokinonj b'eomam. I ton ket ten arkisinonj da, “Rokate dikind Keriso tukenj.” <sup>5</sup>I ton ket mira yomno da, “Ama de Betleem taun wa Yuda eriyand, mop nokip yipa bageyam ija naemb ji yirikonj da,

<sup>6</sup> ‘Si man Betleem taun, Yuda gowind,  
man ma sobijogjog et Yuda kantri wip omnena riga wa wingirind.  
Mop nokip mor pilke yipa wip omnena riga ita pita tainy.  
Si Tontemb Koina riga, Israel riga waina yir ipka riga tainy,  
mamoi yir ipka riga re dide.’ ”

<sup>7</sup>I ket king Erod opimemb b'ogil multekip riga wigawiga ara emokinonj, i ket towa pilke b'obogil wumir awonj iminjog win gatab ridenat re onggityam iki pita awonj. <sup>8</sup>I re king Erod ten etmikisinonj Betleem taun wa, ton yit atainonj da, “Ra win wuyit, win b'obogil oraka iyenya onggit B'igand. I ra win odarya, win b'ogla odenja kor bage yit nitmikitaya, nokim da ra kodaka neken dem Ti pilwa, idenat kon Ti pilwa kumsos b'atimken dem.” <sup>9</sup>I re ket ton king Erodimna yit utkunda seg auto, aji re ket ton menonim auto, odenja ket itemb iki pita awonj rina re ton naskajog yir yongo ilitand deta ilemet gatab wa. I onggit ikit ten wip amninonj, ngirpu dea de ton opekto rikind re itemb B'iga yibnonj, i omandemb iki ena awonj onggit pipmet tunkipjogind. <sup>10</sup>I re ton itemb iki yir yongo, ton ma sobijog na ukoi sam omnika yiyeno. <sup>11</sup>I re ket ton onggit met wa b'igarkito rikind re itemb B'iga yibnonj, ton kea itemb B'iga yir yongo Ti mog Mariya kima, dide ket ton Ti pilwa kumsos b'amkito ewangayam. I ton ket b'ogiljog gasa oramkapu ga epangkito dide ket kear gasa Ti yogonto, opi re gold i b'ogil ngirangngirang pauda i dide b'ogil ngirangngirang wulpoj. <sup>12</sup>I ket God wima ke opimemb ji b'ogil multekip riga nonony amninonj da, “Goro king Erodim pilwa titekinam.” Si ton ket b'enga nya nata itekto towaina kantri wa.

### **Betleem ke Itringendam de Ejipt wa**

<sup>13</sup>I re ket opimemb b'ogil multekip riga itekto, i ket yipa Yonggyamimna aneru wimand pita awonj Yosepim pilwa. I ton ket yomnonj da, “Utnyite, dide itemb B'iga ake Ti mog akate, i dide ket b'itkenyit Ejipt kantri wa! Si win adea de wimena tuwenyit, ngirpu ra kon men wumir motinyin dem kwa itendam. Mop nokip yu king

Erod ita onggit B'igand oraka yiyeny Tin ongandam.”<sup>14</sup> Si ket onggit siwinyind Yosep utnyitonj, i ket itemb B'iga ake Ti mog akatonj, i dide ket yiwatonj Ejipt kantri wa. <sup>15</sup> I Yosep ket adea de itemb B'iga ake Ti mog kima wekenenonj, ngirpu king Erod uj awonj. Nokim da idenat yimta ke Yonggyamimna yitkak ririrkip tainy rina re Ton yipa bageyamimna tugim ke yopulitonj. Si ton ija naemb ji yopulitonj da, “Kon kea Koina B'igand ara yemokond Ejipt kantri ke opendam.”

<sup>16</sup> I re ket king Erod wumir yokatonj da onggit b'ogil multekip rigap kea tin rabem yomno, ton ma sobijog soro na awonj. Si ton ket tina geja riga etmikisinonj komkesa leo b'iga uj ondrikam yepiya re Betleem taunind dide onggit taun wuswus tungg nata wekenonj, i yepiya re nimog kemag kima dide towa wira ke kemag kima wekenonj. Si Erod odede kemag agenkinonj re onggit win ririr nat rina re ton b'obogil wumir yokatonj onggit b'ogil multekip riga wa pilke. <sup>17</sup> Si odede nya ke kea bageyam Yeremiyamna tugim ke opureni onggityam yitkak ririrkip awonj. <sup>18</sup> Si ton ija naemb ji yopulitonj da,

“Ita rigap yii b'aena nonykok utkundenyi Ramand.

I itemb re gar kopa kima yii b'irinena e dide ukoiyog yii iyagika e.

I Rael opima ti b'igawar yii iyagika eyeniny,

si ton ma singi o gar ngimbla awowim, nokip tina b'iga re kea b'eommento.”

### **Ejipt ke Itendam de Najaret Taun wa**

<sup>19</sup> I onggit kak ke re ket king Erod uj awonj, Yonggyamimna aneru wima ke pita awonj Yosepim pilwa de Ejipt kantrind. <sup>20</sup> I ton ket yomnonj da, “Utnyite! I itemb B'iga ake Ti mog akate, i dide ket meke Israel gou wa! Mop nokip riga yepiya re oraka yiyeno itemb B'igamna yirkokar eommenam re kea uj aukom.” <sup>21</sup> Si Yosep utnyitonj, i ket itemb B'iga dide Ti mog akatonj, i dide ket wuwonj Israel gou wa. <sup>22</sup> I re Yosep utkundonj da Arkelao Yuda eriya king nyi yokatonj rina re ti b'u king Erod yiraronj, si ton re moga na awonj de Yuda eriya wa menonim. Aji re ton wima ke b'ingawa yit yokatonj, ton ket yiwatonj Galili eriya wa. <sup>23</sup> I ton ket yikonj yipa taun wa ogenaya da Najaret, dide ket ademb de yibnenenonj itemb B'iga ake Ti mog kima. Si ingkenaemb ket odede bageyam waina tugim ke opureni yitkak kea ririrkip awonj, it re da “Rigap Tin nyi ogenai ra ‘Najaret Tunggam Riga’ e.”

### **Baptiso Yoanimna Pitapita Omnene Yitkak**

*(Mak 1:1-8; Luk 3:1-9, 15-17; Yoan 1:19-28)*

**3** I onggit winind baptiso Yoan ikonj wul kesa tungg wa de Yuda eriyand dide ket odede yitkak pitapita amneninonj<sup>2</sup> da, “Win gar engenjinam negir milem pilke Godim pilwa! Mop nokip pumb tungg re

ke ite ke wa wus nate ainy.”<sup>3</sup> Mop nokip onggit baptiso Yoanimna yitkak re bageyam Isayamna tugim ke opureni yitkak ririrkip omnem e it re da,

“Ita ukoi ara b'emoka pita tainy dem wul kesa tunggind da,

‘Win Yonggyamim nya ispihindam,

i Tina menonpu nya dimdim omnihindam.’”

<sup>4</sup>I itemb Yoan kobirgim b'ikoki eyeninonj re kamel ngii ke omnika na, i b'angga gim rob ke b'ibgi tina robmopind, i dide ti owou re nok na koka dide tibam wui. <sup>5</sup>I onggit winind riga wuwononj ti pilwa Yerusalem taun ke i komkesa Yuda eriya ke i dide komkesa Yordan kilim wuswus eriya ke. <sup>6</sup>I ton ket towaina negir mile pitapita omnena eyento dide ket Yoanim pilke baptiso yokateno de Yordan kilimind.

<sup>7</sup>I re Yoan yir anginonj jogjog Parisai riga ake Sadukai riga menonind ti pilwa baptiso okatam, ton ten amninonj da, “Win negir guda

kima girem waina b'igawar! Yet wen wumir amninonj da win b'ogla b'itkenindam Godimna ukoi soro kima b'isagikam pilke rinte ra ik dem?

<sup>8</sup>Si onggit paemb ra win singi engenda baptiso okatam, si win b'obogil garjog ke iminjog engenjinam waina negir milem pilke de Godim pilwa, dide ket onggit engendi mile ririrind kip kima milend wimena tuwenyit.

<sup>9</sup>I win goro walenggyam odede b'asourena kima nonyik b'atimdeninam da, ‘Sin re God ma obagiki Abraamimna b'iga im.’ Mop nokip kon

kea wen amninyin da God ririr e onggit gimo wa pilke Abraamimna b'iga tawinkiny. <sup>10</sup>Si yapa re kea wul mop wus nate yibim igogim. Si yonggyam ita onggit yapa ke komkesa wul igka teyeniny rinsim re maka b'ogil kip ejagikanj, dide ton ket wul wa teskokiny so omniam.

<sup>11</sup>I kon wen nyi kaim baptiso omnika eyenininyin negir milem pilke engendam Godim pilwa. Aji kor kak ke ita yipa dandajog riga ik yaina danda re Ti pumbjog wa e aji koina re goujog wa e. Si kon ma ririrkipjog riga en Tina yonginkak iyenam. I Ton wen baptiso omnika teyeniny ra

Yinayina Wingawinga kae dide wul dimil kae. <sup>12</sup>I Ton ita Ti yimind owoukip iukapu sabol yowam, si Ton ita Tina owou erngokapu pipmetind

komkesa uwakurki owoukip sabol ke ouroka teyeniny dide ket pumb wa b'itiskaniny ribim uturenam. Nokim da idenat Ton b'ogilyam owoukip

tekalneniny mogji kesa kip dide au wa pilke. I ra Ton onggityam wiko seg ominy, Ton ita ket b'ogilyam owoukip taramkiny owoukip ongapapu

met b'iga wa, aji Ton ket mogji kesa kip dide au so tamnikiny osouka kesa wul ke.”

### **Yesu Baptiso Yokatonj** (Mak 1:9-11; Luk 3:21-22)

<sup>13</sup>I onggit winind Yesu Galili eriya ke opondonj de Yordan kilim wa Yoanim pilke baptiso okatam. <sup>14</sup>Aji Yoan Tin pop yiswangonj odede yit kima da, “Kon kolenggyam b'ogla baptiso okasin Mor pilke, aji kon

ma ririrkipjog riga en Men baptiso omnam. Si nangga pae Man metket kor pilwa baptiso okatam?” <sup>15</sup>Aji Yesu daka tin mira yomnonj da, “Man b'ogla otade injikite Ken baptiso omnam. Mop nokip odede nya ke komkesa negir kesa dimdimjog mile ririrkip omnam re meranim b'ogiljog e omniam.” Si re Yesu onggityam yit yopulitonj, Yoan ket injikitonj Tin baptiso omnam. <sup>16</sup>I re Yesu baptiso yokatonj, odenja Ton ket kilim nyi ke oblendonj. Si ket wub Tinim ipangendonj dide ket Ton Godimna Wingawingand yir iyonj gimai pila inkand dide igitand Ti kumbind. <sup>17</sup>I ket odenja wub kumb ke nonykokit yindonj da, “Itemb re Koina b'iga e yena re Kon singi yiyenyin. Si Kon ukoi sam en Tinim.”

### Yesu Satanamna Otonkena Akasinonj

(Mak 1:12-13; Luk 4:1-13)

**4** <sup>1</sup>I ket Yinayina Wingawingat Yesund wip yiyonj de wul kesa tungg wa Satanam pilke otonkena okatam. <sup>2</sup>I onggit kak ke re ket Yesu owou uwabika win yokatonj poti (40) bibir dide poti (40) siwiny kima, Ton re ket owoupa na yibnonj. <sup>3</sup>I otonkena riga Satana ikonj Yesum pilwa dide ket Tin yomnonj da, “Rada Man Godimna B'iga et, si Man onggityam gimo engaine engendam sanam.” <sup>4</sup>Aji Yesu mira yomnonj da,

‘Ija emb ji yina peband iriki yibim da,  
 ‘Rigat ma owou nena kae yilo yibim,  
 aji kwa komkesa opureni yitkak kae yilo yibim  
 rinsim re God Tina tugim ke apureniny.’ ”

<sup>5</sup>I ket Satana Yesund wip yiyonj yina taun wa, it re Yerusalem taun, dide ket Tin yonyitonj yinamet papkak petirind. <sup>6</sup>I ton ket Yesund yomnonj da, “Rada Man Godimna B'iga et, Man Molenggyam b'atiyakite de gou wa! Mop nokip yina peband ija emb ji iriki yibim da,

‘God opima Tina aneru mornim tengainy.

I ton ket men towaina yim kumbind motowami.

Si onggit paemb man ma osiya ket moina pis taskisit motir kumbind.’ ”

<sup>7</sup>I ket Yesu mira yomnonj da, “I kwa daka yina peband ija emb ji iriki yibim da, ‘Man goro Yonggyam mor Godind otonkenyit.’ ” <sup>8</sup>I ket Satana b'usaya Yesund wip yomnonj de ukoi jog uskiuski dor papkak kumb wa, dide ket Tin youyaukurinonj komkesa gowukoi kantri dide towaina komkesa b'ogil inyomarena kima mile dide gasa. <sup>9</sup>Seg ton ket Yesund yomnonj da, “Ra man kor pilind kumsos b'atimket ken ewangayam, kon opima onggityam komkesa gasa mor motgoninyin.” <sup>10</sup>I ket Yesu tin yomnonj da, “Satana! Man ewaikite kor pilke. Mop nokip yina peband ija emb ji iriki yibim da,

‘Man b'ogla ewangaya yiyene Yonggyam mor Godind.

I ket Tinim nena wiko omnika yiyenae!’ ”

11 I ket Satana Yesund yiraronj. Seg ket aneru tuwonj Ti pilwa dide ket Tin yim yokawo.

**Yesu Tina Wiko Yotomonj**  
(Mak 1:14-15; Luk 4:14-15)

12 I re Yesu utkundonj da rigap kea baptiso Yoanind sibibmet met wa yoramito, Ton ket Galili eriya wa yikonj. 13 I Ton ket Najaret tungg yiraronj dide ket yikonj Kaparnaum taun wa wimenam. Si Kaparnaum taun re sipa yuru nat yibnonj de Jebulon dide Naptali eriya wingirind.

14 Si nangga pena Yesu yikonj onggit eriya wa re nok mana da idenat bageyam Isayamna tugim ke opureni yitkak ririrkip ominy it re da,

15 “Jebulon gou dide Naptali gou re sipa yuru nasi ebnya.

I ton re Yordan kilim tab nasi ebnya Galili eriyand ogenaya da God ma obagiki kesa riga waina tungg i.

16 I riga yepim re wekeny sibibind, ita ukoijog ngaya yir ongi dem.

I riga wanim yepim re wekeny ujimna kara wingirind, ngayat opima ten inyowaya teyeniny dem.”

17 Si onggit win natemb ket Yesu b'atomonj odede yitkak pitapita ommenam da, “Win gar engenjinam negir milem pilke Godim pilwa! Mop nokip pumb tungg re ke ite ke wa wus nate ainy.”

**Naskajog B'auyaena Riga Imdam**  
(Mak 1:16-20; Luk 5:1-11)

18 I re Yesu Galili sipa yuru nata yikenenonj, si yipa winind Ton nimog nanyinggan yir angonj, osi re Simon ogenaya da Petro dide ti yinggan Andrea. I onggit winind osiemb nanyinggan sipa wa gir b'iskena nat ebnonda, nokip ton re kabum iwika riga na ebnonda. 19 I ket Yesu ten amnonj da, “Ayo tetka, yimta nundoka! I kon riga iwika mi wen tamnyin odede ringmi re win kabum iwika eyeninya.” 20 I odenja ton gir erarkinonda dide ton ket Tin yimta yundokonda. 21 I ingkek re ket Yesu wip wa b'isonkitonj, Ton kea nimog nanyinggan yir angonj, Jebedaimna b'iga nimog Yakobo ake Yoan. I onggit winind ton towa b'u Jebedai kima giga nat ebnonda dide ket gir na angonjento. I Yesu ket ten ara emokonj Tin yimta undokam. 22 Si ton odenja ket giga yiraronda dide kwa towa b'und da. I ket Yesund yimta yundokonda.

**Yesumna Ouyaena dide Kopa Riga Isakendam Wiko**  
(Luk 6:17-19)

23 I re ket Yesu yikemonj kupka Galili eriya nata, Ton Ju riga waina yir opmitenapu met nata riga ouyaena eyeninonj, i ket pumb tungg gatab b'ogil yirkokar bage yit pitapita omnena yiyenonj, i dide ket riga



wa wingirind komkesa b'engabenga wip kopa riga isakka eyeninonj.  
<sup>24</sup>Si Yesum gatab yidir yit re kea warabag auka yikenonj kupka Siriya kantri nata. I ket rigap komkesa kopa riga Ti pilwa eyento, opi re jogjog b'engabenga wip kopa riga, i ukoijog kopa b'angnena kima riga, i negir wingawinga ke imdi riga, i nony kesa tumol aembika kima sap otendena kopa riga, i dide dimir kopa riga. Si Ton ket kea ten isagika eyeninonj.  
<sup>25</sup>I ket jogjog riga bobop Galili eriya ke i Dekapoli eriya ke i Yerusalem taun ke i Yuda eriya ke i dide Yordan kilim yipa tab ke wuwenonj Yesum pilwa, dide ket Tin yimta undoka yiyeno.

### Eit (8) Yitpiam B'ogil Okatam

(Luk 6:20-23)

**5** <sup>1</sup>I re Yesu riga bobo yir teyinonj Ti pilwa menonind, Ton ket yipa sukak wa yikonj. I re Ton omitonj, Tina b'auyaena riga ket tuwonj Ti pilwa. <sup>2</sup>Si Ton ket b'atomonj ten ouyaenam odede da,  
<sup>3</sup>“Ton b'ogil omni riga im ji yepim re wingawinga ke gasa kesand wekeny dide ukoi singi aenanj Godim pilke wurar okatam, mop nokip pumb tungg re towa maemb ji.  
<sup>4</sup>Ton b'ogil omni riga im ji yepim re yu towaina negir mile map yii b'eagikanj, mop nokip God opima towaina gar ngimbla tamnikiny.  
<sup>5</sup>Ton b'ogil omni riga im ji yepim re Godim wipind nony kima muske wimena wuweny, mop nokip ton ita owabinsi gowukoi rina re God tirir amnawonj towa okawam.  
<sup>6</sup>Ton b'ogil omni riga im ji yepim re negir kesa dimdimjog mile okatam pajogind wekeny, mop nokip God opima ten ngor tamnikiny.  
<sup>7</sup>Ton b'ogil omni riga im ji yepim re riga kear amnenanj, mop nokip God opima ten kear tamneniny.  
<sup>8</sup>Ton b'ogil omni riga im ji yepim re gar kilkip kesa wekeny, mop nokip ton ita Godind yir ongi.  
<sup>9</sup>Ton b'ogil omni riga im ji yepim re ngimbla omnika milend wekeny, mop nokip God ten opima Tina b'igam tagenainy.  
<sup>10</sup>Ton b'ogil omni riga im ji yepim re negir kesa dimdimjog mile omnika map bebig dide b'isadrena mile akatenanj, mop nokip pumb tungg re towa maemb.”  
<sup>11</sup>Win b'ogil omni riga im ji, ra rigap Kor map wen negir yit ke tamnenanj, i bebig dide b'isadrena mile oramka teyenanj, i dide komkesa nenegir b'anyginena nya ke negir omnam il ongka teyenanj. <sup>12</sup>Si win b'ogla nony sam kima ukoi kana ngolengole aeninam, mop nokip wa opima ukoijog mira ebainy de pumb tungg wa. Mop nokip rigap ija

naemb ji yipa wip nya ke bageyam wa pilind bebig dide b'isadrena mile amnikenento yepiya re naskand wekenonj.

### **Sol dide Ngaya Onggit Gowukoyind**

*(Mak 9:50; Luk 14:34-35)*

<sup>13</sup>“Win re gowukoyim sol im. Aji ra sol solmet kesa tainy, si ridede nya kae solmet kwa b'usaya titenj? Si ra sol solmet kesa tainy, itemb re makwa ket ingawa ma aji ket bau wa b'iska ma, i ket rigap pis ke ipmindena iyeniyi.”<sup>14</sup>I win re gowukoyim ngaya im. Si sukakind orangi taun ma ririr e ket egiti ibim. <sup>15</sup>Ra yipa rigat lampa so ominy, ton makwa ita kopakak ke utwangik. Aji ton indama oramis lampa uwonyitenapu ororind, i ket ngaya tanyorkiny komkesa riga yepim re wekeny onggit metind. <sup>16</sup>Si odede yipa wip nya ke win b'ogla b'ogil mile tamnikenenindam riga wa wipind ngaya enyorka pila. I ket rigap waina b'ogil wiko yir ongong teyenanj, i ingkaemb ket ton b'ogil inyomarena okaenyi wa B'uim yete re yibim de pumb tungg wa.”

### **Gog Yit Ririrkip Omna Yit**

<sup>17</sup>“I win goro nonyik b'atimdenindam da Kon gog yit dide bageyam waina yit eomnena mana netkond. Aji Kon netkond re ma eomnena mana, aji ririrkip omna mana. <sup>18</sup>Si Kon iminjog wen tamninyin da yimta kena wub ake gowukoi b'eteomnena, aji gog yitim pilke makwa ita yipa iriki o yipa iriki mal b'eteomnena ngirpu onggityam komkesa yitkak ririrkip taukanj. <sup>19</sup>Si onggit paemb yet ra yipa sobijogjog yitkak erbenj onggit b'ingawa yit wingirind dide riga ouyaena teyeniny odede omniam, tin ogenai dem ra sobijogjog riga e de pumb tungg wa. Aji yet ra b'itngaeny dide riga ouyaena teyeniny kupka gog yit ririrind, itemb riga ogenai dem ra ukoi jog riga e de pumb tungg wa. <sup>20</sup>Si onggit mop paemb Kon wen wumir tamninyin da ra waina negir kesa dimdimjog millet maka igoukis Ju riga waina gog ouyaena riga dide Parisai riga waina negir kesa dimdimjog mile, win makwa ngai opima b'itgarkindam de pumb tungg wa.”

### **Riga Onganda gatab Ouyaena Yitkak**

<sup>21</sup>“I win kea utkundenindam da naska winind Mose yindonj da, ‘Goro riga ongandim! Yet ra riga onganj, ton ita negir ma b'isagika okas.’ <sup>22</sup>Aji Kon wen wumir tamninyin da yet ra tina gar ke utkunda nanyind o yingganind soro ke ominy, ton ita negir ma b'isagika okas. Yet ra tina gar ke utkunda nanyind o yingganind ominy da ‘Korirkorir,’ ton ita negir ma

---

<sup>a</sup> 5:13 Onggit eriyand sol re gimo bora nat wekenenonj. Si ra sol gimo nyi wa isongg, solmet topekanj onggit sol gimom pilke, i ket itemb sol gimo tainy ra met kesa gimo nena e.

b'isagika okas pumbjog kotind. I kwa yet ra ominy da 'Nony kesa,' ton ita wul tungg wa iskam b'isagika okas dem rokate re osouka kesa wul dimil yimbeneneny. <sup>23</sup>Si onggit paemb ra man Godim kear gasa oramitam iyit de yina si omnikapu kap wa, i ra ket demb de man nonyik b'atimjit da, 'yipa gar ke utkunda nanyit o yingganit ita kor gar soro nowamau.' <sup>24</sup>Si man ket b'ogla moina kear gasa omanda iraret yina si omnikapu kap wip ke dide ket man naska menon okasit onggit moina gar ke utkunda nany o yingganim pilwa i dide ket ton kima rigariga taet. Seg ket man titenjit yina si omnikapu kap wa i dide ket Godim pilwa moina kear gasa oramisit. <sup>25</sup>Ra yipa rigat kot wa oramitam mii, si man yimta kena b'isagikapu pipmet wa topenjit, aji man b'ogla naska wanakana gangga okasit nyawind ton kima rigariga awowim. I man yir kima, ke onggit rigat men maramit b'isagika rigamna yim kumb wa, i ke onggit b'isagika rigat maramit timtim rigam pilwa, i dide ke mesik sibibmet wa. <sup>26</sup>Kon iminjog men motinyin da si man ma ita sibibmet ke topenjit aji idenata ra man kikitumjog Toya oramisit sibibmet mira undwatam."

**Gigir dide Yigyig B'iyena Mile gatab Ouyaena Yitkak**  
(*Mat 19:9; Mak 10:11-12; Luk 16:18*)

<sup>27</sup>"I win kea utkundenindam da naska winind Mose yindonj da, 'Goro gigir dide yigyig b'iyena mile omnikim.' <sup>28</sup>Aji Kon wen wumir tamninyin da yet ra yipa konggand yir tipik ton kima gigir mile omnika singind, ton re kea onggit kongga kima gigir dide yigyig b'iyena mile yomnik tina garind. <sup>29</sup>I ra moina yimjog tab ke yirit negir mile omnikam motiny, man b'ogla itemb yirkip itkasit dide ket b'itiskansit mor pilke. Mop nokip itemb re b'ogiljog e mornim moina ji ke yipa kipear ewaikitam, aji ma b'ogil e moina kupka ji iskantam de wul tungg wa. <sup>30</sup>I kwa ra moina yimjog yimit negir mile omnikam motiny, man b'ogla itemb yim ipmarkisit dide ket b'itiskansit mor pilke. Mop nokip itemb re b'ogiljog e mornim moina ji ke yipa kipear ewaikitam, aji ma b'ogil e moina kupka ji iskantam de wul tungg wa.

<sup>31</sup>I kwa Mose yindonj da, 'Yet ra ti konggand bondik tominy, ton b'ogla itomb konggam bondik omnam imjati peba tokau.' <sup>32</sup>Aji Kon wen wumir tamninyin da yet ra ti konggand jabakipind bondik tominy yipa riga kima negir b'iyena mile omniki kesand, ton kea tin wominy gigir dide yigyig b'iyena mile omnikam. I kwa yet ra bondik omni konggand tokas ti konggam, ton kea gigir dide yigyig b'iyena mile yomnik."

**Danda kima Tirir Omna Yit gatab Ouyaena Yitkak**

<sup>33</sup>"I kwa win utkundenindam da Mose kesam riga amninonj da, 'Goro nenegir nya ke danda kima tirir yit opulitim! Aji ra man danda kima tirir omni yit opulisit Yonggyamim pilwa, si man b'ogla onggit yit ririrind

tamnikinyit.’<sup>34</sup> Aji Kon wen tamninyin da goro kwa ngai danda kima tirir yit opulitim, goro pumb tungg nyi kima, mop nokip pumb tungg re Godimna wip omnenapu kasa e.<sup>35</sup> I goro danda kima tirir yit opulitim gowukoi nyi kima, mop nokip gowukoi re Godimna pis oramitenapu e. I goro Yerusalem taun nyi kima, mop nokip itemb taun re ukoijog King Godimna e.<sup>36</sup> I goro danda kima tirir yit opulitim moina moptekip ke, mop nokip man makwa ririr et yipa moina mopngii bilbil o timentim omniam.<sup>37</sup> Aji man b'ogla ina nena yit opulisit da ‘Owi’, nangga e re iminjog, i ‘Nayi’ nangga e re ma iminjog e. Aji nangga na ra onggityam yit tumind oramisit, itemb re negiryam Satanam pilkae ik.”

### Goro Negir ke Mira B'amnena

(Luk 6:29-30)

<sup>38</sup> “I win kea utkundenindam da naska winind Mose yindonj da, ‘Yet ra moina yirkip negir ominy, si madaka b'ogla tina yirkip mira negir omnyit, i yet ra moina orkak irobenj, si madaka b'ogla tina orkak mira irobenjit.’<sup>39</sup> Aji Kon wen tamninyin da goro negir riga mira negir omnim. Aji yet ra moina yimjog yim tab ke anakak mitpokis, si man b'ogla kwa moina yipa tab anakak ti engendaet tinim ipokitam.<sup>40</sup> I yet ra singi tainy men kot wa oramitam dide moina wingir ke kobirgim okatam, si man b'ogla kwa okaet moina bau ke pinpin kobirgim.<sup>b</sup> <sup>41</sup> I kwa yet ra men danda kima il motingik yipa kilomita pin menonim, si man b'ogla ton kima menon okasit nimog kilomita.<sup>42</sup> I man b'ogla okaet onggit rigam yet ra mitgekis, i goro man onggit rigand isayim yete re singi ainy moina gasa ziyoyoi igawam.”

### Geja Riga wa Singi B'iyena Mile

(Luk 6:27-28, 32-36)

<sup>43</sup> “I win kea utkundenindam da naska winind Mose yindonj da, ‘Man singi ziyene mor rigand dide singi kesa yomnene moina geja rigand.’<sup>44</sup> Aji Kon wen tamninyin da singi eyeninam waina geja riga, i yir topmitenindam towanim yepim re bebig dide b'isadrena mile amnikenenanj wanim.<sup>45</sup> Si ra win odede mile tamnikindam, win b'ogla waina B'u Godimna b'iga taindam yete re pumb tunggind yibim. Mop nokip Tontemb Tina lomkongga yiliteneny b'anyoratenam negir riga wa pilwa dide b'ogil riga wa pilwa, i dide kwa Ton piro yigmarkeneny negir kesa dimdimjog riga wa pilwa dide negir kima kaokao riga wa pilwa.<sup>46</sup> I ra win riga singi teyenindam yepim re wen singi eyenanj, si nangga mira e win okasya? Ringma, ma ma negir mile kima teks imdayam rigap

<sup>b</sup> 5:40 Wingir ke kobirgim re ma ukoi mira kima na, aji bau ke pinpin kobirgim re ukoijog na onggit kima wimenam dide ukoi mira kima na.

todaka opima odede yipa wip mile amnikenenanj? <sup>47</sup>ƒ kwa ra win waina kus ke riga nena simesime yit tamnikenindam, si win nangga b'ogiljog mile im amnikenindam ninda riga wa pilke? Si ringma, ma ma God ma obagiki kesa rigap todaka opima odede yipa wip mile amnikenenanj? <sup>48</sup>Si onggit paemb win b'ogla Godim wipind dimdimkipjog riga ainam odede yipa wip ite re wa B'u God dimdimjog riga yibim de pumb tungg wa.”

### Kear Omnena gatab Ouyaena Yitkak

**6** <sup>1</sup>“ƒ win yir kima tekenyit onggitim da goro win waina negir kesa dimdimjog mile omnika teyenina riga wa wipind towanim yir ongong singind. Si ra win odede mile tamnikenenindam, win ma opima mira takatenindam wa B'u Godim pilke yete re yibim pumb tungg wa.”

<sup>2</sup>“Si onggit paemb ra man kear omnena teyeninyit gasa kesa riga, goro ara kima metkenim odede ringmim re bibol ipaya rigap ara kima wuweneny riga wa utkundam. Si gim ke b'ogil aji ngor wa negir mile rigap opima odede yipa wip nya ke mile omnika eyenanj de Ju riga waina yir opmitenapu met nata dide sobea nata riga wa pilke esourena okatam. Kon wen iminjog wumir tamninyin da ton kea towaina mira yokateno. <sup>3</sup>Aji ra man kear omnena teyeninyit gasa kesa riga, man b'ogla odede nya kena omniket rija e re moina sawai yim yig nonyind yibim onggit gatab rinsim re moina yimjog yimit kear amneniny. <sup>4</sup>Si odede nya ke moina kear omnena mile b'ogla wigawiga na yebim. Si idenat mor B'u God yete re wigawiga yir ongong eyeniny nangga im re rigap wigawiga amnikenenanj, Ton ket men ita mira motiny.”

### Yir Opmita gatab Ouyaena Yitkak

*(Luk 11:2-4)*

<sup>5</sup>“ƒ kwa ra win yir topmitenindam, goro odede taininam ringmim re gim ke b'ogil aji ngor wa negir mile rigap yir opmitenenanj. Mop nokip ton singi aukenenanj owinenam de Ju riga waina yir opmitenapu met nata dide ukoi sobea dedag nata dide ket yir opmitenenanj riga wa bajbajind, nokim da idenat rigap ten yir ongong teyenanj. Si Kon wen iminjog wumir tamninyin da ton re kea towaina mira akatento. <sup>6</sup>Aji ra man yir topmisit, man b'ogla b'itgaret moina rum wa, i ket mora idoket, i dide ket yir topmisit mor B'u Godim pilwa yete re wigawiga yir ongong kesa yibim. Si itemb mor B'u ita wigawiga yir ongong miyeny nangga ma re man yir opmitenyit, Ton ita ket mira motiny. <sup>7</sup>ƒ ra win yir topmitenindam, goro yitkak tusaereninam odede ringmim re God ma obagiki kesa rigap yir opmita amnikenenanj. Mop nokip ton nony aukenenanj da God opima towaina yir opmitena utkundeniny towaina jogjog yitkak usairena map. <sup>8</sup>Si onggit paemb win goro odede God ma obagiki kesa riga pila taukinam.

Mop nokip win yimta kae wa B'u Godind yir opmita ke nyi yuwatenya, aji Ton kea naska nata wumir ainy nangga im re win arakindam. <sup>9</sup>Si onggit paemb win ija imemb ji yir topmitenindam da,

'Sowa B'u God yete re mibnyit pumb tungg wa,

Moina nyi b'ogla yinam rain,

<sup>10</sup> i Moina wip omnenapu pumb tungg b'ogla rinik onggit gowukoi wa, i Moina singi b'ogla ririrkip rain kwa daka dikind onggit gowukoyind odede rija na re pumb tungg wa awonj.

<sup>11</sup> i bibir weanjweanj sowa owou notgoneneninyit bibir ririrind.

<sup>12</sup> i Man sowaina negir mile awir omnika teyeninyit, odede yipa wip opi re sin ninda riga wa towaina negir mile awir amnikaenenindam rinsim re ton amnikenenanj sowa pilind.

<sup>13</sup> i Man goro sin wip niyinin negir ma b'atonkena wa, aji nedikine negiryam Satanam pilke.

[Mop nokip pumb tungg i danda i dide b'ogil inyomarena re Moina im dadal ngirpu kesa, iminjog.]

<sup>14</sup>Mop nokip ra win riga wa negir mile awir tamnikaenindam rinsim re ton amnikenenanj wa pilwa, si wa B'u God yete re yibim pumb tungg wa, Todaka opima waina negir mile awir tamnikaeniny. <sup>15</sup>Aji ra win maka ra riga wa negir mile awir tamnikaenindam rinsim re ton amnikenanj wa pilwa, si wa B'u God Todaka makwa opima waina negir mile awir tamnikaeniny.

### Owou Uwabika gatab Ouyaena Yitkak

<sup>16</sup>"I ra win owou uwabika win okasya, goro wipribrib taininam odede ringmim re gim ke b'ogil aji ngor wa negir riga aukenenanj. Mop nokip ton wipribrib aukenenanj re riga wa ouyawa mim da ton re owou uwabika win e yokatenyi. Si Kon wen iminjog wumir tamninyin da ton re kea ririrkipjog towaina mira okati im wekeny riga wa pilke. <sup>17</sup>Aji ra man owou uwabika win okasit, man b'ogla gaya ke moina mop b'itisniket dide moina wip b'itiseket. <sup>18</sup>Nokim da idenat rigap maka wumir taukanj da man re owou uwabika win e yokasit, aji mor B'u God nenata wumir okas yete re wigawiga yir ongong kesa yibim. Si itemb mor B'u God yete re wigawiga yir ongong miyeny nangga e re man wigawiga yomnikenenyit, Ton ita mira motiny.

### B'ogil Gasa gatab Ouyaena Yitkak

(Luk 12:33-34)

<sup>19</sup>"I goro win b'ogiljog gasa ongapa teyeninam wanim onggit gowukoyind rokasim re bebirip dide orliyap waina gasa owou eyenanj, dide rokasim re yurowamam rigap waina met eporkenenanj b'igaram

dide waina gasa imda teyenanj. <sup>20</sup>Aji win b'ogla waina b'ogiljog gasa ongapa teyenindam de pumb tungg wa rokasim re bebirip dide orliypa toda maka waina gasa owou eyenanj, dide rokasim re yurowamam rigap maka waina met eporkenenanj b'igaram dide maka waina gasa imda eyenanj. <sup>21</sup>Mop nokip rokate re moina b'ogiljog gasa yibim, si indamaemb todaka moina kid ibim.

<sup>22</sup>“Si yirkip re jiwim lampa e. Si onggit paemb rada moina yirkip b'ogiljog i, moina kupkakupka ji ra ngaya pita nate ibim. <sup>23</sup>Aji rada moina yirkip negirjog i, si moina kupkakupka ji ra sibib ke ikangindi e ibim. Si onggit paemb rada itemb ngaya sibib nate yibim rinte re yibim mor pilind, itemb re ma sobijog sibib kikibte mitkanginj.

<sup>24</sup>“Makwa yipa rigat ririr e nimog yonggyam wa wiko tamnikainy. Mop nokip ton yama rika yipa yonggyamind singi kesa e omneny dide kwa yipa yonggyamind ra singi e iyeny, o ton yama rika yipa yonggyamind isnawa e iyeny, dide kwa ra yipa yonggyamind isnawa kesa e omneny. Si onggit paemb win ma ririr im wiko riga taukindam nimognimog Godim dide onggit gowukoi gasam.

**Gim ke Gasam Nony Kubir gatab Ouyaena Yitkak**  
(Luk 12:22-34)

<sup>25</sup>“Si onggit paemb Kon wen tamninyin da goro nony kubir taininam da nangga owou im tawenenindam o nangga nyi im tanaikindam yirkokar wimenam, i kwa nangga kobirgim im b'itkokenenindam waina jiwind. Si ringma, ma ma yilo yirkokar re ukoi jog e owowim pilke? I ma ma ji re ukoi jog e kobirgimim pilke? <sup>26</sup>Si win b'obogil yirik teyenindam pumbind ngena. Ton makwa opima tuny igmarka eyenenanj, i makwa opima owoukip eakikenenanj, dide makwa opima bobo omnika eyenenanj owou ongapapu met b'iga wa. Aji waina B'u God yete re yibim pumb tungg wa, Tonsimemb ten ongenka eyeniny. Si ringma, ma ma win ukoi jog im odede ngena wa pilke? <sup>27</sup>I wa wingirind yete ririr e tina nony kubir b'amnika ke tina yirkokar isonkis yipa sobijog win kima? <sup>28</sup>Win b'ogla b'obogil temtem gatab nony menamena amnikinam rija im ton b'obogil ikaeneni owinkenenanj yapind. Si ton ma opima kobirgim omnika tin kai eraskenenanj, i dide kwa ton ma opima kobirgim omnika eyenenanj. <sup>29</sup>Aji Kon wen wumir tamninyin da king Solomon kea tina komkesa b'ogil inyomarena kima b'ajga yikenonj, aji tina b'ajga re makwa yipa ririrkip awonj yipa odede temtem re dide. <sup>30</sup>Si rada Godsim odede tibam tib ejga eyeniny rinsim re yu yilo wekeny aji mep uj taukanj wul wa b'iskokam. Si ringma, ridede wip e ket God wen b'obogiljog ejga teyeniny? Si win goro sobijog gar ke utkundand tekenyit, Ton opima wen b'obogiljog ejga teyeniny. <sup>31</sup>Si onggit paemb win goro nony kubir taeninam odede yit kima da, ‘Nangga im sin tawindam?’ o ‘Nangga im

sin tanaikindam?’ o ‘Nangga im sin b'itkokindam?’ <sup>32</sup>Mop nokip God ma obagiki kesa rigap insimemb odede komkesa gasa oraka eyenanj. Aji wa B'u God yete re yibim pumb tungg wa, Ton wumir e da win b'ogla insimemb gasa tengaenenindam gowukoi wimenam. <sup>33</sup>Aji win naska God ma pumb tungg dide Tina negir kesa dimdimjog mile oraka eyeninam! Si God ket wa tagoniny ra ma pumb tungg dide negir kesa dimdimjog mile nena im aji daka kwa opima odede komkesa gasa tagoniny. <sup>34</sup>Si onggit paemb goro win nony kubir taeninam mepnim gatab, nokip mepnim gasa ra mepnim nony kubir omna mim. Ita bibir wa re opima ebainy towa ririr bebig.

### **Riga Isagika gatab Yitkak**

*(Luk 6:37-38, 41-42)*

**7** <sup>1</sup>‘I win goro riga wa pilind b'isagika mile tamnikina, si wida makwa ita b'isagika okatenya. <sup>2</sup>Mop nokip win ita odede yipa wip nya ke b'isagika okatenya dem rija na re win riga wa pilind b'isagika mile omnika yiyenonda, i kwa God opima wanim okawam odede yipa wip tondon wa takatenainy rija na re win riga wa tondon akatenautondam. <sup>3</sup>Nangga pae man yir pipla yir yiyenyit moina rigamna yirkipind, aji kwa nangga pae man maka b'obogil wumir yokatenyit wulpas gatab moinajog yirkipind? <sup>4</sup>I rada mor ita mibnau wulpas moinajog yirkipind, si ringma, ridede e man ket moina rigand omnyit da ‘Mabe kon mawaikitawin yir pipla moina yirkip ke?’ <sup>5</sup>Si man re gim ke b'ogil aji ngor wa negir riga et. Si man naska moina yirkip ke wulpas yewaikite! I ingkaemb ket man onggityam yir pipla pitakipind yir onget mor rigamna yirkipind, i ket man itemb yir pipla ewaikitaet mor rigamna yirkip ke. <sup>6</sup>I win goro yongg pila wip inggrawa kesa riga wa yinayina gasa tagoninam yepim re Godind isanikesa geja yiyenyi. I kwa goro b'om pila riga wa wipind teskokinam waina b'ogil ngindngind timtim jag wingawinga ke b'ogil gasa. Si ra win b'itiskokindam, ton opima towaina pis ke tepmindenanj i ton ket opima tengendanj wa pilwa i dide ket wen mi tenyoukanj.

### **Godind Erkena gatab Yitkak**

*(Luk 11:9-13)*

<sup>7</sup>‘Win erkena yiyena, i win ita okasya. I win oraka yiyena, i win ita ket odarya. I win mora odounena yiyena, i ita mora wanim tipangenj. <sup>8</sup>Mop nokip komkesa riga yepiya ra erkena iyenyi, ton ita okasi, i oraka iyenyi, ton ita odari, i dide mora odounena iyenyi, mora ita towanim tepangenj. <sup>9</sup>I wa wingirind yete re b'iga b'uwwam, rada ti b'igat erkis sanam, si ringma, ti gimo e okau? <sup>10</sup>O rada ti b'igat erkis kabumim, si ringma, ton girem e okau? <sup>11</sup>Si onggit paemb nangga ma ji rada win negirjog mile riga im, aji win wumir im wekenyit ridede e wa b'igawar



wa ogonam b'ogil gasa. Si wa B'u yete re yibim pumb tungg wa, Ton re ma ija e it re win re dide, aji Ton iminjog opima b'ogiljog gasa tagoniny towanim yepim re Tin yerkenyi. <sup>12</sup>Si onggit paemb win ija na gasa tamnikaenindam riga wa odede ringma re win singi aenindam rigap wa tamnikaورانج. Mop nokip itemb mile re gog yit e dide bageyam waina yit e kesam peba wingirind.

### **Sobijogjog Mora wa B'igaram**

*(Luk 13:24)*

<sup>13</sup>“I win b'igarenina sobijogjog mora nata menonim pumb tungg wa, mop nokip wul tunggim mora re moge warabag dide itemb onggit mora ke nya imaenam re wewa e rinsim re riga wip eyeniny de wul tungg wa, si ma yipa kima rigapim onggit mora nata b'igarena wuweny menonim onggit nyawind. <sup>14</sup>Aji daka itemb pumb tunggim mora re sobijogjog e dide itemb onggit mora ke nya imaenam re bebigjog e rinsim re riga wip eyeniny yirkokar wa, si ma jog rigapim itemb sobijogjog mora oraka yiyenyi b'igarenam.

### **B'anyginena Bageyam Ongwata gatab Yitkak**

*(Luk 6:43-44; 13:25-27)*

<sup>15</sup>“I win yir kima tekenyit b'anyginena bageyam wa gatab. Opimemb b'anyginena bageyam wuweny wa pilwa re gim ke Godimna mamoi pila b'ogil b'ajgi riga im, aji ngor ke iminjog re wip inggrawa kesa di yongg pila riga im. <sup>16</sup>Si win ten tangwatenindam ra towaina omnika kip kaim. Si ringma, opima rigap greip kip eakikenenanj wanja kai wa pilke o pig kip eakikenenanj sisipa nangg wa pilke? Nayi, ma ija e. Aji toda greip kip eakikenenanj re greip nangg wa pilkaim, i pig kip re pig nangg wa pilkaim. <sup>17</sup>Si odede yipa wip nya ke b'ogil wul nanggip tejagikanj ra b'ogil wulkip im, aji negir wul nanggip tejagikanj ra negir wulkip im. <sup>18</sup>I b'ogil wul nanggip ma ririr e ijagenj negir wulkip, i toda negir wul nanggip ma ririr e ijagenj b'ogil wulkip. <sup>19</sup>I komkesa wul nangg rinsim re maka b'ogil wulkip ejagikanj, yonggyam opima tegkiny dide wul wa teskokiny so omniam. <sup>20</sup>Si onggit paemb win b'anyginena bageyam tangwatenindam ra towaina omnika kip kaim.

<sup>21</sup>“Si ma komkesa riga im pumb tungg wa b'itgarkanj yepim re tugim nena ke Ken nogenaenenyi da ‘Yonggyam, Yonggyam,’ aji ton nena im b'itgarkanj yepim re Kor B'u ma singi mile omnika eyenanj yete re yibim pumb tungg wa. <sup>22</sup>I ra b'isagika bibir ik dem, jogjog rigapim Ken notinenyi dem da, ‘Yonggyam Yonggyam! Ma ma sin kea Moina nyi kima bage yit opurena eyentondam, i Moina nyi kima negir wingawinga eaukena eyentondam, i dide Moina nyi kima jogjog kid kesa kima danda wiko omnika eyentondam?’ <sup>23</sup>Si Kon ket opima ten pitakipind tamninyin

dem da, 'Kon makwa ngai wanim wumir awond. Negirjog mile omnika riga, win ewaikisinam Kor pilke!'

**Nimog Met Oranga Riga gatab Wingata Yitkak**  
(Luk 6:47-49)

<sup>24</sup>“Si onggit paemb yet ra onggityam Koina yitkak tutkudeniny dide omnikand b'itngaeny onggit yitkak ririrind, ton ija e ite re b'ogil multekip kima met oranga riga re dide. Si ton tina met yorang re ngortod wa emki danda rorte kumb nate. <sup>25</sup>Si nangga ma ji rada ukoi piro tigmarik dide ket ukoi ngiwir ik, i kwa rada ukoi rib b'itkeny dide ket itemb met ipou, aji itemb met makwa ita tosmulis. Mop nokip itemb met re b'obogil orange e ngortod wa emki danda rorte kumbind. <sup>26</sup>I yet ra onggityam Koina yitkak tutkudeniny dide maka omnikand b'itngaeny onggityam yitkak ririrind, ton ija e ite re korirkorir met oranga riga re dide. Si ton tina met yorang re bab tumind emki rorte kumb nate. <sup>27</sup>I ra ket ukoi piro tigmarik dide ket ukoi ngiwir ik, i kwa ra ukoi rib ikeny dide ket itemb met ipou, i itemb met ita tosmulis. Si itemb re ma sobijog wuwam kima e nenegir kana b'atiskis.”

<sup>28</sup>I re Yesu onggityam yitkak opurena seg amninonj, riga bobop ma sobijog na kid kesa aento Tina ouyaena ke. <sup>29</sup>Mop nokip Ton auyaeninonj re odede na it re Godimna danda kima riga re dide, aji ma ija na it re Ju riga waina gog ouyaena riga re dide.

**Yesu Leprosi Kopa Riga Yisakendonj**  
(Mak 1:40-45; Luk 5:12-16)

**8** <sup>1</sup>I re Yesu onggit sukak ke paga wa etaeta ikonj, jogjog riga bobop Tin yimta undoka iyo. <sup>2</sup>Si yir de, yipa leprosi kopa riga ikonj Ti pilwa dide ket kumsos b'amkonj odede yit kima da, “Yonggyam! Ra man singi taet, Man ririr e ken kilkip kesa notinyit.” <sup>3</sup>I Yesu ket Tina yim b'itnikonj dide ket tin yesopayonj odede yit kima da, “Kon ita singi, kilkip kesa ae!” Si odenja ket ton kilkip kesa awonj onggit leprosi kopa ke. <sup>4</sup>Seg ket Yesu tin yomnonj da, “Yir de, goro yama na usekainim dor. Aji meke dide ket molenggyam b'atouyaet yina si rigam pilwa. Si man ket Godim si gasa tanggikinyit dor i eyinyit de yina si rigam pilwa si omnikam rina re Mose b'ingawa yoramitonj. Nokim da idenat ton mitimjas riga wa wipind da ‘Man kea b'isakenjit dide kilkip kesa aet.’”

**Roma Andred (100) Geja Riga Mopyamimna Gar ke**  
**Utkunda gatab Yitkak**  
(Luk 7:1-10; Yoan 4:43-54)

<sup>5</sup>I re Yesu Kaparnaum taun mora wa b'igaronj, yipa Roma andred (100) geja riga mopyam Ti wus wa ikonj dide ket Tin yigekitonj <sup>6</sup>odede yit kima da, “Yonggyam! Yipa koina wiko riga re dimir kopa kima e pas

nate yibim metind, dide negirjog b'idgotnena e yokateny." 7Seg Yesu ket tin yomnonj da, "Kon ita tin isakendam yopen." 8Si daka itemb Roma andred (100) geja riga mopyam yismonggawonj da, "Yonggyam! Kon ma odede ririrkipjog riga en Men yit omnam da, 'Man b'itgaret koina met wingir wa!' Aji b'ogla yit nena yopulite, si idenat koina wiko riga b'itisakenj. 9Mop nokip koda re yipa juwai kima riga wira nate nibnyin dide kwa daka kor wirand opima geja riga nibnainy. Si ra kon yipa geja rigand ingaen da 'Meke,' si ton ita yik, i ra kon kwa yipa rigand ingaen da 'Metkim,' si ton ita ik. I kwa ra kon yipa koina wiko rigand ingaen da 'Man itemb gasa yomnike,' si ton ita omnik." 10Si re Yesu tina yit utkundonj, Ton kid kesa na awonj dide ket ten amninonj yepiya re Tin yimta yundoko da, "Kon iminjog wen tamninyin da Kon maike ya pilnat odede iminjog gar ke utkunda riga yodarond Israel riga wa wingirind. 11I Kon wen tamninyin da jogjog God ma obagiki kesa riga opima tuweny dem gowukoi komkesa gatab ke, ilemet ke dide kemagmet ke, i dide ket diyamdiyampund pipmet takatenanj dem omitenam yipand Abraam kima i Isak kima i dide Yakob kima de pumb tungg wa. 12Si Israel rigapim pop onggit pumb tunggim tib riga, aji God opima ten teskokiny dem dea ta bau ke sibisibib pipmet wa, dide ket amimemb de ton yii kamil b'iyowa tuweny dem, dide kopa b'angnena kima or b'iinika tuweny dem." 13Seg ket Yesu itemb Roma andred (100) geja riga mopyamind yomnonj da, "Meke! Moina gar ke utkunda ririrind ita mornim tawik." I onggit winjogind kea itemb tina wiko riga b'isakendonj.

### **Yesu Jogjog Kopa Riga Esakenjinonj**

*(Mak 1:29-34; Luk 4:38-41)*

14I re ket Yesu yikonj Petromna met wa, Ton kea Petromna konggayam jeam yir wongonj re ton juwar map pasind ekobliti wibnonj. 15Si re ket Yesu tina yimind wesopayonj, juwarit tin wiraronj. Seg ket itomb kongga onyitonj dide ket Yesund yim yokawonj. 16I re si imokonj, rigap jogjog negir wingawinga ke imdi riga eyento Yesum pilwa. I ket Yesu Tina yitkak ke negir wingawinga eaukeninonj dide ket komkesa kopa riga esakenjinonj. 17Si nangga pena Ton odede mile yomnikonj re onggit bageyam Isayamna opureni yitkak ririrkip omna mana ite re da,  
 "Ton Tilenggyam meraina gim bodakak mile akasinonj,  
 dide meraina kopa pokirind b'itangisinonj."

### **Yesund Yimta Undoka map Bebig**

*(Luk 9:57-62)*

18I re Yesu riga bobo yir yongonj Tin iwatindenand, Ton ket Tina b'auyaena riga engainonj sipa tab wa ijendam. 19I ket yipa Ju riga waina gog ouyaena riga Yesum pilwa ikonj, i ket Tin yomnonj da, "Ouyaena

riga! Kon ita men yimta undoka mitiyenyin ritata ra man metkenyit.”  
 20 Si Yesu ket tin yomnonj da, “Gongir wa opima towa wul bora wimenam, dide pumbind ngena wa kwa opima towa met, aji Rigamna B'igam re awir e kwa Ti wimenapu pipmet mop owaglitam.” 21 I kwa yipa Tina b'auyaena rigat Tin yomnonj da, “Yonggyam! Kon yimta kae Mor pilwa titenjin aji naska kon kor b'und eungitam neken.” 22 Aji Yesu tin yomnonj da, “Man yimta nundoke! Aji toko wingawinga ke uj rigap gop raukinem towainajog uj riga.”

### **Yesu Depu Rib Muma kesa Yomnonj**

*(Mak 4:35-41; Luk 8:22-25)*

23 Seg re ket Yesu giga wa angitonj, si Tina b'auyaena rigap kea Tin daka yimta yundoko giga wa angitam. 24 I ket yir de, demb de uko depu rib b'atomonj onggit sipand, si idenatemb ket wurop itemb giga ikangindena yiyo nyi b'auratam. Aji Yesu re yutunga na yikonj. 25 Si Tina b'auyaena rigap Ti pilwa wuwonj dide ket yit opmura yiyeno odede yit kima da, “Yonggyam! Yim nokaine! Men momta im negir taindam.” 26 I ket Yesu ten amninonj da, “Utkunda kesa riga! Winangga paim mogamoga aenindam?” I Ton ket odenja utnyitonj dide ket rib ake sipa wuro samany eyowonj. Seg ket sipa kupkakupka mumakesajog awonj. 27 Si komkesa riga re kid kesa na aukito, dide ket endento da, “Si ridede riga e ji? Rib ake sipa wuro todaka kea Tin yit yutkunjya!”

### **Yesu Nimog Negir Wingawinga ke Okati Riga esakendonj**

*(Mak 5:1-20; Luk 8:26-39)*

28 I re Yesu opendonj yipa sipa tab wa de Gadarene eriya wa, nimog negir wingawinga ke okati rigap Tin wipwip yomnonda yepiya re gimo yiund oski gopmet ke opendonda. Si osiemb riga nimog re ma sobijog wip inggrawa kesa na ebonda, si onggit penaemb makwa yet ririr aukenenonj opandenam onggit nya nata. 29 I odenja ket ton obailitonda odede yit kima da, “God ma B'iga! Nangga e man singi yomnyit sowa pilind? Sowa makaya ogeni win yokas, aji ringma, ma man naska kana e metket sin bebigind oramitenam?” 30 Aji onggit winind rigap kea dikind towa wus ke jogjog b'om bobo ongena eyento. 31 Si negir wingawingap Yesund yigekito odede yit kima da, “Ra man sin notpenjinyit riga wa pilke, si man bea ngai sin nitmikurine de onggit b'om bobo wa pilwa.” 32 I Yesu ket ten amninonj da “Wuwe!” Seg ton ket opekto onggit riga wa pilke, i ket b'om wa pilwa b'igarkito. I yir de, opimemb komkesa b'om bobo wanakana b'ikto sipa yuru kumb wa, i ket sipa wa unykurto, ngirpu ket komkesa uj aukito. 33 Si opimemb b'om ongena riga b'ikento, i re ton ket opekto taun wa, ton kea riga wumir ammento komkesa mile gatab rina re aukito dide kwa onggit gatab rina re negir wingawinga ke okati riga wa pilind aukonj. 34 I yir de, komkesa taun rigap kea Yesund yir ongongim yopeno. Seg

re rigap Yesund yir yongo, ton Yesund yerkito towaina eriya ke ewaikitam dide menonim deta b'enga gatab wa.

### Yesu Dimir Kopa Riga Yisakendonj

(Mak 2:1-12; Luk 5:17-26)

**9** <sup>1</sup>Ɔ Yesu ket giga wa angitonj dide ket tab ijendonj. Seg Ton ket yikonj Tinajog tungg wa. <sup>2</sup>Ɔ yir de, ninda rigap kea yipa dimir kopa riga titind yutungi iyo Yesum pilwa. I re Yesu towaina gar ke utkunda yir yongonj, Ton ket itemb dimir kopa rigand yomnonj da, “B'iga! Goro nony bebig. Moina negir mile kemb awir auranj.” <sup>3</sup>Ɔ onggit winind ninda Ju riga waina gog ouyaena riga towaina gar ke endento da, “Onggit rigat God na yisadreny.” <sup>4</sup>Ɔ Si Yesu kea towaina nony menamena wumir awonj, i Ton ket yindonj da, “Nangga mop pae win odede negirjog nony menamena amnikindam waina garind? <sup>5</sup>Ɔ Rinte yit opulitam wewa ainy, it re da ‘Moina negir mile kemb awir auranj’ o da, ‘Utnyite, i menon yokate?’ <sup>6</sup>Ɔ Aji Kon yipa gasa e omniken wen ouyawam da Rigamna B'igam ita Ti danda gowukoyind negir mile awir omnikam.” Seg ket Yesu dimir kopa rigand yomnonj da, “Utnyite, moina tit yurowate, i moina met wa meke!” <sup>7</sup>Ɔ Seg itemb riga utnyitonj, dide ket yiwatonj tina met wa. <sup>8</sup>Ɔ Si re riga bobop itemb mile yir yongo, ton kea ukoi moga aukito dide ket Godind esourena yiyeno yet re odede juwai akainonj riga wa.

### Yesu Matayond Ara Yemokonj

(Mak 2:13-17; Luk 5:27-32)

<sup>9</sup>Ɔ re Yesu itemb pipmet yiraronj, Ton kea yipa rigand yir yongonj omi teks imdapu metind, nyi da Matayo, dide ket tin yomnonj da, “Yimta nundoke!” Ngirpu ket Matayo utnyitonj dide ket Yesund yimta yundokonj. <sup>10</sup>Ɔ re ket Yesu diyam awowind yibnonj Matayomna metind, si jogjog teks imdayam riga dide negir mileyam riga kea de wuwenonj onggit met wa i ket Yesu dide Tina b'auyaena riga kima yipand diyam aukito. <sup>11</sup>Ɔ re Parisai rigap onggityam mile yir yongo, ton kea Yesumna b'auyaena riga egekito da, “Nangga mop pae waina ouyaena riga diyam ainy yipand teks imdayam dide negir mileyam kima?” <sup>12</sup>Ɔ Aji re Yesu odede yit utkundonj, Ton ket amninonj da, “Ma kopa kesa rigapim dokta singi omnyi, aji kopa kima rigapim. <sup>13</sup>Ɔ Aji win b'auyaenam wuwene nangga e onggityam God ma yitkakit yisipkis it re da, ‘Kon singi en kear mile aji ma singi en si b'angga.’ Mop nokip Kon ma negir kesa dimdimjog riga na tatupinond engendam negir milem pilke de Godim pilwa, aji negir mile kima riga na.”

### Owou Uwabika gatab B'arkita

(Mak 2:18-22; Luk 5:33-39)

<sup>14</sup>Ɔ ket Yoanimna b'auyaena riga tuwonj Yesum pilwa dide ket yigekito da, “Nangga pae sin dide Parisai riga jogjogpyam owou uwabika win yokatenyu, aji Moina b'auyaena rigap re ma ita ton owou uwabika win yokatenyi?” <sup>15</sup>Ɔ

Yesu ten mira amninonj da, “Ringma, ririr e ton sisil kongga kima rigamna rigawarip gar bebig tekeny, ra ton sisil kongga kima riga dikinda towa wingirind ibim? Ma ririr e. Aji ita win ik dem, ra sisil kongga kima riga tewaikis dem towa pilke, si idenatemb ton ket owou uwabika win okatenyi dem. <sup>16</sup>I makwa ita yipa rigat sisil kobirgim kib ke kesam kobirgim bora pasi ominy. Ra ton odede pasi ominy i dide ra itemb pasi omni kobirgim nyi ke isek, ita sisil kobirgim kib b'itinkur aji kesam kobirgim ma ita b'itinkur. Si onggit paemb itemb sisil kobirgim kibit ita kesam kobirgim inyowik dor pasi omnipund. Si negirjog ukoi bora emb ket pita tainy. <sup>17</sup>I kwa rigap ma opima sisil ik angjikenenanj de kesam b'angga gim ke omniki ik ga wa. Mop nokip sisil ik ita inika ik, aji kesam b'angga gim ke omniki ik ga ra ma ita warabag tawik. Si ra ton tangjikanj, itemb sisil ikit opima kesam b'angga gim ke omniki ik ga temkiny. Si ik ita tokombarik dide ket opimemb b'angga gim ke omniki ik ga daka opima negir taukanj. Aji rigap sisil ik im angjikenenanj de sisil b'angga gim ke omniki ik ga wa. Si ra odede tangjikanj, ik dide ik ga ra nimognimog b'ogil i tebnya.”

**Yesu Yairomna Ngimngai B'iga dide Kopa Kongga Esakendonj**  
(*Mak 5:21-43; Luk 8:40-56*)

<sup>18</sup>I re Yesu onggityam yit towa pilwa apureninonj, yir de, yipa Ju riga waina yir opmitenapu met wip iyena riga ikonj dide ket Yesum pilwa kumsos b'amkonj i dide ket yindonj da, “Koina ngimngai b'iga re otadejog na uj yokas. Aji ra man metket dide moina yim oramisit ti pilind, ton ita yilo okas.” <sup>19</sup>Si Yesu ket utnyitonj dide ket Yairond yimta yundokonj i daka kea Tina b'auyaena riga ton kima wuwonj. <sup>20</sup>I onggit winind yipa kongga yet re kus opekenenonj twelp (12) kemag kima, ton Yesum kak kena wikonj dide ket Tina kobirgim petir yesopayonj. <sup>21</sup>Mop nokip ton kea tina garind windonj da, “Ra kon tina kobirgim nena esopaen, kon ita b'itisakenjin.” <sup>22</sup>Yesu wip engendonj kak wa dide ket itomb kongga yir wongonj i ket womnonj da, “Ngimngai b'iga, goro gar bebig! Si moina gar ke utkundate men misakenj.” Seg odenja ket itomb kongga b'isakendonj. <sup>23</sup>I re Yesu onggit wip iyena rigamna met wa b'igaronj, Ton kea wugewuge ipaya riga dide omanayam riga bobo guglam milend yir anginonj. <sup>24</sup>Si Yesu yindonj da, “Win ewaikurina! Mop nokip itomb ngimngai b'iga re ma uj o, aji yit o weg.” Aji rigap Yesund ngong na yengeno. <sup>25</sup>I re Yesu riga bobo bau wa ewaikeninonj, Ton kea wingir wa b'igaronj rikind re ngimngai b'iga wibnonj, dide ket ngimngayind yimind wemorattonj, ngirpu ket itomb ngimngai b'iga onyitonj. <sup>26</sup>Seg ket kea onggit ngimngai b'igam gatab yidir yit warabag auka yikenonj kupka onggit eriya nata.

**Yesu Nimog Yirdidi Riga Esakendonj**

<sup>27</sup>I re Yesu itemb pipmet yiraronj dide ket menon yokatonj, nimog yirdidi rigap Tin yimta yundokonda dide ket ara yiwawonda da, “Yonggyam,

Dawidimna B'igawii! Sin kear nomne-o!" 28Ɔ re Yesu met wa b'igaronj, osiemb ji ket nimog yirdidi riga Yesum pilwa tetkonda. Si Yesu ket ten amnonj da, "Osiya win gar ke utkunda ke yokasya da Kon ririr e onggityam wiko omniken?" Ɔ osiemb ket Tin mira yomnonda da "Owi, Yonggyam." 29Ɔ odedend ket Yesu towaina yirkip asopainonj odede yit kima da, "B'ogla wa pilind rawik waina gar ke utkunda ririrind!" 30 Si Ton kea ket towaina yirkip epangkinonj. Seg Yesu ket ten danda kima nonony amnonj da, "Yir de, win goro yena wumir omna onggit gatab!" 31 Aji re ton ewaikitonda, ton kea Yesum gatab yidir yit warabag omnika yiyenonda kupka onggit eriya nata.

### Yesu Yipa Yit kesa Riga Yisakendonj

32Ɔ onggit winind re osiemb riga nimog ewaikitonda, rigap yipa negir wingawinga ke okati yit kesa riga iyo Yesum pilwa. 33Ɔ Yesu ket negir wingawinga yewaikitonj, si itemb yit kesa rigat ket yit apureninonj. Si riga bobo kea ket kid kesa aena wuwenonj odede yit kima da, "Makwa ke ngai odede mile pita awonj Israel wingirind." 34 Aji Parisai rigap ket endento da, "Ton negir wingawinga ewaikeneniny re negir wingawinga waina mopyamimna danda kae."

### Wingawinga ke Erngoka Wiko Riga Ma Jog im

35Ɔ Yesu yikenonj komkesa taun nata dide tungg nata, i Ton kea kwa towaina yir opmitenapu met nata riga ouyaena eyeninonj God ma yit, dide pumb tunggimna b'ogil yirkokar bage yit pitapita omnena yiyenonj i dide kwa kea riga isagika eyeninonj komkesa b'engabenga wip kopa ke. 36Ɔ re Yesu riga bobo yir ongong eyeninonj, Ton ma sobijog na ten gar ke kear amneninonj. Mop nokip ton wekenonj re nony bebig nat dide yig nony nat ringmim ra mamoi tekeny yir ipka riga kesa. 37 Si Ton ket Tina b'auyaena riga amninonj da, "Erngokam re jogjog im, aji wiko riga re ma jog im. 38 Si onggit paemb win erngoka Yonggyamind yigekena odede da, 'Man wiko riga etmikisine Moina erngokapu gou wa.' "

### Twelp (12) Itmikitijog Riga (Mak 3:13-19; Luk 6:12-16)

**10** 1Ɔ Yesu Tina twelp (12) b'auyaena riga ara emokinonj b'eomam, i Ton ket towa ukoi juwai akainonj negir kilkil wingawinga gou wa omnenam, nokim da idenat ton opimemb negir wingawinga teaukenenanj dide ton riga isagika teyenanj komkesa b'engabenga wip kopa wa pilke. 2 Si opimemb ji twelp (12) itmikitijog riga waina nyi, naskajog Simon yena re yogenayo da Petro, i ti yinggan Andrea, i Jebedaimna b'iga Yakobo dide ti yinggan Yoan, 3 Pilip, i Batolomeo, Toma i teks imdayam Matayo, Alpayomna b'iga Yakobo, i Tadayo, 4 Simon yena re yogenayo Kanana riga ke, i Yudas Iskariyot yet re Yesund tib yiyonj.



**Yesu Twelp (12) Itmikitijog Riga Etmikisinonj**  
(Mak 6:7-13; Luk 9:1-6)

5Ɔ Yesu opimemb twelp (12) itmikitijog riga etmikisinonj odede nonony yitkak kima da, “Goro God ma obagiki kesa riga waina nya nata tuwenim, i goro Samariya riga waina taun nata tuwenim. 6Aji win adea ta tuwenyit Israel kantrimna b'edamkuri God ma mamoi wa pilwa. 7Ra win tuwenyit, win inte pitapita omnena iyenya da, ‘Pumb tungg re ke ite ke wa wus nate ainy.’ 8Ɔ kopa riga tesakindam, i uj riga tutnikindam, i leprosi kopa riga kilkesa tamnikindam, i dide negir wingawinga teaukenindam. I win kea jabajaba onggityam yiyag wurar akatentondam, si widaka b'ogla jabajaba riga yim okaena teyenindam onggit yiyag wurar ke. 9Goro nangga wulkip na eyina waina pausond, opi re romyam i kipyam i dide ujujyam wulkip.<sup>c</sup> 10Ɔ kwa goro owou ga kima, i goro kobirgim talomam kima, i goro nimog burur yonginkak kima i dide goro kwa weweyam kutip kima. Mop nokip wiko riga re ririrkipjog riga im owou dide ninda ingaena gasa okatenam riga wa pilke. 11Ɔ ra win b'itgarkindam yipa taun wa o yipa tungg wa, demb de win odede riga na tarakindam yepiya ra ririrkipjog riga tekeny wen obai omnenam. Si win adea ton kima wimena tuwenyit, ngirpu ra ket win iwasya onggit gou ke. 12Ridenat ra win onggit met wa b'igarena tuwenyit, win b'ogla onggit metam riga b'ogil tamnenindam ngimbla yit ke. 13Ɔ rada onggit metam rigap ririrkipjog im onggityam ngimbla yit okatenam, si itemb waina ngimbla yit b'ogla omanda yebim towa pilind. Aji rada ton ma ririrkipjog riga im okatenam, si itemb waina ngimbla yit ita titenj wa pilwa. 14Ɔ yet ra maka ra simesime wen tamniny, o maka ra waina yit tutkundenanj, si win idenatemb ket onggit met o onggit taun ke iwasya. I onggit iwata winind win b'ogla waina pispamind sungar tedbenenindam towanim nony aukam da towaina negir mile b'isagikam win ita ik dem. 15Ɔ Kon iminjog wen tamninyin da ra b'isagika bibir ik dem, Sodom rigap dide Gomora rigap uko bebige okatenyi dem aji onggit taun rigap mogjog bebige okatenyi dem.

**Bebige dide B'isadrena Okatena gatab Nonony Yitkak**  
(Mak 13:9-13; Luk 21:12-17)

16“Si yir de, Kon wen etmikeninyin re odede wip im ringmim ra rigat mamoi tetmikisiny di yongg wa wingir wa. Si onggit paemb win b'ogla b'ogil multekip kima riga taukindam odede ite re girem re dide, i kwa b'ogla b'injawa kesa riga taukindam odede ite re gimai re dide. 17Si win yir kima tekenyit riga wa pilke! Mop nokip ton opima wen pumbjog Sanedrin kot wa oramka teyenanj i ton opima wen iraska teyenanj towaina yir opmitenapu met nata. 18Si rigap opima Kor map wen

<sup>c</sup> 10:9 Grik peband da “gold wulkip i silba wulkip i dide ujujyam kopa wulkip”.



igonyigony teyenanj dem de ukoi gabmani riga wa wip wa dide king wa wip wa, nokim da idenat win Kor gatab yir ungata riga taukindam towanim dide God ma obagiki kesa riga wanim. <sup>19</sup>Aji onggit winind ra rigap wen kot wa oramka teyenanj, goro win nony kubir taukindam nannga yit im win tapurenindam. Mop nokip onggit winind God opima wa tagoniny yitkak rinsim ra win b'ogla tapurenindam. <sup>20</sup>Mop nokip yit opurena riga re ma winsim, aji mera B'u Godimna Wingawingate yete re yit opurena eyeniny waina garind. <sup>21</sup>I gar ke utkunda riga wingirind opima towainajog nany o yinggan kot wa oramka teyenanj dem uj ondrikam i dide kwa ti b'uit ti b'igand. I b'igawarip opima towa b'uwar ake towa mogwar geja teyenanj dem dide ket ten uj ondrika teyenanj dem. <sup>22</sup>I kwa komkesa rigap opima wen singi kesa tamnenanj dem Koina nyi map. Aji yepiya ra mimkam wimena tuweny ngirpu ama re de onggit gowukoi kikitum win wa, ton ita okasi dem dadal ngirpu kesa yirkokar. <sup>23</sup>I ra rigap wa pilind beb'ig dide b'isadrena mile omnika teyenanj yipa taunind, si win b'ogla b'itkenindam kwa yipa taun wa. Mop nokip Kon iminjog wen tamninyin da win makwa opima komkesa Israel riga waina taun tundwasindam dem God ma b'ogil yirkokar bage yit pitapita omnena ke, ngirpu onggit winind ra Rigamna B'iga titenij dem.

<sup>24</sup>"I b'auyaena b'iga re ma ita tina ouyaena rigand igwanjis pumb wa dide kwa wiko riga re ma ita tina yonggyamind igwanjis pumb wa. <sup>25</sup>Si itemb re b'auyaena b'igam ririrkipjog e ton kupkakupka wumir okas tina ouyaena riga re dide, i dide kwa wiko rigam ririrkipjog e ton isnawa okateny odede it re tina yonggyam re dide. I Kon re Godimna metind Yonggyam e nibnyin dide win re met wiko riga im. Si rada rigap Ken nyi nogenaenyi Beeljebul kae, it re Satana, si ma sobijog nenegir nyi kaim wen daka ogenaya teyenanj.

### God nena Moga Uwadam

*(Luk 12:2-9)*

<sup>26</sup>"Si onggit paemb win goro ten moga tuwajinam, mop nokip God opima komkesa kupkakupka ikangindi gasa pita wa tapekiny dem, dide komkesa wigawiga egurki gasa wumir tamnikiny dem. <sup>27</sup>Si nannga na re Kon wa wigawiga apurenainond sibibind, win b'ogla riga wa tapurenaindam dem bibirtikind. I nannga na re win tu muma ke yipya borand utkudentondam, win b'ogla pitapita tamnenindam dem riga bajbajind. <sup>28</sup>Goro moga tuwajinam ten yepim re riga ji nena uj andrikenenanj aji ma ririr im wingawinga uj tandrikenenanj. Aji win Godind moga yuwada yama re Ti danda yibnau yipand wingawinga ake ji uj ondrikam dide ket wul tungg wa iskokam. <sup>29</sup>Si ringma, ma ma rigap nimog sobijog ngena

paib (5) Toya kaim emdenenanj?<sup>d</sup> Aji osiemb nimog ngena wingirind makwa yipa ita gou wa tisenj wa B'u Godimna ingai kesa. <sup>30</sup>Aji God re opima wen b'obogil yir ipka eyeniny, nangga ma ji da Ton kwa opima ogenka eyeniny komkesa mopngii waina mopind. <sup>31</sup>Si onggit paemb win goro moga taeninam, mop nokip win re ukoi jog isnawa kima im, aji ma ija im opi re jog jog sobijog ngena re dide.

<sup>32</sup>“Si yet ra riga wa wipind Ken pitapita notineny, Kodaka ita tin pitapita omnyin dem Kor B'u Godim wipind yete re yibim pumb tungg wa. <sup>33</sup>Aji yet ra riga wa wipind Ken oena nitieny, Kodaka ita tin oenyin dem Kor B'u Godim wipind yete re yibim pumb tungg wa.

### **Moinajog Wul B'agbag Yurowate**

*(Luk 12:51-53; 14:26-27)*

<sup>34</sup>“I win goro nony taindam da Kon riga wa ngimbla okawa mana netkond dikind onggit gowukoyind. I Kon netkond re ma ngimbla okawa mana aji geja giri ke b'ipowa mana. <sup>35</sup>Mop nokip Kon netkond re riga wingirind geja omnika mana, riga b'igat ti b'uim pilind, i todaka ngimngai b'igat ti mogim pilind, i daka kwa ti dadit moleg ti dadim pilind. <sup>36</sup>Si yipa rigam geja riga re tinajog b'ubigawar im taukanj dem. <sup>37</sup>I yet ra ukoi kana singi ieny ti b'und o ti mogind aji maka ra Ken ukoi kana singi nitieny, ton ma ririrkipjog riga e Ken yimta undokam. I daka yet ra ukoi kana singi ieny tina leo b'igand o tina ngimngai b'igand aji maka ra Ken ukoi kana singi nitieny, ton ma ririrkipjog riga e Ken yimta undokam. <sup>38</sup>I kwa yet ra maka komkesa tinajog bebig takasiny Godim wikond odede ringma ra rigat tina wul b'agbag urowas ujim dide maka ra Ken yimta nutundok, ton ma ririrkipjog riga e Ken yimta undokam. <sup>39</sup>I yet ra tilenggyam yirkokar yirgong omnika ieny, ton ita onggityam tina yirkokar dadal edamkis dem. Aji yet ra tina yirkokar edamkis Kor map, ton ita tina yirkokar yilom ominy dem.

### **God ma Wiko Riga Wanim Yim Okaena ke Mira**

*(Mak 9:41)*

<sup>40</sup>“I yet ra wen takateniny, ton Kena nokateny. I yet ra Ken notkateny, ton Tina yokateny yet re Ken nitmikitonj. <sup>41</sup>I yet ra okas yipa God ma bageyam onggit map da ton re yipa God ma bageyam e, si ton ita yipa wip mira okas onggit God ma bageyam kima. I daka yet ra okas yipa negir kesa dimdimjog riga onggit map da ton re yipa negir kesa dimdimjog riga e, si ton ita yipa wip mira okas onggit negir kesa dimdimjog riga kima. <sup>42</sup>I kwa daka yet ra yipa sobijog rigam yipa kapo nyi okau onggit Koina b'auyaena riga wa wingirind onggit map da ton re

<sup>d</sup> 10:29 Towa wingirind paib (5) Toya re yipa kip koin na, i sobijogjog wulkip na ebnawonj.

Koina b'auyaena riga e. Si Kon iminjog wen tamninyin da tina mira ma ita awir tainy dem.”

### Baptiso Yoanim gatab Yit

(Luk 7:18-35)

**11** <sup>1</sup>I re Yesu Tina twelp (12) b'auyaena riga wa pilwa nonony yit seg awonj, ton ket onggit tungg ke yiwatonj dide menon yokatenonj taun nata Galili eriya wingirind demb de riga ouyaenam dide God ma b'ogil yirkokar bage yit pitapita omnenam. <sup>2</sup>I re Baptiso Yoan sibibmetind yibnonj, ton kea yit utkundenonj nangga wiko na re Keriso amnikinonj. Si ton ket Kerisom b'arkita yit yitmikitawonj tina b'auyaena riga wa pilind. <sup>3</sup>Si inaemb ji Yoan b'arkita yoramitonj da, “Yesu! Ma man Kerisotet yet ra Godim pilke ik? O minda sin yipa b'enga riga na yir ungauku?” <sup>4</sup>I Yesu ket ten mira amnonj da, “Win eka Yoanim pilwa, i tin wumir omnenya nangga na re win utkundenya dide yir anginya, <sup>5</sup>odede mile opi re da yirdidi riga yir epangkanj, i gomgom riga menon akatenanj, i leprosi kopa riga kilkip kesa aukanj, i yipya dumtum riga utkundenanj, i uj riga utnikanj, i dide God ma b'ogil yirkokar bage yit pitapita auka yikeny gasa kesa riga wa pilwa. <sup>6</sup>Si God ma b'ogil ita ton kima yet ra onggityam Koina mile gatab yit tutkunj i ingkaemb ket ton maka sap totenj gar ke utkunda kesa mile wa.” <sup>7</sup>I re Baptiso Yoanimna bageyam rigap yiwatonda, Yesu ket Yoanim gatab yit b'atomonj riga bobo wa pilwa da, “Win nanggamog gasa na yir ongongim yoponda wul kesa tungg wa? Rika rib ma itegreni bus na? <sup>8</sup>I rada maka, si win nanggamog gasa na yir ongongim yoponda? Rika otomanti b'ogil kobirgim b'ikoki riga na? Nayi, ma opima de. Aji odede b'ogil ngindngind kobirgim b'ikoki riga wekeny re king waina met nasim. <sup>9</sup>I rada maka, si win nanggamog gasa na yir ongongim yoponda? Rika bageyam na? Owi, iminjog e. Kon wen tamninyin da ton re ukoi jog bageyam e aji ma odede e it re naskanyam bageyam re dide. <sup>10</sup>Si Yoan re onggityam riga e ya gatab e odede yina peband iriki yibim da,

‘Yir, ita Koina bageyam itmikisin dem Mor naska nya wa, yet ra Mor wip ke menon okas i Mornim menonim nya motngonjenau dem.’

<sup>11</sup>I Kon iminjog wen tamninyin da makwa ita yipa ukoi jog nyi riga odede Baptiso Yoan re dide komkesa riga wa wingirind yena re konggap ukka eyenanj. Aji yete re sobijog jog nyi riga yibim pumb tunggind, ton re ukoi jog nyi riga e aji Yoan re ma ukoi nyi riga e. <sup>12</sup>I ingkek re Baptiso Yoan wiko yotomonj ngirpu yu rigap pumb tungg okatam danda ondratena yiyeneno. Si odede nya kena onggit il onγκα rigap itemb pumb tungg yokateno. <sup>13</sup>Mop nokip komkesa bageyam waina pebap dide Mosemna gog pebap God ma bage yit pitapita omnena teito ngirpu Yoan wiko yotomonj. <sup>14</sup>Si ra win singi onggit kesam peba

ke bage yit iminjog ke takatenindam, si itemb riga Yoan re Eliyate ya gatab e re pebap yusenenyi da ton ita ik. <sup>15</sup>Si yete re man wingawinga ke yipya kima, man utkunde!

<sup>16</sup>“Aji nanggamog gasa kae Kon yipa ririrkip tamninyin riga yepim re yu wekeny onggit gowukoyind? Si ton re yipa ririrkip riga im odede ringmim ra b'iga sobijog omniki tekeny nimog bobond tungg aband, i yipa bobo b'igawarip kwa yipa bobo b'igawar yit tugwatananj <sup>17</sup>odede opurena kima da,

‘Sin pop wa pate ara epayau, aji win makwa omarkindam.

I sin pop wa nony b'uwou kima ger atangau, aji win makwa yii wuwenyit.’

<sup>18</sup>Mop nokip re Yoan ikonj, ton maka owou aweneninonj ninda riga re dide i dide maka ik anaikeninonj, si rigap ti gatab endenenanj da, ‘Ton re negir wingawinga ke okati riga e.’ <sup>19</sup>I re Rigamna B'iga ikonj, i owou aweneninonj dide ik anaikeninonj, si rigap endenenanj da, ‘Yir, Ton re oba owou riga e dide oba ik onaika riga e, i dide Ton re teks imdayam dide negir mileyam wa riga e.’ Aji komkesa wiko rinsim re Godimna multekip ke amnikenenanj, tontemb iminjogim yomnenyi da Godimna multekip re negir kesa dimdimjog e.”

### **Gar ke Utkunda kesa Riga gatab Nonony Yitkak**

*(Luk 10:13-15)*

<sup>20</sup>I Yesu ninda taun ke riga mong idngawa eyeninonj rikind re Ton jogjog kid kesa kima danda wiko omnika eyeninonj, mop nokip ton maka towaina negir mile ke engento de Godim pilwa. <sup>21</sup>Si Yesu ten amninonj da, “God ma sake man kima Korajin, i God ma sake man kima Betsaida. Mop nokip rako Kon opimemb kid kesa kima danda wiko amnikinond de negir kima Tiro taun ake Sidon taunind rina re Kon wa wingirind amnikeninonj, ton kako b'ila rongg b'ikokto dide ket wumbol kumbind omnikto negir mile ke engendam de Godim pilwa. <sup>22</sup>Aji Kon wen wumir tamninyin da ra b'isagika bibir ik dem, Tiro ake Sidon towanim ra ukoi bebig e dem, aji wanim ra dem b'usaya mogjog bebig e okasya dem. <sup>23</sup>I kwa man, Kaparnaum,

ita man wub kumb wa b'uturowasit dem? Nayi,

man ita tiglet dem de uj riga waina tungg wa.

Mop nokip rada Kon kea amnikinond kid kesa kima danda wiko rina re Kon wa wingirind amnikeninonj de Sodom taunind, itemb taun kakoa omanda yibim ngirpu yu. <sup>24</sup>Aji Kon wen wumir tamninyin da ra b'isagika bibir ik dem, Sodom gowim ra ukoi jog bebig e okas dem, aji mornim ra dem b'usaya mogjog bebig e okasit dem.”

### **Wingawinga ke Wiram Yesum pilind**

*(Luk 10:21-22)*

<sup>25</sup>I onggit winind Yesu yit pitapita amneninonj da, “Abu, wub ake gowukoyim Yonggyam! Kon siteket yit momnyin, nokip Man ke

onggityam Moina danda dide yirkokar yitkak agurkinot riga wa pilke yepim re b'ogil multekip kima dide b'ogil wumir kima wekeny. Aji Man kea onggityam Moina gasa towanim pitapita amnenainot yepim re b'iga sobijog pila wumir kesa wekeny. <sup>26</sup>Abu, iminjog e. Onggityam gasa aukonj re Moina b'ogil sam kima singi nat. <sup>27</sup>Komkesa danda dide wumir re Kor B'uit Kor mana nogoninonj ingaenam. I makwa yipa ita yete wumir B'igam gatab, aji B'uta tinta wumir. I makwa ita yete wumir B'uim gatab, aji tonpima wumir, B'iga dide riga yena re B'igat singi eyeniny B'und pita omnenam towa pilwa.

<sup>28</sup>“Si gog ouyaena rigap ma sobijog bebig kima b'ingawa im wanim aramkenenanj, si win opima dinder kima b'asowa akatenindam dide bebig urowatenindam yirkokar okatam. Si win komkesa tuyim Kor pilwa, Kon toko wa wiram rakainin. <sup>29</sup>I win ina bebig yurowata rinte re Kon wa pilind yoramitenyın wa yirkokar okawam, dide win b'auyaena tuwenyit Kor pilke, mop nokip Kon re wingawinga ke nony kima muske wimena riga en dide Kolenggyam gou wa b'amnena riga en. Si waina wingawingap ita yirkokar okasi dide ket win ita wiram odarya Kor pilind. <sup>30</sup>Mop nokip win ririr im itemb bebig sam kima okatenam rinte re Kon wa pilind yoramitenyın yirkokar okawam, dide Ken yimta undokam nya re ma bebig e.”

**Yesu re Yonggyam e Ju Riga Waina Wiram dide Yir Opmitena Bibirim**  
(Mak 2:23-28; Luk 6:1-5)

**12** <sup>1</sup>I onggit winind Yesu wit sopapu yuru nata yikonj Ju riga waina wiram dide yir opmitena bibirind. Aji Tina b'auyaena riga re owoupa na wekenonj, si ton kea ket b'atomto wit kolkak utouka dide ket kip auto. <sup>2</sup>I re Parisai rigap itemb mile yir yongo, ton Yesund yomno da, “Nangga pae Moina b'auyaena rigap onggityam mile yomniki rinte re ma yiyag e omnikam meraina wiram dide yir opmitena bibirind?” <sup>3</sup>I Yesu ten mira amninonj da, “Ma ke win yina peba yogenkonda onggit yitkak gatab rina re Dawid Mosemna gog yit yerbekonj, re ton dide ton kima meni riga owoupand wekenonj? <sup>4</sup>Si ridede na ton b'igaronj Godimna yinamet wa? I ridede na ton yina sana awinonj rina re tinim dide ton kima meni riga towanim gog na yibnonj owowim, aji yina si riga wa nena ma owou? <sup>5</sup>I kwa yina si rigap si amnikenenanj yinametind ita Ju riga waina wiram dide yir opmitena bibir weanjweanj, si odede mile kaemb ton Ju riga waina wiram dide yir opmitena bibir gog yerbekenenyi. Aji ton makwa opima b'injawa yokatenyi. Si rika win ma wumir im onggityam yitkak Mosemna gog wingirind? <sup>6</sup>Si Kon wen wumir ramninin da rigap yinamet e ukoi yomnenyi aji ita yete yibim dikind, Tonta ukoi jog. <sup>7</sup>Si ra win wumir okasya onggityam yitkak isipkita it re da, ‘Kon singi en kear mile aji ma singi en si b'angga,’ win ma rako b'injawa kesa riga negir ma

b'isagikand oramka eyenindam. <sup>8</sup>Mop nokip Rigamna B'iga re Ju riga waina wiram dide yir opmitena bibirim Yonggyam e.”

**Yesu Yim B'ikiki Riga Yisakendonj**

*(Mak 3:1-6; Luk 6:6-11)*

<sup>9</sup>I Yesu itemb pipmet yiraronj dide ket b'igaronj onggit Parisai riga waina yir opmitenapu met wa. <sup>10</sup>I demb de kea yipa yim b'ikiki kopa riga yibnonj. Si Parisai rigap Yesund yigekito da, “Rika ririrkipjog e meraina wiram dide yir opmitena bibirind kopa riga isakendam?” nokim da idenat ton Yesum ril odarai Tin kot wa oramitam. <sup>11</sup>Seg Yesu ket ten amninonj da, “Si ra wa wingirind yipa rigam yipa mamoi ibnau dide ra itemb mamoi tuny kis kip wa meraina wiram dide yir opmitena bibirind, si ringma, ma ita onggit rigat itemb mamoi oblas kip ke? <sup>12</sup>Si riga re ma sobijog ukoi jog gasa e aji mamoi re ma ukoi gasa e. Aji rada win opima mamoi b'ogil amnikenenindam meraina wiram dide yir opmitena bibirind, si onggit paemb riga b'ogil omnena mile re ririrkipjog e onggit bibirind.” <sup>13</sup>Seg re ket Yesu itemb yim b'ikiki rigand yomnonj da, “Moina yim b'itnike!” Si itemb riga ket tina yim b'itnikonj dide ket itemb tina yim kupkakupka b'isakendonj ija na it re yipa tab yim re dide. <sup>14</sup>Aji Parisai rigap ket opekto dide ket gilgil yitnono aento isamkam da, “Ridede nya kae Yesund onganju.”

**Yesu re Godimna Obagendi Wiko Riga e**

<sup>15</sup>Aji re Yesu towaina isamka gatab wumir awonj, Ton ket kea onggit pipmet ke ewaikitonj. Si jogjog riga bobop kea Tin yimta yundoko i Ton ket komkesa kopa riga esakenjinonj towaina kopa ke. <sup>16</sup>I Yesu ten nonony amninonj, nokim da idenat ton maka Tin pitapita omnenyi riga wa pilwa. <sup>17</sup>Si nangga pena Yesu odede nonony amninonj re nok mana da idenat bageyam Isayamna tugim ke opureni yitkak ririrkip ominy, it re da,

<sup>18</sup> “Yir de, itemb Koina Wiko Riga yena re Kon yobagendond,  
i yena re Kon singi yiyenyin, i ya pilwa e re Kon gar sam aenyin.  
I Kon ita Koina Wingawinga oramisin Ti pilind,  
si Ton ita Koina b'isagika mile pitapita omneny komkesa Koina  
obagiki kesa riga wa pilwa.

<sup>19</sup> I Ton ma ita yit b'ugwatena ikeny dem,  
i dide ma ita unena ikeny dem,  
si makwa ita yete Tina ukoi yit piam tutkunderny dem sobea nata.

<sup>20</sup> I Ton ma ita negir ominy yipa b'ikinti buskak,  
i Ton ma ita osowik yipa ngindngind wul dimil,  
ngirpu ra Ton towa pilind b'isagika mile omnik  
dide ket danda kima teyeniny yirkokar pipmet wa.

<sup>21</sup> I komkesa God ma obagiki kesa rigap warim b'ogil isma  
oramitenyi ra Tina nyiwim pilnate.”

### Yesu dide Beeljebul

(Mak 3:20-30; Luk 11:14-23; 12:10)

22 I onggit winind rigap yipa negir wingawinga ke okati yirdidi dide yit kesa riga iyo Yesum pilwa, si Yesu ket tin yisakendonj. Si ket itemb yit kesa rigat yit apureninonj dide yir b'iskenonj. 23 Seg komkesa riga bobop kea kid kesa aento odede yit kima da, “Ringma, ma itemb riga Yonggyam Dawidimna B'iga e?” 24 Aji re Parisai rigap onggityam yit utkundo, ton endento da, “Itemb riga ma Godimna danda kaim negir wingawinga eaukeniny aji negir wingawinga waina mopyam Beeljebulimna danda kaim.”

25 Si re Yesu towaina nonyik b'amdena wumir awonj, Ton ket ten amninonj da, “Ra yipa kantrind riga towalenggyam b'itpouranj gangga b'akalendam, itemb kantri ita negir tainy. I kwa ra yipa kantri wingirind o yipa b'ubigawar wingirind riga towalenggyam b'itpouranj, itemb kantri o b'ubigawar towaina wimena re ita negir tawik. 26 I ra Satanamna kantrind, Satana Ti wirand negir wingawinga teaukeniny, i towalenggyam b'itpouranj gangga b'akalendam, itemb tina kantri ma ririr e tonyis, aji ma pin e negir tainy. 27 I win apurenindam da Kon Beeljebulimna danda kena negir wingawinga eaukeninyin. Si daka wainajog riga wa wingirind ninda riga, ton yaina danda kaim eaukenenanj? Godimna danda kaim. Si onggit mop paimemb ton ket taukanj ra wanim b'isagika riga im onggit waina negir opurena gatab. 28 Aji ra Kon negir wingawinga teaukeninyin Godimna Wingawinga ke, si God ma pumb tungg re kemb wa pilind au. 29 O kwa ridede yipa rigat ririr e yipa danda rigamna met wa b'aturik dide tina gasa yurowam ke temjiny, ra maka ra ton naska itemb danda rigand ijobik? Aji naska ton b'ogla danda rigand ijobik i yimta kae ton ket yurowam ke temjiny tina gasa komkesa leamog im re wekeny tina metind. Si Koda re odede wip nya kae negir wingawingamna mopyam danda kesa yomnikeneny in i ingkaimemb Kon ket negir wingawinga eaukeneninyin riga wa pilke. 30 I yet ra maka Kon kima tainy, ton re Koina geja riga tab nate yibim. I kwa yet ra maka Kon kima yipand b'eomkena ikeny, ton re wetaweta omnika riga e. 31 Si onggit paemb Kon wen tamninyin da God ita komkesa negir mile dide Godind isadrena mile awir tamnikiny. Aji God ma opima Yinayina Wingawingand isadrena mile awir tamnikiny. 32 I kwa yet ra Rigamna B'igand negir yit ke ominy, God opima ti onggityam negir mile awir omnainy dem. Aji yet ra Yinayina Wingawingand isadreny, God makwa ita ti onggityam negir mile awir omnau dem yu winind dide kwa wari.

### Wul Nangg dide Tina Kip

(Luk 6:43-45)

33 “I win wul nangg b'ogil yomnika, si ingkaemb tina kip ita b'ogil tainy. O win wul nangg negir yomnika, si tina wulkip ita negir tainy.



Mop nokip wul nangg ongwatam re tina ijagendi kip kae. <sup>34</sup>Win re negir guda kima girem im, si win re negirjog nony menamena kima im wekenyit, i kwa win makwa ririr im opurenam b'ogil yitkak. Mop nokip nanggamog nony menamena im re riga waina garind yindangir wekeny, ton insima tugim ke apurenanj. <sup>35</sup>Si b'ogil rigat b'ogiljog gasa angapeneniny. I ingkaemb ton ket b'ogil mile pita wa apendeniny. I negir rigat daka tina ongapi negir gasam pilke negir mile pita wa apendeniny. <sup>36</sup>I Kon wen wumir tamninyin da ra b'isagika bibir ik dem, yipayipa rigap opima b'agenaya tuweny dem Godim wipind mira okatam towaina komkesa opureni yitkak gatab rinsim re yu ton kip kesa opurena eyenanj. <sup>37</sup>Mop nokip rada moina b'agenai yitkak re negir kesa dimdimjog e, si God ita negir kesa dimdimjog riga nyi motkau dem, i rada moina b'agenai yitkak re negirjog e, si Ton ita negir ma b'isagika motkau dem.”

### **Ju Riga waina Igekita Kid kesa kima Danda Wiko Omnikam**

*(Mak 8:11-12; Luk 11:29-32)*

<sup>38</sup>I onggit winind Ju riga waina gog ouyaena riga dide Parisai riga wingirind ninda rigap Yesund yomno da, “Ouyaena riga! Sin singi im mor pilke kid kesa kima danda wiko yir ongong.” <sup>39</sup>Si Yesu ten esmonggainonj da, “Riga yepim re yu negirjog mile i gigir dide yigyig b'iyena mile kima wekenyit onggit gowukoyind! Win nigekenya kid kesa kima danda wiko omnikam, aji Kon kid kesa kima danda wiko wa takainy in ra ina nena e rina re bageyam Yonam pilind aukonj. <sup>40</sup>Si Yona ukoijog kabum kom borand yibnonj re nowa bibir dide nowa siwiny kima na. Si onggit paemb Rigamna B'iga todaka odede yipa wip e gou borand ibim dem nowa bibir dide nowa siwiny kima. <sup>41</sup>I ra b'isagika win ik dem, Ninebe rigap opima yipand gilgil towinkanj dem win kima yepim re yu wekenyit onggit gowukoyind, i ton opima yir ungata riga taukanj dem wanim negir ma b'isagika okatam. Mop nokip re Yona God ma bage yit pitapita yomnenonj, Ninebe rigap kea towaina negir mile ke engento Godim pilwa, aji ita yipa riga yibim dikind, Ton re ukoijog e aji Yona re sobijog e. Aji win makaima Tina opurena ke engenjindam waina negir mile ke. <sup>42</sup>I ra b'isagika win ik dem, bargubo gatab ke kwina ita yipand gilgil towinyis dem win kima yepim re yu wekenyit onggit gowukoyind, i ton ita yir ungata riga tainy dem wanim negir ma b'isagika okatam. Mop nokip naskand ton tikonj re ma wuswus kantri kena Solomonimna b'ogil multekip ke yitkak utkundam, aji ita yipa riga yibim dikind, Ton re ukoijog e aji Solomon re sobijog e. Aji win makaima Tina yitkak singi eyenindam utkundam.

<sup>43</sup>“I ra negir wingawinga topenj yipa rigam pilke, ton ket b'ugumarena ikeny nyi kesa pipmet nata dide oraka iyeny wiram wimenam pipmet, aji makwa ita odar. <sup>44</sup>Si ton ket yindenya da, ‘Kon kwa ama titenjin koina



met wa rina re kon yiraren.' I ra ton titenj, ton met odar ra met tib kesa e i b'obogil isagiki e i dide b'obogil gasa ongonjeni im. <sup>45</sup>Si ton ket yikeny dide arondeniny ninda seben (7) negir wingawinga yepim re ukoi kana negir milend wekeny ti pilke, i ket ton kima yipand b'igarkanj i dide dea de wimena wuweny. Si onggit rigamna kikitumpu wa wimena re ma ija e it re naskand re dide, aji itemb re ket negirjog e yibim. Si odede yipa wip mile ita kwa tawik wa pilind yepim re yu win negirjog mile kima wekenyit onggit gowukoyind."

### **Yesumna Mog dide Yingganwar**

*(Mak 3:31-35; Luk 8:19-21)*

<sup>46</sup>I re Yesu didea riga bobo wa pilwa yit omnenand yibnonj, Ti mog dide Ti yingganwar met bau ke owinki wekenonj dide oraka yiyeno Tin yit omnenam. <sup>47</sup>Si yipa rigat Yesund wumir yomnonj da, "Yir de, Mor mog dide Mor yingganwar opima owinki wekeny bau wa i oraka e miyenyi Men yit omnenam." <sup>48</sup>Aji Yesu tin yismonggawonj yet re Tin wumir yomnonj da, "Yeto Kor mog, i yepim Kor yingganwar?" <sup>49</sup>Seg Ton ket Tina b'auyaena riga pumam etmulisinonj dide ket yindonj da, "Yir de, opimemb opi Kor mog dide Kor yingganwar. <sup>50</sup>Mop nokip yet ra mile omnika teyeniny Kor B'u ma singind yete re yibim pumb tungg wa, ton re Kor yinggan e, Kor ngimir o dide Kor mog o."

### **Tuny Igmarka Riga gatab Tendam Yit**

*(Mak 4:1-9; Luk 8:4-8)*

**13** <sup>1</sup>I itaemb onggit bibirind Yesu onggit met ke opendonj dide ket omitonj sipa yurund. <sup>2</sup>I ket jogjog riga bobo auka wuwenonj Ti pilwa, i onggit mop penaemb Ton ket yipa giga wa angitonj dide ket omitonj, aji komkesa riga bobo re sipa gate nat owinki wekenonj. <sup>3</sup>Si Yesu towa jogjog yit usenenainonj re tendam yit kena, si Ton yipa yusekonj da, "Yir, yipa wala riga tuny igmarkam yikonj sopapu wa. <sup>4</sup>I re ton tuny egmarkinonj, ninda tuny isokto nyawind, ingkek ket ngena tuwonj, i ket komkesa auto. <sup>5</sup>I kwa ninda tuny isokto gimo gou nat rikind re ma jog gou wekenonj. I odenja wanaka ikkito, mop nokip gou re bab tum nat wekenonj i dide tunyip kea wanakana pemb yokato. <sup>6</sup>Aji re ket lomkongga ilitonj, si nangg kea yarimyarim aukito, mop nokip ap re ma ririr na gimo bora wa b'igaram. <sup>7</sup>I kwa ninda tuny isokto wanjametind. Seg ket wanja wanakana owinkito, i ket kea nangg ekanginto. <sup>8</sup>I kwa ninda tuny isokto b'ogil sal gowind. Seg ton ket ikkito, i ket ton kip aukito, ninda re andred (100) kip, i ninda re siksti (60) kip, i kwa ninda tuny re teti (30) kip. <sup>9</sup>Yete re man wingawinga ke yipya kima, man utkunde!"

### **Tendam Yit Usenenam Mop**

*(Mak 4:10-12; Luk 8:9-10)*

<sup>10</sup>I b'auyaena riga tuwonj Yesum pilwa dide ket Tin yigekito da, "Nangga pae man tendam yit ke riga wa yit usenenainyit?" <sup>11</sup>Si Yesu ten

esmonggainonj da, “God kea ji pumb tungg gatab wigawiga yit wumir akainonj wanim nony aukam, aji God towa maka wumir akainonj. <sup>12</sup>Mop nokip yet ra onggityam Koina yitkak wumir okateny, God opima kwa ti b'usaya yitkak gatab wumir ogoniny, si ti ukoi jog wumir im ibnainy. Aji yet ra maka okateny, God ita awir omnau nangga mog wumir e ton yowam. <sup>13</sup>Si onggit mop paemb Kon tendam yit ke ten amneninyin da,

‘Ton yir ke yir ongong reyeninem aji goro ton wingawinga ke yir ranginem,

i kwa ton yipya ke rutkundeninem aji goro ton wingawinga ke rutkundeninem dide goro wingawinga ke nony raukinem.’

<sup>14</sup>Si yu itemb bageyam Isayamna yitkak kea ririrkip auka yikeny gar ke utkunda kesa riga wa pilind, it re yitkak da,

‘Win Godimna ara tutkundenindam, aji goro wingawinga ke nony taukindam,

i kwa win usausapyam yir ongong teyenindam, aji goro gar ke takatenindam.

<sup>15</sup>Mop nokip opimemb riga waina gar sibib ke ikangindi im wekeny,

i towaina yipya bora re idokijog im wekeny,

i towaina yirkip re osmantijog im wekeny.

Ra maka ra, ke ton wingawinga ke yir ongong reyeninem towaina yirkip ke,

i ke ton wingawinga ke rutkundeninem towaina yipya ke,

i ke ton wingawinga ke nony raukinem towaina garind

dide ket ke ton rengenjinem Kor pilwa

i dide ket ke Kon ten resakenjinin.’

<sup>16</sup>Aji waina yirkip re b'ogil omni im, mop nokip opimemb yirkip opima wingawinga ke yir ongong eyenanj. I kwa waina yipya re b'ogil omni im, mop nokip opimemb yipya opima wingawinga ke yitkak utkundenanj.

<sup>17</sup>Mop nokip Kon iminjog wen wumir tamninyin da naskand jogjog bageyam dide negir kesa dimdimjog rigap singi na aukenento yir ongongim nangga im re win yir ongong eyenindam, aji ton maka yir ongong eyento. I kwa ton singi aukenento utkundam nangga im re win utkundena eyenindam, aji ton maka utkundenento.

### **Tuny Igmarka Riga gatab Tendam Yit Isipkena**

*(Mak 4:13-20; Luk 8:11-15)*

<sup>18</sup>“Si onggit paemb win ket utkundena nangga ma onggit tuny igmarka riga gatab tendam yitit isipkis. <sup>19</sup>Si intemb ji isipkita rina re tuny igmarkito nyawind. Si yete re pumb tungg gatab yitkak utkunderny aji maka ra ton nony tawik, si negirjogyam Satana ik dide isamburiny nanggamog yitkak na re tina garind wekeny. <sup>20</sup>I opi re ji gimo gowind isokto re intemb ji riga yisipkis yete re God ma bage yit utkunderny dide

odenja ket itemb yitkak sam kima yokateny. <sup>21</sup>Aji ton makaya ngor wa ap b'amka yikeny onggit God ma yitkakim pilind aji ton sobijogjog gangga nate itemb yitkak gar ke yokateny. Aji daka ra God ma yitkak map negir ma b'atonkena mile i bebig dide b'isadrena mile pita taukanj, ton odenja e ket sap totenj dide ket itemb God ma yitkak irar. <sup>22</sup>I opi re ji wanjametind isokto re intemb ji riga yisipkis yete re God ma bage yit utkunderny, aji ti gowukoi yirkokar singind ukoi jog nony menamena amnikeneniny, i jogjog gasa singind b'anyginena sam yokateny, i dide kwa ninda gowukoi gasa wa singi aukeneny tina garind. Si tonsimemb God ma yitkak yikangindeniyi. Si onggit paemb ket maka God ma yitkak kip ijagik ti pilind. <sup>23</sup>I opi re ji b'ogil sal gowind isokto re intemb ji riga yisipkis yete re God ma bage yit utkunderny dide ket nony awik. Si onggit paemb ket God ma yitkak kip ijagik ti pilind, yipa re andred (100) kip, i yipa re siksti (60) kip, i dide yipa re teti (30) kip.”

### Sopapund Ngii gatab Tendam Yit

<sup>24</sup>I Yesu ket kwa yipa tendam yit towa usekawonj da, “Si pumb tungg re yipa wip e odede riga kima yet re b'ogil tuny itot eyeninonj tina sopapund. <sup>25</sup>I re komkesa riga yutungand wekenonj, yipa ti geja riga ikonj de sopapu wa dide ket ngii itot eyeninonj onggit iti tuny ganggand, seg ton ket dea ta yikonj. <sup>26</sup>I onggit winind re ket tuny pok ikkito dide ket kip kima aukito, si todaka kea ngii ikkito dide purag aukito. <sup>27</sup>Si onggit yonggyamimna wiko rigap tuwonj ti pilwa dide ket yigekito da, ‘Yonggyam! Ma man pop b'ogil tuny nena na itot eyeninot moina sopapu wa? Si ringkaimta daka ngii wuweny?’ <sup>28</sup>Si ton esmonggainonj da, ‘Geja rigat odede mile yomnikonj.’ I tina wiko rigap ket tin yigekito da, ‘Si man singi et sin demb de wuyin sopapu wa dide ket opimemb ngii turomkindam?’ <sup>29</sup>I todaka esmonggainonj da, ‘Ka, goro. Mop nokip ra win ngii turomkindam, ke win yipand owou nangg ngii kima uromka eyenina dor. <sup>30</sup>Si nangga ma ji toko nimognimog gilgil rowinkine ngirpu ra erngoka win okas. I ra erngoka win ik, Kon toko erngoka riga wumir ramninin dem da, “Naska win ngii na turomkindam dide supsup tamnikindam wul wa imbrikam. Aji onggit kak kaemb win ket owoukip bobo tamnikindam dide ket koina owou ongapapu met b'iga wa taramkindam’.”

### Mastad Tuny gatab Tendam Yit

(Mak 4:30-32; Luk 13:18-19)

<sup>31</sup>I Yesu ket kwa yipa tendam yit towa usekawonj da, “Si pumb tungg re yipa wip e odede mastad tuny kima rina re yipa rigat yokatonj dide ket yitlitonj tina ingkind. <sup>32</sup>Si mastad tuny re tina sopapu wingirind sobijogjog kip na yibnonj komkesa tuny wa pilke. Aji re nangg inika

yikonj, itemb mastad nangg ket ukoijog aukonj komkesa nangg wingirind onggit sopapund. Si ket wul pila onyitonj dide ket pumbind ngena wuwenonj, ngirpu ton ket onggit wul bia kumb nata towaina met orangka eyento.”

### **Yist gatab Tendam Yit**

*(Luk 13:20-21)*

<sup>33</sup>I Ton ket kwa yipa tendam yit towa usekawonj da, “Si pumb tungg re yipa wip e odede yist kima rina re yipa konggat yokatonj dide ket yipa ukoi baiko plawa kima yimikonj dampam, ngirpu kupkakupka dampa yinikonj dide yudburenonj.”

### **Yesu Tendam Yit nena Engaeninonj**

*(Mak 4:33-34)*

<sup>34</sup>Si Yesu opimemb komkesa yitkak usenena eyenawainonj riga bobo wa re tendam yit kena, aji makwa ke Ton towa usenenainonj tendam kesa. <sup>35</sup>Si nangga pena Yesu odede tendam yit nena ke amneninonj re nok mana da idenat yipa bageyamimna opureni yitkak ririrkip tainy, it re da,

“Kon ita Koina tugim ipangenjin tendam yit opurenem,  
i Kon opima gasa pita wa tapekinyin rinsim re onggit gowukoi  
otomapu ke wumir kesa egurki wekeneny.”

### **Yesumna Isipkita Sopapund Ngii gatab Tendam Yit**

<sup>36</sup>I re Yesu yit usenena seg awonj, Ton ket riga bobo erarinonj dide ket yikonj met wa. I Tina b'auyaena riga tuwonj Ti pilwa dide ket yomno da, “Be man sowa yisipkene sopapund ngii gatab tendam yit!” <sup>37</sup>Si Yesu esmonggainonj da, “Riga yet re b'ogil tuny egmarkinonj re Rigamna B'igat. <sup>38</sup>I sopapu re gowukoi e, i opimemb b'ogil tuny re pumb tunggimna b'igawar im. Aji ngii re negirjog riga Satanamna b'igawar im. <sup>39</sup>I itemb geja riga yet re ngii itot eyeninonj re Negir Wingawinga Satanate. I kwa erngoka win re gowukoi kikitum b'isagika win e, dide erngoka riga re God ma aneru im. <sup>40</sup>Si opi re erngoka winind wiko rigap ngii uromka eyento dide ket wul wa embrikto. Si ija imemb ji mile taukanj dem gowukoi kikitum b'isagika winind. <sup>41</sup>Si onggit winind Rigamna B'igat opima Tina aneru tetmikeniny dem Tina pumb tungg wa rinte re Ton wip yomneny onggit gowukoyind, i ket onggit anerup onggit Tina pumb tungg ke odede riga im itkoka teyenanj dem yepim re riga negir mile omnïkam amnenanj dide negirjog mile omnïka eyenanj. <sup>42</sup>Seg anerup ket ten teskokanj dem de ukoi wul dimil kima kap wa. Si opimemb riga re amimemb de yii kamil b'iyowa tuweny dem, dide kopa b'angnena kima or b'iinika tuweny dem. <sup>43</sup>Aji onggit winind daka negir kesa dimdimjog riga wui dem de towa B'u

God ma pumb tungg wa, dide ket b'atnyoratenanj dem lomkongga re dide. Si yete re man wingawinga ke yipya kima, man utkunde!

#### **B'ogiljog Ongapi Gasa dide Ngindngind Timtim Jag gatab Tendam Yit**

44 “I pumb tungg re yipa wip e odede b'ogiljog ongapi gasa kima rina re yipa sopapund gou bora wa eungiti yibnonj. Si re yipa rigat itemb b'ogiljog gasa yodaronj, si ton kea kwa yeungitonj gou bora wa dide ket sam kima yikonj tina met wa. Seg ton ket tina komkesa gasa asogikinonj dide ket onggit osogi wulkip ke itemb gou kipol yokatonj.

45 “I kwa pumb tungg re yipa wip e odede gasa osoga riga kima yet re b'ogil ngindngind timtim jag oraka eyeninonj imdam. 46 Si re ton yipa ukoijog mira kima b'ogiljog ngindngind timtim jag yodaronj, ton ket yikonj tina met wa dide ket tina komkesa gasa asogikinonj. Seg ton ket onggit osogi wulkip ke itemb b'ogiljog ngindngind timtim jag yokatonj.

#### **Gir gatab Tendam Yit**

47 “I kwa b'usaya pumb tungg re yipa wip e odede gir kima rina re rigap sipa wa b'isko dide ket komkesa b'engabenga wip kabum emjinonj. 48 Si re itemb gir yindangir awonj, kabum wiko rigap ket itemb gir yirginato sipa gate wa dide ket omnikto. Seg re ton isagika eyento, ton kea b'ogilyam kabum yipa ga wa egarkito aji negiryam kabum dea ta eskokto. 49 I ija imemb ji mile taukanj dem gowukoi kikitum b'isagika winind. Si Godimna aneru opima tui dem onggit gowukoi wa dide ket negir kesa dimdimjog riga wa wingir ke negirjog riga wetaweta tamnikanj dem. 50 Seg anerup ket ten teskokanj dem de ukoi wul dimil kima kap wa. Si opimemb riga amimemb de yii kamil b'iyowa tuweny dem, dide kopa b'angnena kima or b'iinika tuweny dem.”

#### **Sisil dide Kesam Iminjog Yitkak gatab Tendam Yit**

51 “Si Yesu Tina b'auyaena riga egekisinonj da, ‘Si ke win nony aukindam onggityam komkesa yitkak gatab?’ ” I ton ket yismonggawo da “Owi.” 52 I Ton ket ten amninonj da, “Si onggit paemb komkesa God ma gog ouyaena riga yepiya re Kor pilke b'auyaena wuwenonj pumb tunggim wiko omnikam, ton re odede met yonggyam pila riga im yet ra tina b'ogiljog gasa ongapapu kok ke sisil gasa dide kesam gasa tapekinj riga wa ogonam. Si ton opima Godimna yina peba ke sisil iminjog yitkak dide kesam iminjog yitkak apekanj riga wa ogonam.”

#### **Tinajog Tungg Rigap Yesund Yisayo**

*(Mak 6:1-6; Luk 4:16-30)*

53 I re Yesu onggityam komkesa tendam yit usenena seg awonj, Ton ket onggit pipmet ke ewaikitonj. 54 I Ton ket yikonj Tinajog tungg wa, dide

ket riga ouyaena eyeninonj towaina yir opmitenapu metind. I onggit winind opimemb riga kid kesa na aena wuwenonj dide ket endento da, “Ringkaim onggit rigat odede b'ogil multekip dide odede kid kesa kima danda emjionj?” <sup>55</sup>Ma itemb riga met oranga rigamna b'iga e? Ma ma Mariyato Ti mog? I ma ma Ti yingganwar im Yakobo, Yosep, Simon, dide Yudas? <sup>56</sup>Ma ma komkesa Tina ngimwarwar indamima men kima wekeny? Si onggit paemb ringkaim onggit rigat onggityam komkesa gasa emjionj?” <sup>57</sup>Si ingkenaemb ket rigap Yesund isnawa kesa yomneno. Si ket Yesu ten amninonj da, “Rigap Godimna bageyam ita yisnaenenyi komkesa gatab nata, aji tinajog tungg rigap dide tinajog metam rigap ma ita tin yisnaenenyi”. <sup>58</sup>Si Ton demb de maka jogjog kid kesa kima danda wiko amnikinonj, nokip rigap maka Tin gar ke utkunda ke yokato.

### Baptiso Yoanimna Uj gatab Yit

(Mak 6:14-29; Luk 9:7-9)

**14** <sup>1</sup>I onggit winind king Erod<sup>e</sup> kea Yesum gatab yidir utkundonj. <sup>2</sup>Si ton tina wiko riga amninonj da, “Itemb Riga re Baptiso Yoante. Si itemb riga Yoan kea uj ke utnyitonj. Si onggit mop paemb Yoanimna kid kesa kima dandate wiko omnika yiyeny itemb riga Yesum pilind.” <sup>3-4</sup>Si itemb ji yit rija na re naskand Baptiso Yoan uj awonj. Si re king Erod ti yinggan Pilipimna kongga Erodiyand wokatonj ti konggam, si Yoan king Erodind yommenonj da, “Itemb re ma b'ogil mile emb ji, man itomb kongga mor konggam womnyit.” Si onggit penaemb ket king Erod Yoanind yimind yusunatonj dide yijobikonj i ket sibibmet wa yoramitonj ti kongga Erodiyand nony b'ogil omnam. <sup>5</sup>I king Erod singi na Yoanind ongandam, aji ton riga bobo na moga uwajinonj. Mop nokip rigap Yoanind yipa bageyam kena yogenaeneno. <sup>6</sup>I re king Erodimna ukendipu bibir awonj, Erodiyamna ngimngai b'iga ger omarkonj ingauki riga wa wipind. Si tina omarkat Erodind ma sobijog na samim yomnonj. <sup>7</sup>Ngirpu ket king Erod itomb ngimngayim danda kima tirir yit wopulitawonj da, “Kon ita motkaen nangga mana ra man nitgekisit.” <sup>8</sup>I itomb ngimngai ti mogimna yit itai ririr nat Erodind yigekitonj da, “Be man kor otade nokae Baptiso Yoanimna moptekip yipa pleto kumbind!” <sup>9</sup>Seg king Erod ma sobijog na gar bebig awonj. Aji ton ma ririr na awonj ngimngai ma b'arkita b'isayam, nokip ton naskand ke danda kima tirir yit wokawonj dide kwa tina ingauki riga yir map yepiya re diyamdiyampund wekenonj. Si ton kea b'ingawa yoramitonj Yoanimna moptekip ngimngayim okawam. <sup>10</sup>I ton ket tina yir ipka geja riga yitmikitonj dide itemb geja rigat Yoanind mop yependonj sibibmetind.

<sup>e</sup> 14:1 Dikind king Erod re Erod Antipate yete re ukoyam king Erodimna b'iga. Ton ti b'uim pilke akatonj Galili eriya dide Peraya eriya wip iyenam.

11 Seg ket ton Yoanimna moptekip iyonj pleto kumbind dide ket itomb ngimngai b'igam wokawonj. I ngimngayit daka ket yiyonj ti mogim pilwa. 12 Si Yoanimna b'auyaena rigap ket Yoanimna ujugim yopo dide ket yurowato, ngirpu ket gop wa yeungito. Seg ket ton wuwonj Yesum pilwa dide ket Tin wumir yomno Yoanimna uj gatab.

**Yesu Paib Tausin (5,000) Riga Angeninonj**  
(Mak 6:30-44; Luk 9:10-17; Yoan 6:1-14)

13 I re Yesu Yoanim gatab yit utkundonj, si Ton giga nya Tinta yikonj dea ta yipa wul kesa tungg gatab wa. I daka re riga bobop utkundeno Tina menon gatab, ton kea towaina taun erarento dide ket gil nya Tin yimta undoka yiyo 14 I re Yesu giga ke opendonj, Ton kea ukoi riga bobo yir anginonj. I Ton ten gar ke kear amninonj. Si Ton kea ket kopa riga esakenjinonj. 15 I re ket si imoka ikonj, b'auyaena riga Yesum pilwa tuwonj dide ket Tin yomno da, "Itemb tungg re wul kesa tungg e, dide bibir win re kea awir ainy. Si man riga bobo etmikenine, nokim da idenat ton tuweny ninda tungg nata dide ket towanim owou imda teyenanj." 16 Aji Yesu ten esmonggainonj da, "Ton ma ita menon okasi. Si winpiya towa owou agoninam." 17 Aji ton mira yomno da, "Sowa insima dikind paib (5) sana nganja dide nimog kabum nena wekeny." 18 Seg Yesu ten amninonj da, "Opimemb owou teyinam Kor pilwa!" 19 I Yesu riga bobo engainonj tib kumbind omitam diyam awowim. Seg ket Yesu opimemb paib (5) sana nganja dide nimog kabum akasinonj, i ket wub pumb wa yir yikenonj dide ket Godind siteket yit yomnonj. Ngirpu Ton ket sana nganja epkikinonj i ket Tina b'auyaena riga wa pilwa agoninonj. Seg ket b'auyaena rigap riga bobo wa ogona eyento. 20 I ton komkesa riga diyam auto dide kea ngor aukito. Seg ket b'auyaena rigap riga wa pilke owou komb akatto dide aramkito watind, ngirpu twelp (12) wat yindangir aukito. 21 Komkesa yepiya re rigajog diyam aukito re ama rika paib tausin (5,000) na. Aji kongga dide b'iga maka agenkitu.

**Yesu Sipa Nyi Tumind Yikonj**  
(Mak 6:45-56; Yoan 6:15-21)

22 Seg ket odenja Yesu Tina b'auyaena riga engainonj giga wa angurkam dide naskanaska menonim sipa yipa tab wa. I onggit ganggand re Tina b'auyaena rigap giga wa angurkito menonim tab wa, Yesu ket Tilenggyam riga bobo wetaweta amnikinonj. 23 I re Yesu riga bobo wetaweta omnika seg amninonj, Ton yiwatonj yipa sukak wa Tinta yir opmitam. Si re si yimokonj, Yesu adea de Tinta yibnonj. 24 Aji giga re kea gil ke ma wus na yibnonj i sipa wurop giga ma sobijog na oskandena yiyo dide rib daka giga wipwip na yikenonj. 25 I ket ispara momtand, siwiny tri (3) i siks (6) kilok ganggand, Yesu pis nya towa pilwa yikonj sipa



nyi tumind. <sup>26</sup>Aji re ton b'auyaena rigap Tin yir yongo Tina menonind sipa nyi tumind, ton ukoi jog moga na aukito dide endento da, "Itemb re kobir e." Si ton kea moga map b'okta irere aukito. <sup>27</sup>Aji odenja Yesu ten amninonj da, "Kid seseo ainam! Konten, goro moga tainam!" <sup>28</sup>Si Petro Yesund yomnonj da, "Yonggyam! Rada Mantet, ken ningae menonim Mor pilwa nyi tumind." <sup>29</sup>I Yesu yomnonj da "Metkim!" I ket Petro giga ke opendonj sipa nyi wa dide pis nya nyi tumind yikonj Yesum pilwa. <sup>30</sup>Aji re Petro ukoi danda kima rib yir iyonj, ton kea moga awonj dide ket nyi bora wa sisil itwa yikonj. Si ton ket b'okta ara yikenonj da, "Yonggyam! Yim nokae, nopende!" <sup>31</sup>Si odenja ket Yesu yim b'itnikonj dide ket tin yemoratonj. Seg ket tin yomnonj da, "Utkunda kesa riga! Nangga pae man maka gar ke utkunda ke nokasit da Kon ririr en men ingawam nyi tumind menonim." <sup>32</sup>I re ton giga wa angitonda, si rib daka kea ket mumakesa awonj. <sup>33</sup>Seg yepiya re wekenonj onggit giga kumbind, ton ket Yesund kumsos yemko odede yit kima da, "Iminjog e, Man re Godimna B'iga et."

<sup>34</sup>I re ton ijendo sipa tab wa, ton ket gil ipkito de Genesaret gou wa. <sup>35</sup>I re ket onggit tunggam rigap Yesund yongwato, ton kea ket yit etmikento komkesa tungg nata onggit eriya wingirind. Seg ket rigap komkesa negir kopa kima riga eyento Yesum pilwa. <sup>36</sup>I ton ket Yesund erkena yiyeno, nokim da idenat kopa rigap Tina kobirgim petir esopaya iyenyi. I komkesa riga yepiya re yesopayo, ton kea ket b'ogil aukito.

### Ju Riga Waina Kesam Dad ke B'isateni Mile

(Mak 7:1-13)

**15** <sup>1</sup>I onggit winind Parisai riga dide Ju riga waina gog ouyaena riga Yesum pilwa tuwonj Yerusalem taun ke dide ket yigekito da, <sup>2</sup>"Nangga paim Moina b'auyaena rigap elda riga waina dad ke b'isateni mile erbeka eyenanj? Mop nokip opi re ton owou awenenanj, ton ma opima naska yim b'isekenenanj." <sup>3</sup>Si Yesu ket ten mira amninonj da, "Si widaka nangga pae God ma b'ingawa yit yerbekenanya waina dad ke b'isateni mile yimta undoka map? <sup>4</sup>Mop nokip God yindonj da, 'Mor b'u ake mor mog esnae,' i kwa yindonj da, 'Yet ra b'uim pilwa o mogim pilwa negir yit opulis, ton ita iminjog uj ondriki ibim.' <sup>5</sup>Aji win dad ke b'isateni yit ke endenindam da, 'Yipa rigat b'ogla ti b'uim pilwa o ti mogim pilwa indeny da, "Kon pop men gasa wulpok momnikeneny, aji kon ma ita motkaen aji God ma okaen.'" <sup>6</sup>I ra ton odede mile omnik, ton ririr e ti b'und isnawa kesa omnikeneny i ti mogind isnawa kesa tomnikeneny. Si win odede waina dad ke b'isateni mile kae God ma yitkak awir yomnikenenya. <sup>7</sup>Win, gim ke b'ogil aji ngor wa negir mile riga, bageyam Isaya iminjog b'ogil bage yit na yopulitonj wa gatab da,

<sup>8</sup>'Onggit rigap Ken nisnaenenyi towaina tugim nena kae,



aji towaina nony menamena re ma wus nasim Kor pilke wekeny.  
 9 I ra ton God ma yit tauyaenenanj,  
 ton riga waina omniki gog kaim riga auyaenenanj.  
 Si onggit paemb ton jabakipind nony kesa kana im dide mogji kesa  
 im Kor pilwa yir opmitenenanj.’ ”

**Riga Kilkil Omnika Gasa gatab Yit**  
*(Mak 7:14-23)*

10 I seg ket Yesu riga bobo ara yemokonj dide ten amninonj da, “Win nutkunda! I wumir yokata! 11 Makwa ita yipa gasat rigand kil kima ominy rinte re bau ke yik rigam tu bora wa, aji onggit gasate rinte re rigam tu bora ke opek, si tontemb ji onggit rigand kil kima yomnik.” 12 I odedend ket daka b'auyaena riga Yesum pilwa tuwonj dide ket Tin yomno da, “Ke Man wumir aet da re Parisai rigap onggityam Moina yit utkundenyi, ton kea komliu aukanj Mor gatab.” 13 Aji Yesu ten esmonggainonj da, “Kor B'u yete re pumb tungg wa yibim, Ton opima ap kima turomkiny dem komkesa wul nangg rina re Ton maka esinonj. 14 Yebikau, waken! Opimemb riga re yirdidi riga im aji ton kwa yirdidi riga im wang eyenanj. Si ra yirdidi rigat yirdidi rigand wang yii, ton osiya nimognimog kip wa tiglansya.” 15 I ket Petro Yesund yigekitonj da, “Be man sowa yisipkene onggityam tendam yit.” 16 Aji Yesu todaka egekisinonj da, “Ma widaka makaima ngai wumir aukindam? 17 Ma win ma wumir im da komkesa gasa rinsim re bau ke wui de tu bora wa, ton opima wui de kom bora wa, i daka ket ton bau wa topekanj de sobijog met wa b'iskokam. 18 Aji gasa rinsim re opekanj tugim ke, ton re kid kaim wuweny, tonpimemb ji onggit rigand kil kima yomniki. 19 Mop nokip kid ke re odede mile im wuweny, opi re negirjog nonyik b'amdena mile, onganda mile, gigir dide yigyig b'iyena mile, negir b'iyena mile, yurowam mile, riga gatab yir ungati kesa b'anyginena yit useka mile i dide isadrena mile. 20 Si odede milepimemb riga kil kima amnikenenanj, aji b'iseka mile omni kesa yim ke owowim re ma opima riga kil kima tamnikiny.”

**Yipa Kanaan Tunggam Konggamna Gar ke Utkunda gatab Yit**  
*(Mak 7:24-30)*

21 I re Yesu itemb pipmet yiraronj, Ton ket yiwatonj Tiro ake Sidon eriya wa. 22 Seg yipa Kanaan tunggam kongga tikonj onggit eriya ke dide ket b'okta obailitonj da, “Yonggyam, Dawidim B'iga! Kear nomne-o! Koina ngimngai b'iga negir wingawinga ke okati o wibim dide negirjog win nato wibim.” 23 Aji Yesu makwa yit wismonggawonj. Si Tina b'auyaena riga tuwonj dide ket iror ipka yiyo da, “Man wanaka tina singi wundwatae, dide ket titmikisit, nokip ton ita obairena tik mera

yimtayimta.”<sup>24</sup> Seg Yesu esmonggainonj da, “God nitmikitonj re Israel riga wingirind b'edamkuri mamoi wa pilwa nena mana.”<sup>25</sup> Aji itomb kongga tikonj Yesum pilwa dide ket kumsos b'amkonj Ti pilwa odede yit kima da, “Yonggyam! Yim nokae!”<sup>26</sup> Aji Yesu wismonggawonj da, “Itemb re ma b'ogil mile e b'iga waina sana isatam dide yongg wa b'iskokam.”<sup>f</sup>  
<sup>27</sup>Aji daka konggat Yesund yomnonj da, “Iminjog e, Yonggyam! Aji yonggip sobijogsobijog sana kib awenenanj rinsim re yongg b'uwamip towa yongg wa eskokaenenanj owoupu kasa kumb ke.”<sup>28</sup> Seg Yesu ket itomb konggand womnonj da, “Kongga! Moina gar ke utkunda re ma sobijog danda e. Si moina singi ririrind rawik!” Ngirpu ket itomb konggamna ngimngai b'iga onggit winjogind b'isakendonj.

### Yesu Jogjog Kopa Riga Esakenjinonj

<sup>29</sup>I Yesu onggit pipmet ke ewaikitonj dide ket yikonj Galili sipa yuru nata. I ingkenaemb Ton ket sukak wa yikonj dide ket ademb de omitonj.  
<sup>30</sup>I jogjog riga bobop ton kima eyento gomgom riga, yirdidi riga, pis b'ikiki riga, yipya dum dum riga, i dide kwa jogjog kopa riga, dide ket Yesum pilwa tuwonj. I re ket ton opimemb kopa riga oramka eyento Yesum wus wa, si Ton kea ket ten esakenjinonj.  
<sup>31</sup>I yit kesa rigap yit apurento, i pis b'ikiki rigap b'obogil pis b'amdena wuwenonj, i gomgom rigap menon yokateno, i dide yirdidi rigap yir b'iskena wuwenonj. Si komkesa riga yepiya re wekenonj dikind, ton kea yir angto opimemb komkesa mile. Seg ton ket ma sobijog na kid kesa aento dide ket Israel riga waina God esourena yiyeno.

### Yesu Powa Tausin (4,000) Riga Angeninonj

*(Mak 8:1-10)*

<sup>32</sup>I Yesu Tina b'auyaena riga ara emokinonj dide ket ten amninonj da, “Kon riga bobo im kear amninyin, nokip ke nowa bibir im Kon kima wekeny, si kea towa awir im kwa nangga im owowim ebnainy. Kon ma singi en ten owoupa itmikitam. Nokip rada Kon ten tetmikeninyin owoupa kima, nyawind ke owoupat kak ijga reyin.”<sup>33</sup> Seg Tina b'auyaena rigap Tin yomno da, “Si ringkaim men odede pis owou tadarkindam onggit wul kesa tunggind odede riga bobo ngor omnikam?”<sup>34</sup> I Yesu ket ten arkisinonj da, “Leamog sana nganja im win awamindam?” I ton mira yomno da, “Seben (7) nganja im dide ninda sobijog kabum.”<sup>35</sup> I ket Yesu riga bobo engainonj omitam gowind.  
<sup>36</sup> Seg ket Ton opimemb seben (7) sana nganja dide ninda kabum akasinonj dide Godind siteket yit yomnonj, ngirpu epkikinonj dide Tina b'auyaena riga wa agoninonj

<sup>f</sup> 15:26 Onggit winind Ju rigap God ma obagiki kesa riga gatab yit amnikenento da, “Win ma Abraam ma b'iga im aji win ija im ji kil kima yongg re dide.”

riga wa yingg iyenam. I ket b'auyaena rigap onggit riga bobo wa yingg eyenauto. <sup>37</sup>Si komkesa rigap auto dide ton kea ket ngor aukito. Seg re b'auyaena rigap riga wa pilke sana komb dide kabum komb akatto, seben (7) ukoi ga na komb owou ke yindangir amnito. <sup>38</sup>I komkesa rigajog yepiya re diyam auto re powa tausin (4,000) na. Aji kongga dide b'iga maka agenkito. <sup>39</sup>I re Yesu riga bobo wetaweta amnikinonj, Ton ket giga wa angitonj dide ket yikonj de Magadan<sup>s</sup> eriya wa.

**Ju Riga Waina Igekita Kid kesa kima Danda Wiko Omnikam**  
(Mak 8:11-13; Luk 12:54-56)

**16** <sup>1</sup>I Parisai riga dide Sadukai riga tuwonj Yesum pilwa dide ket singi aukito Tin otonkenam. Si ton ket Tin yigekeno towa ouyawam kid kesa kima danda wiko rinte ra God imjas da Ton re Godim pilkae. <sup>2</sup>Aji Yesu ten mira amninonj da, “I ra simana lom ipanjika yik, win tendenindam da, ‘Mep wub b'ogiljog e ibim, nokip wub kus re mog e.’ <sup>3</sup>I daka sitawarind win tendenindam da, ‘Yu ita piro ik, nokip wub re kea kuskus dide timtim e awik.’ Si ra win wubind gasa yir ongong teyenindam, win ita naska kana wumir okatenya da wub ridede wip e ibim. Aji nangga paim win maka naska kana wumir yokatenya win ongwatenam mile gatab da ridede wip win e ik? <sup>4</sup>Si riga yepim re yu negirjog mile i gigir dide yigyig b'iyena mile kima wekenyit onggit gowukoyind, win nigekenya kid kesa kima danda wiko omnikam, aji Kon kid kesa kima danda wiko wa takainyin ra ina nena e rina re bageyam Yonam pilind aukonj.” I ket yit seg ke Yesu opimemb riga erarinonj dide ket yiwatonj.

**Parisai Riga dide Sadukai Riga Waina Yist**  
(Mak 8:14-21)

<sup>5</sup>I re Yesu Tina b'auyaena riga kima sipa ijendo de yipa tab wa, b'auyaena rigap nony b'edatto ninda owou iyoyim. <sup>6</sup>I Yesu ten nonony amninonj da, “Win nony kima tekenyit! Dide win yir kima tekenyit Parisai riga ake Sadukai riga waina yistim!”<sup>h</sup> <sup>7</sup>Aji b'auyaena rigap maka wumir aukito Yesu ma yit mop. Si ton towalenggyam b'arkena wuwenonj da, “Ton nok pae odede yinj nokip men maka owou teyindam.” <sup>8</sup>Si Yesu kea towaina b'arkena gatab wumir awonj, i ket ten amninonj da, “Utkunda kesa riga! Nangga mim win b'arkena wuwenyit wa wingirind da wa owou awir im? <sup>9</sup>Makaima win wumir aindam nangga ma Kon nindenyin? Ma win ma opima nonyind eyenindam da re Kon paib (5) sana nganja ke paib tausin (5,000) riga angeninond, si win owou komb ke

---

<sup>s</sup> 15:39 Ninda Grik peband da “Magdala”. <sup>h</sup> 16:6 Yist re plawa inika gasa e. I rigap yist yoramitenenyi bred ogna ma.

leamog wat na yindangir amniktondam? <sup>10</sup>I kwa win ma opima nonyind eyenindam da re Kon seben (7) sana nganja ke powa tausin (4,000) riga angeninond, si win owou komb ke leamog ukoi ga na yindangir amniktondam? <sup>11</sup>Ridede paim win maka nony aukindam da Kon ma owou gatab mim wen nonony amneninyin? Aji win yir kima tekenyit Parisai riga ake Sadukai riga waina yist pila ouyaena gatab.” <sup>12</sup>Si Yesumna onggit opurena kena Tina b'auyaena rigap nony aukito da Ton ma owou gatab mana nonony nomneniny aji Parisai riga ake Sadukai riga waina ouyaena gatab mana.

**Petromna Gar ke Utkunda gatab B'agenaya Yit**  
(Mak 8:27-30; Luk 9:18-21)

<sup>13</sup>I re Yesu ikonj de Kaisareya Pilipo eriya wa, Ton Tina b'auyaena riga arkisinonj da, “Yena rigap yomnikenenyi da yete Rigamna B'iga?” <sup>14</sup>Si ton mira yomno da, “Ninda rigap endenenanj da Man Baptiso Yoantet, i nindap da Man Eliyatet, i kwa nindap da Man Yeremiyatet o yipa God ma bageyamtet kesam yina peba wingirind.” <sup>15</sup>Seg Yesu ten kwa arkisinonj da, “Aji widaka ringmim? Win yena yomnikenenyi da yeten Kon?” <sup>16</sup>Petro mira yomnonj da, “Man re Kerisotet<sup>t</sup> yete re yilo Godimna B'iga.” <sup>17</sup>Si Yesu Petronj yismonggawonj da, “Yonamna b'iga Simon, man re b'ogil omni riga et. Mop nokip ma gim ke rigate yete re mi dide kus kima yibim onggit gowukoyind, tonte mor wumir pitapita momnau onggityam gar ke utkunda gatab, aji Kor B'ute yete re yibim de pumb tungg wa. <sup>18</sup>I Kon kwa men wumir motinyin da Man re Petrotet. I man kea b'agenayet da Kon re Kerisoten. Si itemb moina opuliti re kila pila danda kima met orangapu pipmet e. I Kon onggit kila kumb nate Koina sosi orangen dem, si ujimna dandap rinsim re uj riga waina tunggind wekeny, ton makwa ririr e itemb sosi gou wa omnenyi dem. <sup>19</sup>Si Kon pumb tunggimna ki motkainyint rinte re God wip yomneny, i nanggamog na ra man ijobiket onggit gowukoyind, si ita ijobiki ibim dem de pumb tungg wa, i nanggamog na ra man itreket onggit gowukoyind, si ita itreki ibim dem de pumb tungg wa.” <sup>20</sup>Seg Yesu ket b'auyaena riga yit etainonj da, “Goro yena wumir omnena da, ‘Kon re Kerisoten.’ ”

**Yesu Naska Kana Tina B'idgotnena dide Uj gatab Yopurenonj**  
(Mak 8:31–9:1; Luk 9:22-27)

<sup>21</sup>I onggit kak ke Yesu omandemb yiyata kima b'atomonj Tina b'auyaena riga wa odede yit pitapita omnenam da, “Kon b'ogla nekɪn Yerusalem taun wa dide jogjog b'idgotnena takasinyin dem Ju riga waina elda riga wa pilke, i yina mopyam si riga wa pilke, i dide Ju riga waina gog ouyaena riga wa

---

<sup>1</sup> **16:16** Keriso engenda yitkak da “God ma Gaya ke Eauki Riga”. I Ju rigap Kerisonj yir yungaeneno, nokip Ton ita Israel kantri b'ogil ominy dem.

pilke. I ton Ken notnganji dem dide Kon ita tutnyisin dem nowam bibirind.”  
 22 I Petro ket Yesund yiu wa yiyonj dide ket odede samany yit yiyowonj da,  
 “Yonggyam! Toko God kear mamin! Goro odede mile mor pilind rawik!” 23 Si  
 ket Yesu Petrom pilwa wip itaingitonj dide ket yomnonj da, “Satana, ewaikite  
 Kor pilke! Man re b'uwombenapu riga e aet Kornim. Mop nokip man ma ita  
 nonyik b'amdenna mekenyit Godimna singi mile omnika aji man rigaina  
 singi mile omnika ma.” 24 Seg ket Yesu Tina b'auyaena riga amninonj da,  
 “Yet ra man singi taet Ken yimta undokam, man b'ogla naska moina singi  
 komkesa terarkinyit. I kwa man b'ogla komkesa bebig takasinyit Godim  
 wikond ngirpu moina uj wul b'agbagind, dide ket Ken yimta nutundoket.  
 25 Mop nokip yet ra tilenggyam tina yirkokar yirgong omnika iyeny, ton ita  
 tina onggityam yirkokar dadal edamkis dem. I daka yet ra tina yirkokar  
 edamkis Kor map, ton ita tina onggityam yirkokar dadal okas dem. 26 I ra  
 man komkesa gowukoi mornim okasit i dide onggit gowukoi map moina  
 yirkokar edamkisit dem, si nangga b'ogil e man yir onget onggit gowukoi  
 okati ke? O, nangga gasa kima e man igerkenyit moina yirkokar? 27 Mop  
 nokip Rigamna B'iga ita ik dem Ti B'uimna b'ogil inyomarena kima dide  
 Tina aneru kima, i onggit win natemb dem ket Ton riga yipayipa wa mira  
 tagoniny dem towaina wiko omniki ririrind. 28 I Kon iminjog wen tamninyin  
 da yepim re win owinki wekenyit dikind, wa wingirind ninda rigap makwa  
 opima uj taukanj, ngirpu ra ton Rigamna B'igand yir iyi dem menonind Tina  
 pumb tungg wip omnenapu danda kima.”

### Yesu ma B'enga Wip Inyomarena Yipa Dorind

(Mak 9:2-13; Luk 9:28-36)

**17** 1 I siks (6) bibir kak ke Yesu ara emokinonj Petro, Yakobo, dide ti  
 yinggan Yoan, i ten nena eyinonj de  
 yipa ukoi dor kumb wa. 2 Re ket tentawar wa opekto, Yesu b'enga wip  
 aukonj towa wipind. Si Tina wip b'unyomarenonj re lomkongga pila na  
 dide Tina kobirgim daka bilbiljog aukonj re ngaya pila na. 3 I odedend  
 ket Mose ake Eliya pita awonda opimemb b'auyaena riga wa wipind dide  
 ton Yesu kima yitnono aenonda. 4 Seg re ket Petro Yesund yomnonj da,  
 “Yonggyam! Sin otomanti im wekenyin dikind. Si ra Man singi taet, kon  
 nowa wungapu plaimet taranginyin dikind, yipa Mornim, yipa Mosem  
 i dide yipa Eliyam.” 5 I re Petro yitnono aenand yibnonj, odedend ket  
 inyomarena kima rimit ten ekanginjnonj, i odedend ket rim bora ke ara  
 ikonj odede da, “Itemb ji Koina B'iga yena re Kon singi yiyenyin dide yana  
 kima e re Kon ma sobijog sam e aenyin. Si win Tin yutkundena!” 6 I re  
 b'auyaena rigap itemb ara utkundo, ton kea as iroukito dide ket ma sobijog  
 na moga aukito. 7 I ket Yesu ikonj towa pilwa dide ket ten asopainonj  
 odede yit kima da, “Utnikina! I goro moga tainam!” 8 Seg re ton pumb wa  
 yir aukito, ton makwa yena yir yongo aji Yesu nena na Tinta.

<sup>9</sup>Seg re ton dor kumb ke paga etaeta tuwonj, nyawind Yesu b'auyaena riga engainonj da, “Goro yena wumir tamneninam onggit gasa gatab rina re win yir angindam, ngirpu ra Rigamna B'iga tutnyis dem uj ke!”  
<sup>10</sup>Seg b'auyaena rigap ket Yesund yerkitto da, “Si nangga pae meraina gog ouyaena rigap apurenanj da, ‘Eliya b'ogla naska menon okas, i ti kak ke Keriso ita ik dem?’”  
<sup>11</sup>I Yesu ket mira amninonj da, “Si yena pebat yindeny da ra Eliya ik, tonte ket komkesa gasa b'obogil tangonjeniny. <sup>12</sup>Aji Kon wen tamninyin da Eliya re kea ikonj, dide rigap maka tin yongwato aji rigap kea towaina singi ririrind komkesa negir mile amnikto ti pilind. I daka odede yipa wip nya kae Rigamna B'iga todaka ita onggit riga wa pilke b'idgotnena okateny dem.”  
<sup>13</sup>Si idenatemb ket b'auyaena rigap nony aukito da Ton towa pilwa yitnono aenonj re Baptiso Yoanim gatab na.

**Yesu Yipa Negir Wingawinga ke Okati Kewar B'iga B'ogil Yomnonj**  
*(Mak 9:14-29; Luk 9:37-43a)*

<sup>14</sup>I re Yesu yikonj riga bobo wa pilwa, yipa riga ikonj Ti pilwa dide ket kumsos b'amkonj Ti wipind. <sup>15</sup>Seg ton ket yomnonj da, “Yonggyam! Kor b'igand kear yomne! Mop nokip ton nony kesa sap otendeny tumol aembika kima, si ton ma sobijog e b'idgotnena yokateneny. I ton jogjogpyam b'aklandeneny de wul wa dide daka jogjogpyam unykeneny de nyi wa. <sup>16</sup>Si kon ke tin iyin Moina b'auyaena riga wa pilwa, aji ton ma ririr na aukanj tin b'ogil omnem.”  
<sup>17</sup>Seg ket Yesu mira amninonj da, “Oo, gar ke utkunda kesa dide gar eskamki riga yepim re yu onggit gowukoyind wekenyit! Ridede pin e Kon nitibnyin win kima? I ridede pin e Kon musik wimena okasin waina gar ke utkunda kesa mile gatab? B'iga iya dikind Kor pilwa!”  
<sup>18</sup>I re ton b'iga iyo Yesum pilwa, Ton ket negir wingawingand yingawonj opendam. Seg itemb negir wingawinga kea opendonj onggit b'igam pilke dide ket onggit winjogind kea itemb b'iga b'ogil awonj. <sup>19</sup>I ket Yesumna b'auyaena riga Ti pilwa tuwonj dide ket ton nena wekenonj yipa pipmetind. I idenatemb ket Tina b'auyaena rigap yerkitto da, “Nangga pena sin maka ririr aindam itemb negir wingawinga ewaikitam?”  
<sup>20</sup>Si Ton ten esmonggainonj da, “Mop nokip waina gar ke utkunda re ma ukoi e. Si Kon wen iminjog tamninyin da ra wa odede sobijog gar ke utkunda tebnainy mastad tuny re dide, si win b'ogil e onggit dorind omnya da, ‘Man ingkekemb b'apakate deta dide,’ i itemb dor ita b'atpakas dor. Si awir e kwa yipa gasa bebig tainy wanim omniam.”  
<sup>21</sup>(Awir e)

**Yesu B'usaya Tina Uj dide Utnyita gatab Yit Apureninonj**  
*(Mak 9:30-32; Luk 9:43-45)*

<sup>22</sup>I re Yesu dide Tina b'auyaena riga yipand b'eomto Galili wa, Yesu ten ket amninonj da, “Rigamna B'igand ita namb tib yii dem de rigaina yim kumb wa.

---

<sup>j</sup> 17:21 Ninda Grik peband da [Makwa ita yipa nya odede gasa ewaikitam, aji yir opmita dide owou uwabika nena kae.]

23<sup>†</sup> Onggit rigap ita Tin onganji dem, i Ton ita tutnyis dem nowam bibirind.” I re b'auyaena rigap Tina yit utkundo, ton ket ma sobijog na nony bebìg aukito.

### Yinamet Teks Oramka gatab Yit

24<sup>†</sup> re Yesu dide Tina b'auyaena riga wuwonj de Kaparnaum taun wa, yinamet teks imda riga tuwonj Petrom pilwa dide ket yigekito da, “Ma ma ita waina Ouyaena Rigat yinamet teks aramkeneniny?”<sup>k</sup> 25<sup>†</sup> I Petro mira amninonj da, “Owi, Toda ita.” Seg re Petro met wa b'igaronj, Petro re pop Yesund wumir omnam yomnonj aji Yesu naska nata tin yomnonj da, “Simon! Ringma man nony aet? Si ya pilkaim gowukoi kingip ninda b'engabenga teks imda eyenanj? Rika towainajog b'igawar wa pilkaim o ninda riga wa pilkaim?” 26<sup>†</sup> Si Petro mira yomnonj da, “Ninda riga wa pilkaim.” Seg Yesu tin yomnonj da, “Si raemb odede, king waina b'igawarip, odede it re Kon re dide, b'ogla teks oramki kesa waken. 27<sup>†</sup> Aji man meke de sipa wa dide ket kedo b'itisket. I ra naskajog kabum iwasit dor, man tugim uwamket dor, si man ita odaret dor yipa koin wulkip. I man ket meranim yiyit dor towa pilwa teks oramitam, nokim da idenat men maka ten komliwim tamninya.”

### B'iga Sobijog pila Riga Awowim

(Mak 9:33-37; Luk 9:46-48)

**18** 1<sup>†</sup> Onggit winind b'auyaena riga tuwonj Yesum pilwa dide ket yerkitito da, “Yete ukoyam pumb tunggind rinte re God wip yomnenny?” 2<sup>†</sup> I ket Yesu yipa b'iga sobijog ara yemokonj dide yonyitonj towa wipind. 3<sup>†</sup> Seg Ton ket ten amninonj da, “Kon wen iminjog tamninyin da ra win maka ra b'etnngenjindam dide maka ra b'iga sobijog pila taukindam, win makwa ngai ririr im b'igarkam de pumb tungg wa. 4<sup>†</sup> Si onggit paemb yet ra tilenggyam gou wa taukeneny odede b'iga sobijog pila, itemb riga re ukoi jog riga e pumb tunggind. 5<sup>†</sup> I dide yet ra yipa odede b'iga sobijogind Kor nyi kima simesime ominy rinte re wip ke dikind onyiti yibim, ton Kena simesime nominy.

### Negir Mile Omnikam Otonkena

(Mak 9:42-48; Luk 17:1-2)

6<sup>†</sup> I ra yipa rigat odede b'iga sobijog wingirind yipa b'igand negir mile omnikam ominy yepim re Ken gar ke utkunda ke nokatenyi, itemb re ma sobijog bebìg e tainy tinim. Aji itemb ji b'ogiljog e tinim, rako rigap tina kunakakind ukoi gimo danda kima yijobiko kai ke dide yisko ngortodjog sipa nyi bora wa nyingor b'awamam, si ma rako onggit b'igand negir mile omnikam yingawonj. 7<sup>†</sup> Si God ma sake onggit gowukoyim pilwa komkesa

<sup>k</sup> 17:24 Onggit winind Ju rigap yinamet teks aramkenento re kombkomb Sekel wulkip na, i itemb wulkip re yipa ririrkip e powa (4) Drakma wulkip kima.



odede mile map rinsim re riga negir mile omniam amnikenenanj. Odede negir mile omniam otonkena mile b'ogla wowen, aji God ma sake onggit riga wa pilwa yepim re odede mile eyenanj. <sup>8</sup>Si ra moina yipa yimit o moina yipa pisit men negir mile omniam motiny, man b'ogla itemb ji yim o pis ipenjit dide ket b'itisket mor pilke. Itemb re b'ogiljog e mornim yimdudu o pisdudu kima b'igaram ngirpu kesa yirkokar tungg wa. Aji ma b'ogil emb ji nimog yim kima o nimog pis kima mitiskansi dem de wul tungg wa rokate re dadal ngirpu kesa wul dimil yimbeneny. <sup>9</sup>I ra moina yipa yirkipit negir mile omniam motiny, man b'ogla itkasit itemb yirkip dide ket b'itisket mor pilke. Itemb re b'ogiljog e mornim yipaina yirkip kima b'igaram ngirpu kesa yirkokar tungg wa. Aji ma b'ogil emb ji nimog yirkip kima mitiskansi dem de wul tungg wa rokate re dadal ngirpu kesa wul dimil yimbeneny.

### **B'edamkiti Mamoi gatab Tendam Yit**

*(Luk 15:3-7)*

<sup>10</sup>“I win yir kima tekenyit da goro win yena irinena iyena odede b'iga sobijog wingirind. Mop nokip Kon wen wumir tamninyin da towa opima towainajog aneru yepim re wekeny de pumb tungg wa, ton ita winind ita Kor B'u Godind wip yir yongenenyi yete re yibim pumb tungg wa. <sup>11</sup>(Awir e)<sup>1</sup> <sup>12</sup>Si ringmim win nony aindam? Ra yipa rigam ibnainy wan andred (100) mamoi i onggit mamoi wingirind yipa b'etidamkis, si ma ton indaima sukakind yiyag tatkulisiny nainti nain (99) mamoi dide oraka iyeny itemb yipa b'edamkiti mamoi ngirpu ra ket ton odar? <sup>13</sup>Si Kon wen iminjog tamninyin da ra ton ket itemb b'edamkiti mamoi odar, ton ket ma sobijog sam e omniam itemb odari mamoi kima, aji ton ma odede sam e omniam opimemb nainti nain (99) mamoi kima rina re maka b'edamkuranj. <sup>14</sup>I odede yipa wip nya ke wa B'u God yete re yibim pumb tungg wa, Ton ma singi e odede b'iga sobijog wingirind yipa b'iga b'etidamkis.

### **Sosi Wingirind B'isakendam Nya**

*(Luk 17:3)*

<sup>15</sup>“I ra yipa moina gar ke utkunda nanyit o yingganit negir mile omniam mor pilwa, man b'ogla meket ti pilwa dide ket man dide ton wentawarind tina negir mile ti pita omnaet. I ra ton yit mutkunj dide b'atgenai tina negir mile gatab, si man kea moina gar ke utkunda riga yim yokaet engendam Godim pilwa. <sup>16</sup>I ra ton maka yit mutkunj, man yipa o nimog riga takasit, nokim da idenat nimog o nowa yir ungata rigap komkesa

---

<sup>1</sup> 18:11 Ninda Grik peband da [Mop nokip Rigamna B'iga ikonj re b'edamkuri riga wa yirkokar okawa mana.]

yir ungata gatab yit temjatenanj towaina tugim ke. <sup>17</sup>Aji ra ton b'itisainy towaina yit utkundam, man b'ogla tina negir mile gatab sosi wumir omnyit. I kwa ra ton b'itisai sosimna yit utkundam, ton mor pilind ija na rau it re yipa gar ke utkunda kesa riga odede God ma obagendi kesa riga pila o yipa teks imdayam riga pila. <sup>18</sup>Si Kon iminjog wen tamninyin da nanggamog na ra win ijobikya onggit gowukoyind, si ita ijobiki ibim de pumb tungg wa, i nanggamog na ra win itrekya onggit gowukoyind, si ita itreki ibim de pumb tungg wa. <sup>19</sup>I Kon b'usaya wen iminjog tamninyin da ra wa wingirind nimog rigap nanggamog gasa gatab mana ra imjasya onggit gowukoyind dide yir opmitenand oramisya, si Kor B'u yete re yibim pumb tungg wa, Ton ita towa tamnikau. <sup>20</sup>Mop nokip ra nimog o nowa riga yipand b'eteomkitanj Kor nyi kima, Kon ita dikind ton kima nibnyin.”

### Kear Omnena Kesa Wiko Riga gatab Tendam Yit

<sup>21</sup>I odedend ket Petro ikonj Yesum pilwa dide ket yigekitonj da, “Yonggyam! Ra koina gar ke utkunda rigat negir mile omnika teyeniny kor pilind, si leamogpyam e kon b'ogla ti negir mile awir omnainyiny? Rika ama de sebenpyam (7) wa e?” <sup>22</sup>Seg Yesu tin mira yomnonj da, “Kon motinyin da ma ama de sebenpyam (7) wa aji rika ama de sebenti sebenpyam (77) o rika ogenka kesa wa e. <sup>23</sup>Si onggit paemb pumb tungg re yipa wip e odede king kima yet re singi awonj yir iyenam nanggamog abitoro im wekeny tina wiko riga wa pilind. <sup>24</sup>Si re itemb king tina wiko rigaina abitoro wulkip yir iyena b'atomonj, tina wiko rigap kea yipa abitoro riga iyo ti pilwa yama na re ogenka kesa ukoijog wulkip<sup>m</sup> abitoro yibnawonj onggit kingim pilind. <sup>25</sup>Aji itemb riga ton ma ririr na ongandam onggityam abitoro wulkip. Si onggit penaemb ket ti yonggyam tin yingawonj da, ‘Man b'ogla molenggyam b'atisoget dide daka kwa tasoginyit mor kongga, mor b'igawar i dide komkesa moina gasa rinsim re mor mibnainy, i ket onggit osogi wulkip ke abitoro onganjit.’ <sup>26</sup>Si itemb wiko rigat kear okatam kumsos b'amkonj kingim pilwa dide ket tin yitenawonj da, ‘Be man gangga nokae! Kon ita kupkakupka mor abitoro motngandaen.’ <sup>27</sup>Si itemb wiko rigamna yonggyam tin gar ke kear yomnonj dide ket tina abitoro awir yomnawonj dide ket yitmikitonj. <sup>28</sup>Aji re itemb wiko riga opendonj, ton yipa tina wikomadind yodaronj ya pilnat re ma ukoi abitoro wulkip na yibnawonj, dide ket tin kunaepind yokatonj dide ket kir yukonj odede yit kima da, ‘Or abitoro nongandae!’ <sup>29</sup>Si itemb ti wikomad kear okatam kum ujokonj ti pilwa dide ket tin yitenawonj da, ‘Be man gangga nokae! Kon ita mor

---

<sup>m</sup> 18:24 Grik peband da “ten tausin (10,000) Talant”. I Talant re yipa ukoi gold kipol wulkip na, i yipa Talant re yipa riga ma piptin (15) kemag wiko mira kima yipa ririr na.

abitoro motngandaen.’<sup>30</sup> Aji ton makwa singi awonj gangga okawam, si ton itemb tina wikomadind yiyonj dide ket yiskantonj sibibmet wa ngirpu ra ket ton itemb abitoro onganj dem.<sup>31</sup> Si re tina wikomadwarip odede mile yir yongo rina re aukonj, ton ma sobijog na gar soro aukito. Seg ton ket wuwonj towaina yonggyamim pilwa dide ket komkesa mile towa yonggyamim yisipkenauto rina re aukonj.<sup>32</sup> I re itemb yonggyam yit utkundonj, ton kea ket itemb negir wiko riga ara yemokonj dide ket yomnonj da, ‘Man re negirjog wiko riga et. Kon kea moina kupkakupka abitoro awir momnainond, re man ken nitenawot gangga okawam mornim abitoro ongandam.<sup>33</sup> Si ringma, ma mor ririrkipjog e da man moina wikomadind kear omnyit odede ringma na re kon men kear momnond?’<sup>34</sup> Seg tina yonggyam ma sobijog na soro awonj, si ton sibibmet yir ipka rigaina yim kumb wa yoramitonj bebig okatenam ngirpu ra ket ton itemb kupkakupka abitoro onganj dem.<sup>35</sup> I ra win yipayipa rigap maka ra man moina gar ke utkunda nanyind o yingganind gar ke kear omnenyit dide ket maka tina negir mile awir omnainyit rina re ton mor pilind amnikinonj, si Kor B'u God yete re yibim pumb tungg wa, Todaka ita odede yipa wip nya ke men motineny.”

### Yesu Molkongga Bondik Awou gatab Auyaeninonj

(Mak 10:1-12)

**19** I re Yesu onggityam yit opurena seg awonj, Ton ket Galili eriya yiraronj dide ket yikonj de Yuda eriya wa de Yordan kilim yipa tab wa.<sup>2</sup> I jogjog riga bobop Yesund yimta yundoko, i Ton ket ademb de kopa riga esakenjinonj.

<sup>3</sup>I Parisai riga tuwonj Yesum pilwa dide ket Tin yotonkeno odede yit kima da, “Rika ririrkipjog e yipa rigat ti konggand bondik tominy nanggamog ril na ra ton todarau?”<sup>4</sup> Si Yesu esmonggainonj da, “Ma win ma wumir im da gowukoi otomapu ke otobarkayam God riga amnikonj re riga ake kongga na?”<sup>5</sup> I God ket yindonj da, ‘Onggit paemb rigat ti b'u ake ti mog terar i dide ket ti kongga kima b'itinkisya. Si osiemb molkongga yipaina ji i taya.’<sup>6</sup> Si osiemb molkongga re ma nimog i, aji ton re yipaina ji i. Si onggit paemb rina re God yipand enkitonj, goro yet wetaweta ramin.”<sup>7</sup> Seg Parisai rigap Yesund yigekito da, “Si nangga pena Mose b'ingawa yit yoramitonj da ra yipa rigat singi tainy ti konggand bondik omnam, ton b'ogla bondik omna peba tokau dide ket itomb kongga tewaikis?”<sup>8</sup> I ket Yesu ten esmonggainonj da, “Mose wen enjikisinonj waina kongga bondik omnam, nokip waina gar re rogilkak na. Aji odede bondik omna mile re maka gowukoi otomapu ke aukonj.<sup>9</sup> Aji Kon wen tamninyin da yet ra ti konggand jabakipind bondik tominy yipa riga kima negir b'iyena mile omniki kesand dide b'enga kongga tokas ti konggam, si ton gigir dide yigyig b'iyena mile e omnika iyeny itomb sisil kongga kima.”<sup>10</sup> Seg Tina b'auyaena rigap Tin yomno da, “Rada kongga kima wimena mile gatab odede bebig taukanj rigam pilind, si itemb b'ogiljog e

tinim kongga okati kesa tinta wimenam.” <sup>11</sup>Ɔ Yesu ket mira amninonj da, “Ma komkesa riga im odede yitit takasiny, aji ten nena im yena re God amninonj kongga okati kesa wimenam. <sup>12</sup>Mop nokip ninda riga re rigaina kipear danda kesa im wekeny pil b'asopaya mile omniam nokip ton ija na get ke towa mogwar wa pilke ukukto, i ninda riga ipakip kesa map kongga okati kesa im wekeny nokip rigap kea ekikto, i dide kwa ninda riga kongga okati kesa im wekeny ipakip ikiki riga pila nokip ton b'isaenenanj kongga okata mile, nokim da idenat ton pumb tungg gatab wiko b'obogil danda kima tamnikenenanj. Si yete re ririrjog yibim odede kongga kima wimena mile okatam, ton onggityam milend yeken.”

**Yesu B'iga Sobijog B'ogil Amninonj**  
(Mak 10:13-16; Luk 18:15-17)

<sup>13</sup>Ɔ odedend ket rigap towaina b'iga sobijog Yesum pilwa eyento odede nony kima da idenat Yesu Tina yim taramiteniny towa pilind dide yir topmiteny ten b'ogil omniam. Aji b'auyaena rigap ten samany kima riga ogoka eyento b'iga iyenam Yesum pilwa. <sup>14</sup>Aji Yesu b'auyaena riga amninonj da, “Tou b'iga sobijog Kor pilwa! Goro b'iga ogoka eyenindam, mop nokip odede b'iga wa maemb ji pumb tungg.” <sup>15</sup>Ɔ ket Yesu Tina yim aramiteninonj yipayipa b'iga wa pilind ten b'ogil omniam, i ingkenaemb ket onggit pipmet ke yikonj.

**Jogjog Gasa kima Sisil Riga**  
(Mak 10:17-31; Luk 18:18-30)

<sup>16</sup>Seg ket yipa riga Yesum pilwa ikonj dide ket Yesund yerkitonj da, “Ouyaena Riga! Nangga b'ogil wiko e kon omniken dadal ngirpu kesa yirkokar okatam?” <sup>17</sup>Aji Yesu tin mira yomnonj da, “Nangga pae man Ken nige kisit b'ogil gasa gatab? Godta Tinta yipaina b'ogil yibim. Aji ra man singi taet b'igaram ngirpu kesa yirkokar wa, man b'ogla God ma b'ingawa yit yimta undoka teyeninyit.” <sup>18</sup>Ɔ ton ket Yesund yigekitonj da, “Ringgityam b'ingawa yit im?” Si Yesu ket tin yismonggawonj da, “Man insimemb ji b'ingawa yit yimta tundokinyit, opi re goro riga ongandim, goro gigir dide yigyig b'iyaena mile omnika, goro yurowam, goro riga gatab yir ungati kesa b'anyginena yit usekim, <sup>19</sup>tesnaet mor b'u ake mor mog, i dide singi yiyene mor rigand mada re dide!” <sup>20</sup>Seg itemb sisil riga ket Yesund yomnonj da, “Kon kea opimemb komkesa b'ingawa yit yimta undoka eyeneninond. Si nangga e kon kwa b'ogla omniken?” <sup>21</sup>Ɔ ket Yesu tin mira yomnonj da, “Ra man singi taet ririrkipjog riga awowim, si man meke! Ɔ nangga gasa im re mor mibnainy man tasoginyit, i dide ket man komkesa osogi wulkip ogona teyeninyit gasa kesa riga wa. Ra man odede omniket, yimta ke ket mor jogjog b'ogiljog gasa opima mitibnainy dem de pumb tungg wa. Seg ket man metket Kor pilwa dide ket yimta nutundoket!” <sup>22</sup>Si re onggit sisil rigat odede yit utkundonj, ton ket gar bebig kima yiwatonj, mop nokip ti jogjog gasa na yibnainonj.

<sup>23</sup>Seg daka ket Yesu Tina b'auyaena riga amninonj da, “Kon iminjog wen tamninyin da jogjog gasa kima rigam re bebig e b'igaram de pumb tungg wa. <sup>24</sup>I Kon kwa b'usaya wen tamninyin da ukoi ji b'angga kamelim b'igaram de nidil bora wa, itemb re ji ma bebig e, aji jogjog gasa kima rigam God ma pumb tungg wa b'igaram, itemb re ji ukoi jog bebig e.” <sup>25</sup>I re b'auyaena rigap itemb yit utkundo, ton isanikesa ukoi jog kid kesa aukito dide ket endento da, “Si yete ririr yirkokar okatam?” <sup>26</sup>Si Yesu ten yir epkinonj dide ket amninonj da, “Rigam re onggityam gasa ma ririr im ti omniam, aji Godim re Ti komkesa gasa ririr im omniam.” <sup>27</sup>I ket Petro Yesund yomnonj da, “Yir de, sin komkesa gasa erarkitondam dide ket mena yimta undoka miyenyu. Si nangga b'ogil e sin yir ongu onggit mile ke?” <sup>28</sup>I Yesu ket mira amninonj da, “Kon iminjog wen tamninyin da onggit winind ra sisil gowukoi pita tainy dem dide ra Rigamna B'iga Tina b'ogil inyomarena kima wip omnenapu kasa kumbind tomis dem, win yepim re Ken yimta undoka niyanya, widaka opima twelp (12) wip omnenapu kasa kumbind tomnikindam dem dide ket Israel twelp (12) gu riga isagika teyenindam dem. <sup>29</sup>I daka kwa yepiya re Koina nyi map erarkito towa met, towa nanywar, towa yingganwar, towa ngimirwar, towa b'u, towa mog, towa b'igawar, dide towaina gou, ton opima odede gasa takatenanj dem wan andredpyam (100) i dide dadal ngirpu kesa yirkokar owabinsi dem. <sup>30</sup>Aji riga yepim re yu ukoi jog nyi riga pila wekeny, towa wingirind jogjog riga opima yimta ke sobijogjog nyi riga taukanj dem. I riga yepim re yu sobijogjog nyi riga pila wekeny, towa wingirind jogjog riga opima yimta ke ukoi jog nyi riga taukanj dem.

### Greip Sopapu Wiko Riga gatab Tendam Yit

**20** <sup>1</sup>“Si pumb tungg re yipa wip e odede gou yonggyam kima yet re sitawarjog tina met ke yiwatonj ninda wiko riga imdam tina greip sopapund mira kima wiko omniam. <sup>2</sup>I re ton naska ti ninda wiko riga adarinonj sitawarind, ton kea imjati yit towa akainonj da yipa bibir wiko mira re siks (6) Kina e dide ket ten etmikisinonj tina greip sopapu wa wiko omniam. <sup>3</sup>I yimta ke nain (9) kilokind ton ket yikonj maket wa, i ton ket kea kwa ninda riga jaba owinki yir anginonj. <sup>4</sup>Si ton ket opimemb riga amninonj da, ‘Widaka wuwe koina greip sopapu wa wiko omniam. Si kon opima wa mira tagoninyin waina wiko ririrind.’ <sup>5</sup>I ton ket wuwonj sopapu wa. Seg itemb yonggyam ket b'usaya yikonj twelp (12) kilokind i dide kwa simana gatab tri (3) kilokind, i didea kwa yipa wip mile omnika yiyenonj. <sup>6</sup>I kwa daka ama rika simana gatab paib (5) kilokind re ton b'usaya yikonj maket wa, ton kwa kea de ninda riga owinki adarinonj. Si ton ten arkisinonj da, ‘Nangga paim win dikind jabajaba bibir pinpin owinki wekenyit?’ <sup>7</sup>I opimemb riga tin mira yomno da, ‘Makwa sin yet wulkip kima wikom nimjiny.’ Seg ton ket ten amninonj da, ‘Widaka kwa wuwe koina greip

sopapu wa wiko omniam!’<sup>8</sup> Si re ket si imoka ikonj, itemb greip sopapu yonggyam tina wiko yir ipka mopyamind yomnonj da, ‘Man wiko riga ara emokine, dide ket towa mira wulkip tagoninyit. Si man yongga otomet ra yimtajog imdi wiko riga wa pilkae ngirpu ama ra de naskajog imdi riga wa pilwa.’<sup>9</sup> I ket wiko riga yena re emjinonj simana gatab paib (5) kilokind tuwonj, dide ket kea ton yipayipa rigap siks (6) Kina imda eyento.<sup>10</sup> Si re naska imdi riga tuwonj mira okatam, ton ija na nony aukito da ton ukoi mira im temdanj. Aji todaka kwa yipayipa rigap siks (6) Kina nena na emdito.<sup>11</sup> I re ton emdito, ton ma sobijog na odede yit kima yit b'ebongnena wuwenonj sopapu yonggyamim pilwa da,<sup>12</sup> ‘Opimemb yimta imdi wiko riga re jaba yipaina awa nena na wiko yomniki aji sinpiya bibir pinpin dide ginggil kikibind ukoi kana bebig kima b'asowa yokatenyu. Si kea naemb man sin onggit riga kima yipa ririrkip nomninyit.’<sup>13</sup> Aji sopapu yonggyam towa wingirind yipa rigand yomnonj da, ‘Kor riga! Kon maka mor pilind negir mile yomniken. Ma man maka siks (6) Kinam wiko mira yimjasit kon kima?’<sup>14</sup> Si man b'ogla moina mira nena yokate dide ket meke moina met wa! Aji kon koina singi nat itemb yimtanyam okati wiko rigam odede yipa ririrkip mira wulkip yokaen rija na re kon mokaen.<sup>15</sup> Si ringma, ma itemb re ma ririrkipjog e kornim koinajog wulkip ingaenam koina singi ririrind? O ma si man nok pae nonyik niponenyt da kon b'ogil mile na yomniken?’<sup>16</sup> Si odede yipa wip nya ke riga yepim re yu ukoi jog nyi riga pila wekeny, towa wingirind jogjog riga opima yimta ke sobijogjog nyi riga taukanj dem. I riga yepim re yu sobijogjog nyi riga pila wekeny, towa wingirind jogjog riga opima yimta ke ukoi jog nyi riga taukanj dem.”

**Yesumna Nowam Bage Yit Tina Uj dide Utnyita gatab**  
(*Mak 10:32-34; Luk 18:31-34*)

<sup>17</sup>I re Yesu Yerusalem taun wa menon yokatonj, Ton twelp (12) b'auyaena riga nena tentawar wa amninonj dide ket nyawind ten amninonj da,<sup>18</sup> “Yir de, men menon yokasu re Yerusalem ma. Yipa rigat ita Rigamna B'iga tib yii dem dide takainy dem yina mopyam si riga dide Ju riga waina gog ouyaena riga wa pilwa, i ket tonpim tirir omnyi dem Tin ongandam.<sup>19</sup> I dide ton ket Tin yiyi dem de God ma obagiki kesa riga wa pilwa, si ket opimemb God ma obagiki kesa rigap Tin ngong engena kima ji malik omnika iyenyi dem, i Tin iraska iyenyi dem, ngirpu wul b'agbagind idriki dem. Seg ket nowam bibirind Ton tutnyis dem uj ke.”

**Yakobo ake Yoan Towa Mogimna B'arkita**  
(*Mak 10:35-45*)

<sup>20</sup>I odedend ket Jebedaimna kongga ti b'iga nimog Yakobo ake Yoan kima tikonj Yesum pilwa i ket kum ujokonj i dide ket Yesund yigekitonj tina singi omniam.<sup>21</sup> Si Yesu tin werkitonj da, “Nangga ma man singi aet?” I ket itomb kongga Tin mira yomnonj da, “Man tirir notinaet da Man osiemb koina b'iga

nimog wa mor wus ke ukoi pipmet takaet omitam, yipa Moina yimjog yim tab ke i yipa kwa Moina sawai yim tab ke de Moina kantrind.”<sup>22</sup> Aji Yesu ket ten amnonj da, “Win ma wumir im nangga ma win nerkisya. Rika win ririr i Koina b'idgotnena kapo nyi onayam rinte ra Kon onaen dem?” Si osiemb b'iga nimogip ket mira yomnonda da, “Sin ririr i.”<sup>23</sup> Si Yesu mira amnonj da, “Win b'ogil i onaya dem Koina b'idgotnena kapo, aji omitam gatab it re Kor yimjog yim tab ke dide sawai yim tab ke, itemb re ma Kor ogona gasa im. Aji Kor B'u God towa mi ji pipmet takau dem yama na re Ton angonjenawonj.”<sup>24</sup> I re ten (10) komb b'auyaena rigap onggityam yit utkundo, ton osiemb nimog nanyinggan wa pilwa soro aukito.<sup>25</sup> Seg Yesu ket komkesa b'auyaena riga ara emokinonj Ti pilwa menonim dide amninonj da, “Win wumir im da wip iyoi riga yepim re wekeny God ma obagiki kesa riga wa wingirind, ton towaina riga wanim aukenenanj re yonggyam im, dide kwa towaina ukoi jog nyi rigap isanikesa danda enganenanj towaina riga wa pilwa.<sup>26</sup> Si wa wingirind re ma ija emb ji. Aji wa wingirind yet ra singi tainy ukoi riga awowim, ton b'ogla waina wiko riga rau dem.<sup>27</sup> I daka kwa wa wingirind yet ra singi tainy pumbjog wa ukoi riga wimenam, ton b'ogla waina goujog wiko riga rau dem.<sup>28</sup> Si Rigamna B'iga daka ma odede mop pena ikonj onggit gowukoi wa da riga Tinim wiko riga taukanj. Aji Ton ikonj re riga wa wiko riga awou mana dide Tina yirkokar ke jogjog rigaina negir mile iraba mana.”

### Yesu Nimog Yirdidi Riga Esakendonj

(Mak 10:46-52; Luk 18:35-43)

<sup>29</sup>I re Yesu dide Tina b'auyaena riga Yeriko taun ke yiwato, kea ukoi bobo rigap Tin yimta yundoko.<sup>30</sup> I onggit winind ket nimog yirdidi riga yepiya re omi ebnonda nya yiund, ton kea utkundonda da Yesute nya opanjis. Seg ton ket b'okta ara yiwawonda da, “Yonggyam! Dawidimna B'igawii! Sin kear nomne-o!”<sup>31</sup> Aji riga bobop ten samany ke amneno da, “Muma kesa awa!” Aji osiemb yirdidi rigap ara yoikindenonda da, “Yonggyam! Dawidimna b'iga-wii! Kear nomne-o!”<sup>32</sup> Seg ket Yesu omanda onyitonj, i ket ten ara emokonj. Si ket ten arkitonj da, “Nangga mi win singi aya Kon wanim omnikam?”<sup>33</sup> I ton mira yomnonda da, “Yonggyam! Sin singi i da Man sowaina yir tepangkinyit.”<sup>34</sup> Si Yesu kea ten gar ke kear amnonj, dide ket towaina yirkip asopainonj. Seg odenja ket osiemb nimog yirdidi rigap yir b'iskeninonda dide ket Yesund yimta yundokonda.

### Yesu Yerusalem Taun wa B'igaronj

(Mak 11:1-11; Luk 19:28-40; Yoan 12:12-19)

**21** <sup>1</sup>I Yesu dide Tina b'auyaena riga ket Yerusalem taun wuswus wa aukito dide ket opento de Betpage tungg wa rina re Olib dorind yibnonj. I ingkenaemb ket re Yesu Tina nimog b'auyaena riga etmikitonj,<sup>2</sup> Ton ket ten amnonj da, “Win eka onggit tungg wa rinte re wa wip ke



yibim! Ra win onggit tungg wa b'itgarya, odenja win yipa mogyat dongki todarya dor ti b'iga kima rinto re kai ke wulim pilind ijobiki wibim. Si win ket kai itrekya dide teiya dor Kor pilwa. <sup>3</sup>I ra yipa rigat wen tarkis da, 'Win nangga pae odede yomnikya?' win b'ogla wumir omnya dor da, 'Yonggyam osiemb dongki mogbiga singi i aminy ingawam.' I ra win yit opurena seg taya, itemb riga odenja i tetmikis dor dikind." <sup>4</sup>I itemb mile aukonj re onggit mana da idenat itemb bage yit ririrkip tainy bageyam waina opureni yitkak da,

<sup>5</sup> "Win Siyonind, it re Yerusalem taun, wumir womna,  
Yir de, moina King ite ik mor pilwa,  
Ton Tilenggyam gou wa ainy,  
si Ton angis re yipa dongki kumb nate,  
aji ama de gasa iyenapu b'anggamna b'iga,  
itemb re b'igayam dongki kumb nate."

<sup>6</sup>Si osiemb nimog b'auyaena riga ekonda dide ket ton kea onggit yit ririrind gasa amnikinonda rija na re Yesu ten engawonj. <sup>7</sup>I ton ket itomb dongki dide ti b'iga teyonda Yesum pilwa dide ket towaina tumind kobirgim osiemb dongki kumb wa aramkinonda. Seg Yesu ket dongki b'iga kumb wa angitonj. <sup>8</sup>I riga bobo wingirind jogjog rigap kea towaina tumind kobirgim Tina menonpu nyawind ondrika eito, i dide kwa kea ninda jogjog rigap wulpip ipka eyento dide ket ondrika eito nyawind ukoi isnawa kima. <sup>9</sup>I riga bobo yepiya re Ti wip nata dide Ti kak nata wuwonj, ton b'okta ara kima ger itanga yiyo da,

"Osanna, Yonggyam Dawidimna B'igam pilwa!  
Ita God ma b'ogil Man kima  
yete re Yonggyamim nyi kima ik!  
Osanna pumbjog Godim pilwa!"

<sup>10</sup>I re Yesu b'igaronj de Yerusalem taun wa, komkesa taun rigap itemb taun guglam nena yomniko dide endento da, "Yetemb ji riga?" <sup>11</sup>Si opimemb riga bobo yepiya re Yesu kima b'igarkito, ton mira ammento da, "Itemb ji bageyam Yesu yete re ik Najaret tungg ke Galili eriya wingirind."

### Yesu Yinamet Kil kesa Yomnonj

(Mak 11:15-19; Luk 19:45-48; Yoan 2:13-22)

<sup>12</sup>I ket Yesu b'igaronj yinamet kara wingir wa. I Ton ket eaueninonj komkesa riga yepiya re Godim si gasa asogenento dide imda eyenento yinamet aband. I dide ket Ton gu engendurkena eyeninonj wulkip sensi omnenapu kasa rikind re b'engabenga wulkip wekenonj osogam, dide yinamet teks wulkip imdam, dide Godim si gasa gimai osogapu kasa. <sup>13</sup>I ket Yesu ten amninonj da, "Yina peband ija emb ji yinamet gatab iriki yibim da,

‘Rigap b'ogla Koina met yagenae yir opmitenapu met ke'.

Aji winpim itemb yinamet wip yomnikya da raskol waina wimenapu pipmet e.”

<sup>14</sup>I ket yirdidi riga dide gomgom riga tuwonj Yesum pilwa yinamet aband, si ket Yesu ten esakenjinonj. <sup>15</sup>Aji re yina mopyam si riga dide Ju riga waina gog ouyaena rigap yir angto opimemb kid kesa kima mile rina re Yesu amnikinonj dide b'iga sobijog yepiya re b'okta ara kima ger atangto yinamet aband da, “Osanna Dawidim B'igam pilwa,” ton ma sobijog na komliu aukito. <sup>16</sup>Seg ton ket Yesund yomno da, “Ke man utkundenytangga im onggit b'igap apurenanj?” Si Yesu ten esmonggainonj da, “Owi, ke. Ringma, ma win maka yina peband yogenkonda odede yitkak? Si yina pebat yindenya da,

‘Ma Man kea Mornim angonjeninot

b'iga sobijog dide papa b'iga waina tugim ke esourena ger itangam?’ ”

<sup>17</sup>Seg ket Yesu ten erarinonj dide ket opendonj taun bau wa. I Ton ket yikonj Betaniya tungg wa dide ademb de ket yipa yit wegongj.

### **Yesu Yipa Pig Wul Sake Yomnonj**

*(Mak 11:12-14, 20-24)*

<sup>18</sup>I ispari ke ket sitawarjogind re Yesu itendonj Yerusalem taun wa, nyawind Ton ket kea owoupa awonj. <sup>19</sup>Si re Yesu yir yongonj yipa pig wul nya yurund, i Ton ket demb de yikonj onggit pig wul mop wa. Aji Ton makwa nangga pig kip na yir anginonj onggit pig wul nanggim pilind aji ina rom nena wekenonj. I Ton ket itemb wul nangg yomnonj da, “Man kip kesa e ngirpu kesa mitibnenenyit.” Seg odenja itemb pig wul nangg yarimit yokatonj. <sup>20</sup>I re b'auyaena rigap itemb mile yir yongo, ton ma sobijog na kid kesa aukito. Si ton ket Yesund yigekito da, “Ridede nya kena itemb pig wul odenja yarimit yokas?” <sup>21</sup>I Yesu ket ten esmonggainonj da, “Kon iminjog wen tamninyin da rada wa opima gar ke utkunda dide maka ra nony nimognimog taenindam, si win ma odede mile nena im tamnikindam rinte re onggit pig wul nanggim pilind awik, aji daka kwa win ririr im tendenindam onggit dorim pilwa da ‘Man b'uromate dide molenggyam b'iskante de sipa wa,’ si ita tawik. <sup>22</sup>I ra win gar ke utkunda oramisya Godim pilwa dide nanggamog mana ra win b'igekena oramitenya yir opmita ke, si win opima takasindam.”

### **Yesu ma Juwai gatab B'arkita**

*(Mak 11:27-33; Luk 20:1-8)*

<sup>23</sup>I re Yesu b'igarony yinamet aba wa dide ket riga auyaeninonj, odedend ket yina mopyam si riga dide Ju riga waina elda riga tuwonj Ti pilwa. I ton ket Yesund yerkito da, “Man nangga juwai kaim onggityam

gasa amnikinyit? I yet mor onggityam juwai mokawonj?”<sup>24</sup> I Yesu ket ten mira amninonj da, “Kodaka yipa yit gatab e wen tarkisinyin. Ra win mira notinya, si onggit kak kaim Kodaka wen wumir tamninyin nangga juwai kaim kon onggityam gasa amnikinyin.<sup>25</sup> Win wumir nomna! Ringma, ringkae Yoanimna baptiso ikonj, rika Godim pilkae o minda rika riga wa pilkae?” Si ket ton towa wingirind yit b'iglenena wuwenonj da, “Ra men mira omnyu da ‘Godim pilkae,’ si ton opima netirkisiny dor da, ‘Si win nangga pena maka Yoanimna baptiso gatab gar ke utkunda ke yokatonda?’<sup>26</sup> Aji ra men jaba nitinjindam da, ‘Riga wa pilkae,’ si men riga bobo im moga uwajindam. Mop nokip komkesa rigap Yoanind iminjog kae yokatenyi da ton re God ma yipa bageyam na.”<sup>27</sup> Si ton ket Yesund mira yomno da, “Sin ma wumir im.” I Yesu daka ket ten amninonj da, “Si Kodaka ma opima wen wumir tamninyin nangga juwai kaim Kon onggityam gasa amnikinyin.

### Nimog B'iga gatab Tendam Yit

<sup>28</sup> “Si rija im win nony taindam onggit yit gatab? Yipa rigam nimog b'iga yibnawonj. I itemb riga yikonj nanyam b'igam pilwa dide ket yomnonj da, ‘Kor b'iga! Yu man meke greip sopapu wa dide ket wiko omniket.’<sup>29</sup> I ton ket ti b'und mira yomnonj da, ‘Kon ma singi en.’ Aji yimta kena ton gar b'engendonj, ngirpu ton ket yikonj greip sopapu wa.<sup>30</sup> I kwa towa b'u yikonj yinganyam b'igam pilwa dide ket tida kwa ija na yit yomnonj rija na re nanyamind yit yomnonj. Si itemb yinganyam b'iga mira yomnonj da, ‘Abu, kon ita neken.’ Aji ton maka yikonj.<sup>31</sup> Si ringma, osiemb nimog nanyingan wa wingirind yet towa b'uimna singi yomnikonj?” Si ton mira yomno da, “Nanyamyamit.” Seg Yesu ten amninonj da, “Kon wen iminjog tamninyin da teks imdayam dide yiyagiyag iyenapu kongga ton opima God ma pumb tungg wa b'igarena wuweny wa wipind.<sup>32</sup> Mop nokip re baptiso Yoan negir kesa dimdimjog nya ouyawam ikonj wa pilwa, si win maka tin gar ke yokatonda, aji teks imdayam dide yiyagiyag iyenapu kongga, tonpiya tin gar ke yokateno. I nangga ma ji da win kea towaina engenda mile yir ongong yiyenonda, aji win makaima waina gar b'engenjindam Godim pilwa dide tin gar ke utkunda ke yokatenya.

### Negir Greip Sopapu Wiko Riga gatab Tendam Yit

*(Mak 12:1-12; Luk 20:9-19)*

<sup>33</sup> “Win kwa utkunda yipa tendam yit! Yipa gou yonggyam yibnonj. Si ton ket greip nangg itot eyeninonj tina gowind, i sopapund kotal eror yiyenonj, i greip kip ungka gasa oramitam kip yoskonj, i dide sopapu yir ipkam yipa pumbpumb met yoronganj. Seg re ket ton ninda sopapu wiko riga kima yitnono aento dide tirir yomno da, ‘Ra kip win okas dem, yonggyam opima sopapu

mira greip kip takasiny dem.' Yit seg ke ton ket sopapu towa akainonj dide menon yokatonj b'enga kantri wa. <sup>34</sup>Si re greip kip win wus wa auka ikonj, itemb yonggyam tina wiko riga etmikisinonj opimemb sopapu wiko riga wa pilwa mira greip kip okatam. <sup>35</sup>I sopapu wiko rigap yonggyamimna wiko riga emdito, seg ton ket yipa yipowo, i yipa yongando i dide yipa gimo ke uj tama na yidriko. <sup>36</sup>Si yonggyam kwa b'usaya jogjog b'enga wiko riga etmikisinonj aji ma odede riga pis na it re naska re dide. Aji sopapu wiko rigap kea ija na yipa wip ke opimemb wiko riga omnika eyento rija na re naska re dide. <sup>37</sup>Seg itemb Yonggyam kikitum tinajog b'iga yitmikitonj towa pilwa odede nony kima da, 'Ton opima koina b'igand isnai dem.' <sup>38</sup>Aji re onggit sopapu wiko rigap towa yonggyamimna b'iga yir yongo, ton towalenggyam apurento da, 'Itemb b'iga re tina sopapu owabinta riga e. Si b'ogil e, men tin yangandu. I men idenatemb ket itemb sopapu okasu rinte ra ton owabinjis.' <sup>39</sup>Seg ton ket tin yokato dide ket yiskanto greip sopapu bau wa, ngirpu uj tama na yongando. <sup>40</sup>Si onggit paemb ra ket itemb greip sopapu yonggyam ik, nangga e ket ton omnik onggit sopapu wiko riga wa pilwa?" <sup>41</sup>I ton Yesund mira yomno da, "Ra itemb yonggyam ik dem, ton opima onggit negirjog sopapu wiko riga nenegir kana uj tandrikiny dem. Seg ton ket kwa greip sopapu takainy dem b'enga sopapu wiko riga wa yepim ra b'obogil sopapu mira greip kip ti ogonenenanj ita erngoka winind." <sup>42</sup>I ket Yesu ten amninonj da, "Ma win maka odede yitkak agenkitondam yina peband, ite re da,

'Yipa Motir, met oranga rigap b'isayo met orangam,  
aji God ket yimta ke met wugind yoramitonj onggit met emorkam.  
Si Ton ket iminjog isnawa kima Motir na awonj onggit met oranga wingirind.

I itemb re Yonggyam Godim pilkaemb ji aukonj,  
si kwa itemb re otomantijog na aukonj mera yirind'?

<sup>43</sup>Si onggit paemb Kon wen tamninyin da God ita wa pilke Tina pumb tungg ewaikis dem, dide ket Ton ita itemb Tina pumb tungg takainy dem yipa b'enga bobo riga wa yepiya ra onggit Tina pumb tungg ririrind gar ke utkunda mile omnika teyenanj. <sup>44</sup>Si yet ra sap totenj onggit Motir kumbind, ton ita kak tiposik. I ya kumb nat ra itemb Motir sap totenj, onggit Motirit ita tin iimik dem."

<sup>45</sup>Si opimemb yina mopyam si rigap dide Parisai rigap Yesumna tendam yit utkundeno, ton kea nony aukito da, "Ton sina tendam yit ke nomneniny." <sup>46</sup>Si opimemb Ju riga waina wip iyoi rigap singi aukito Yesund yimind okatam. Aji ton riga bobo na moga uwadto, mop nokip komkesa rigap Yesund iminjog kena yokateno da, "Ton re God ma yipa bageyam e."

**Molkongga Omnam Diyamdiyam gatab Tendam Yit**  
(Luk 14:15-24)

**22** <sup>1</sup>I Yesu b'usaya tendam yit riga wa usekainonj da, <sup>2</sup>"Si pumb tungg re yipa wip e odede yipa king kima yet re ti b'igamna

molkongga omnam ukoi diyamdiyam yongonjenonj. <sup>3</sup>I itemb king tina wiko riga etmikeninonj ara emokam yama na re ton naska yit etmikenainonj obai omnam onggit diyamdiyampu wa, aji ton maka singi aukito demb de menonim. <sup>4</sup>Si ton kwa b'usaya ket ninda b'enga wiko riga etmikeninonj odede yit kima da, 'Win onggit ingauki riga wa odede yit tusekaindam yama na re kon naska yit etmikenainond da, "Yir de, koina diyamdiyam re ongonjeni e yibim, si kon kea leoyam dide mogyatyam gayagaya kau agninyin dide komkesa gasa kea angonjeninyin. Si tuyit onggit molkongga omna diyamdiyampu wa." ' <sup>5</sup>Aji opimemb tina ingauki rigap yig nony na aento. Si yipa yikonj tina sopapu wa, i daka yipa yikonj re tina wikopu wa wulkip omniam. <sup>6</sup>I opimemb ninda komb ingauki rigap onggit kingimna wiko riga yimind usunatto dide ket nenegir kana ipowa eyento, ngirpu uj andrikto. <sup>7</sup>Si itemb king ma sobijog na soro awonj, i ket tina geja riga etmikisinonj. Seg onggit geja rigap kea ket opimemb ingauki riga nenegir kana uj ondrika eyento yepiya re kingimna wiko riga uj andrikto, dide ket towaina taun kupkakupka so omnika eyenawo. <sup>8</sup>Seg itemb king tina wiko riga amninonj da, 'Molkongga omna diyamdiyam re ongonjeni e yibim, aji yama na re kon naska yit etmikenainond obai omnam, ton re ket makwa ririrkipjog im onggit diyamdiyampu wa menonim. <sup>9</sup>Si onggit paemb win wuwene sobea dedag nata rokasim re jogjog riga wekeny, dide ket win ingaukam riga odarka teyenindam. I ra ket win riga tadarkindam ingaukam, si win ket ten ara emoka teyenindam onggit molkongga omna diyamdiyampu wa.' <sup>10</sup>Seg ket opimemb wiko riga wuwenonj sobea nata, i ket komkesa negirjog riga dide b'ogil riga adarkito, i dide ket opimemb riga bobo omnika eyento yena re ton adarkito. Seg re ton opimemb ingauki riga teito de molkongga omna diyamdiyampu wa. Si opimemb diyamdiyampu kasa re kea yindangirjog aukito. <sup>11</sup>Aji re itemb king b'igaronj diyamdiyampu wa ingauki riga itapnenam, si ton ademb ket yipa riga yir yongonj yet re maka molkongga omna diyamdiyampu wa menonim ririrkipjog kobirgim b'ikokoj. <sup>12</sup>Si onggit kingit tin yigekitonj da, 'Kor riga! Man maka molkongga omna diyamdiyampu wa menonim ririrkipjog kobirgim b'ikisit. Si ridede nya kena man b'igaret dikind?' Aji itemb riga re yit kesa na tu b'ipminti yibnonj. <sup>13</sup>Seg ket itemb king diyamdiyam ongonjena riga amninonj da, 'Itemb riga yim ake pis yijobika. I ket tin bau wa yiska de sibib pipmet wa rokasim re riga yii kamil b'yowa wuweny dide kopa b'angnena kima or b'iinika wuweny.' <sup>14</sup>Si pumb tungg gatab toda ija emb ji da God jogjog riga im ingauka eyeniny, aji ma jog riga im obagika eyeniny pumb tungg wa b'igarkam."

**Kaisam pilwa Teks Oramka gatab Otonkena Yit**  
(Mak 12:13-17; Luk 20:20-26)

<sup>15</sup>Seg ket Parisai rigap itemb pipmet yiraro i ket yit isamka yiyeno, nokim da idenat ton b'anyginena nya ke Yesumna negir yit okasi dide

onggit Tina yit ke Tin negir omnyi. <sup>16</sup>I re ton isamka seg yomno, ton ket towaina b'auyaena riga yipand ninda Erodimna yimta undoka riga kima etmikurto Yesum pilwa odede yit kima da, “Ouyaena riga! Sin wumir im da Man iminjog riga et, dide Man God ma nya nena im iminjog auyaenyit. I Man makwa ita yena moga yuwadenenyit. Mop nokip Man makwa gim kaim riga wa pilind bu b'iyena mile amnikeneninyit aji komkesa riga yipa ririrkip im dimdim amnikeneninyit. <sup>17</sup>Si onggit paemb be Man sin wumir nomnine. Si ringma, Roma kantri mopyam king Kaisam teks ogonam, ton b'ogil e o ma b'ogil e?” <sup>18</sup>Aji Yesu kea towaina nenegir isamki mile wumir awonj, si ten amninonj da, “Win gim ke b'ogil aji ngor wa negir riga! Nangga pae win negir nya ke Ken otonkena niyena? <sup>19</sup>Win Kor yipa koin nouyawa rinte re win teks oramitam yiyenena!” Si ton ket yipa Roma kantri wulkip, Denari koin Yesum itiyawo. <sup>20</sup>Seg ket Yesu ten arkisinonj da, “Yaina wip e dide nyi e iriki i ji onggit wulkipind?” <sup>21</sup>I ton ket mira yomno da, “Roma kantri mopyam king Kaisamna i.” Seg ket Yesu ten amninonj da, “Si onggit paemb win Kaisam ogonindam nangga im re Kaisa ma ogenaya gasa, aji Godim ogonindam nangga im re God ma ogenaya gasa.” <sup>22</sup>I re opimemb riga onggityam yit utkundento, ton ma sobijog na kid kesa aukito. I ton ket Yesund yiraro dide ket dea ta wuwonj.

**Uj ke Utnyita gatab Otonkena Yit**  
(*Mak 12:18-27; Luk 20:27-40*)

<sup>23</sup>I itaemb onggit bibirind, Sadukai riga tuwonj Yesum pilwa yepiya re apurenento da, “Riga ma opima uj ke tutnikanj dem.” I ton ket Yesund yerkito da, <sup>24</sup>“Ouyaena riga! Mose yindeny da, ‘Ra yipa riga uj tainy dide ti konggand tirar b'iga oraki kesa, ti nanyit o ti yingganit tokas itomb mik i ti nanyimna o ti yingganimna nyi kima im b'iga tarakiny.’ <sup>25</sup>Si kea dikind sowa wingirind ninda seben (7) nanyingganwar wekenonj. I nanyam rigat yipa kongga wokatonj i ket uj awonj. Aji ton maka b'iga arakinonj dide ket tina mik wiraronj ti yingganim okatam. <sup>26</sup>Si todaka ija na yipa wip nya ke nimogim b'iga awonj, i dide kwa didea nowam b'iga awonj ngirpu ama re sebenim (7) b'iga wa. <sup>27</sup>Seg ket kikitumjog itomb kongga todaka uj awonj. <sup>28</sup>Si onggit paemb ra uj riga wa utnyita win ik dem, itomb kongga onggit seben (7) nanyingganwar wingirind yama iminjog kongga tainy dem? Mop nokip komkesa seben (7) nanyingganwarip kea itomb kongga towa konggam b'isatena tiyo.” <sup>29</sup>Si Yesu ket ten mira amninonj da, “Win yina peba dide kwa daka Godimna danda ma wumir im wekenyit, si onggit paemb win uj ke utnyita gatab negir nya kae wumir yokatenya. <sup>30</sup>Mop nokip ra utnyita win ik dem, riga ma opima kongga okata mile dide leo okata mile tamnikanj dem, aji ija imemb ji tekeny dem ringmim re aneru wekeny pumb tungg wa. <sup>31</sup>Si ringma, ma win maka yina peband agenkitondam onggit uj riga utnyita gatab yit rina re God wumir amninonj odede da, <sup>32</sup>‘Kon re Abraamimna

God en, i Isakimna God en, i dide Yakobimna God en? I opimemb riga re yilo im wekeny de pumb tunggind. Si God re ma uj rigaina God e aji yilo rigaina God e.”<sup>33</sup> Si re riga bobop itemb yit utkundeno, ton ma sobijog na kid kesa aento Tina ouyaena gatab.

**Yesumna Ukoijog B'ingawa Yit**  
(*Mak 12:28-34; Luk 10:25-28*)

<sup>34</sup>I re Sadukai rigap uj ke utnyita gatab yit utkundento Yesum pilke, ton kea yit kesa aukito. I re Parisai rigap utkundo odede yidir yit da Yesu kea Sadukai riga yit kesa amniny, si opimemb Parisai rigap kea ton nena b'eomto. <sup>35</sup>I ket Parisai riga wingirind yipa gog yit wumirjog rigat Yesund yotonkenonj odede b'arkita kima da, <sup>36</sup>“Ouyaena riga! Komkesa gog yit wingirind ringgityam e ukoijog b'ingawa yit yibim?” <sup>37</sup>I ket Yesu mira yomnonj da, “Man moina Yonggyam Godind singi yiyene moina kupkakupka kid ke, i moina kupkakupka wingawinga ke, i dide moina kupkakupka nony ke!” <sup>38</sup>Si intemb ji ukoijog dide naskajog b'ingawa yit yibim. <sup>39</sup>I ket nimogim b'ingawa yit intemb ji da man singi yiyene mor rigand mada re dide! <sup>40</sup>Si komkesa gog yit dide bageyam waina yit b'atomkanj re osiemb nimog b'ingawa yit kai.”

**Dawid ma B'iga gatab B'arkita Yit**  
(*Mak 12:35-37; Luk 20:41-44*)

<sup>41</sup>I re Parisai riga b'eomto yipand, Yesu ket ten arkisinonj da, <sup>42</sup>“Win ridede im nony aindam Kerisom gatab? Si Ton yaina b'iga e?” I ket Parisai rigap Tin yismonggawo da, “Si Ton re Yonggyam Dawidimna B'iga e.” <sup>43-44</sup>Seg Yesu ten amninonj da, “Si re Yinayina Wingawinga b'imuronj Dawidim pilind yit opurenam, ton kea odede yindonj da,

‘Yonggyam God yindeney kor Yonggyamim pilwa da,

‘Omite Koina yimjog yim tab ke juwai kima pipmetind,  
ngirpu ra ket Kon Moina komkesa geja riga gou wa tamninyin dem  
dide taramisinyin dem Moina pis wirand Moina danda  
ondratenam towa kumbind!’”

Si ridede pena Dawid ti Yonggyam ke Kerisond yogenayonj? <sup>45</sup>Si onggit paemb rada Dawid kea Kerisond ukoijog nyi ke yogenayonj da ‘Kor Yonggyam’, si ridede nya kae Keriso Dawidimna b'iga tainy? Si Ton re Dawidimna B'iga e aji kwa ti Yonggyam e.” <sup>46</sup>Seg makwa yipa rigat ket ririr na awonj Tin yit ismonggaenam. Si onggit bibir kenaemb ket makwa ngai yipa rigat moga kesa aenonj Tin erkenam.

**Yesu Ju Riga Waina Gog Ouyaena Riga dide Parisai**  
**Riga Nonony Amninonj**

(*Mak 12:38-39; Luk 11:43, 46; 20:45-46*)

**23** <sup>1</sup> Seg ket Yesu riga bobo dide Tina b'auyaena riga amninonj  
<sup>2</sup> odede da, “Ju riga waina gog ouyaena rigap dide Parisai rigap



Mosemna gog yit ouyaena eyenanj re Godimna juwai okai riga pila im. <sup>3</sup>Si onggit paemb win b'ogla komkesa towaina yit ririrind b'itngaenindam dide yimta tundokindam nangga mana ra ton wen tamnenanj. Aji goro towaina omnika mile ririrind tamnikenenindam. Mop nokip ton re opurena nena im amnikenenanj aji ma opima towaina opurena ririrind mile amnikenenanj. <sup>4</sup>I kwa ton bebigbebig gog yit amnikenenanj dide ket riga wa pilwa oramka eyenenanj yimta undokam. Aji ton towalenggyam re ma opima singi aukenenanj towaina yimkurup ingaenam opimemb towaina omnika gog yit yimta undokam. <sup>5</sup>Aji ton komkesa wiko amnikenenanj re nok mim da idenat rigap ten yir tangranj. Mop nokip ton moppet boks dide yimpet boks ukoi im omnika eyenanj rokasim re onggit borand ninda yina peba yitkak wekeny, i ton towaina yir opmitena kobirgim pinpin omnika eyenanj riga wa ouyawam da ton re Godim pilwa kupkakupka yirkokar b'akai riga im. <sup>6</sup>I kwa daka ton opima ukoi singi aukenenanj ukoi jog isnawa kima pipmet okatenam ukoi diyamdiyampu pipmet nata dide kwa wip ke ukoi jog rigaina pipmetind omitenam meraina yir opmitenapu met nata. <sup>7</sup>I dide kwa ton opima ukoi singi aukenenanj ukoi isnawa kima simesime okatenam maket nata dide kwa da rigap ten ukoi nyi riga ke ogenaya teyenanj da 'Ouyaena Riga'. <sup>8</sup>Aji goro wen odede ukoi nyi riga ke ragenaine da 'Ouyaena Riga', mop nokip wa inta yipaina nena Ouyaena Riga aji win komkesa re gar ke utkunda ke nanyingganwar im. <sup>9</sup>I kwa goro win yipa rigand wa b'u ke ogenaya onggit gowukoyind, mop nokip wa inta yipaina nena B'u ebnu yete re pumb tungg wa yibim. <sup>10</sup>I dide goro kwa rigap wen odede nyi ke ragenaine da Mopyam Ouyaena Riga, mop nokip wa inta yipaina nena mopyam ouyaena riga, ite re Keriso. <sup>11</sup>Si wa wingirind ukoyam re wanim wiko riga e. <sup>12</sup>I yet ra tilenggyam pumb wa b'utuwatweny, God ita tin gou wa omneny. I kwa yet ra tilenggyam gou wa aena ikeny, God ita tin pumb wa urowatweny.

**Yesu Towaina Gim ke B'ogil aji Ngor wa Negir Mile gatab Sake Yit Amninonj**  
(Mak 12:40; Luk 11:39-42, 44, 52; 20:47)

<sup>13</sup>"Ju riga waina gog ouyaena riga dide Parisai riga! Win re gim ke b'ogil aji ngor wa negir mile riga im. Si God ma sake win kima. Mop nokip winte riga wa wip ke mora utwangka yiyenya riga wa b'igarenam de pumb tungg wa. Si wida walenggyam makwa opima b'igarena wuwenyit dide kwa win makwa opima enjikenindam riga yepim re singi aenanj demb de b'igarenam. <sup>14</sup>(Awir e)"

---

<sup>n</sup> 23:14 Ninda Grik peband da [Ju riga waina gog ouyaena riga dide Parisai riga! Win re gim ke b'ogil aji ngor wa negir riga im. Si God ma sake win kima. Mop nokip win mik kongga waina met dide gasa endwatanenindam, dide riga wa pilke isnawa okatenam pinpin kana yir opmitenenindam. Si onggit paemb win opima ukoi jog negir mira takatenindam dem b'isagika winind.]

<sup>15</sup>“Ju riga waina gog ouyaena riga dide Parisai riga! Win re gim ke b'ogil aji ngor wa negir mile riga im. Si God ma sake win kima. Mop nokip win sipa wa dide gil wa wuwenenyit re yipayipa riga il ongka mim waina ouyaena yimta undokam, i yena ra win odarya, si win ket waina ouyaena nya kae tin ukoi jog negir mile rigam yomnikenenya ukoi jog b'idgotnena okatenam de wul tungg wa aji win re ma ngai odede b'idgotnena e okatenya dem ton re dide.

<sup>16</sup>“I kwa win re yirdidi wang iyena riga im. Si God ma sake win kima. Mop nokip win riga auyaenenindam da, ‘Yet ra danda kima tirir yit opulis yinamet nyi kima, itemb re makwa nangga gog e yibim. Aji yet ra danda kima tirir yit opulis yinametimna gold nyi kima, itemb re iminjog gog e yibim.’ <sup>17</sup>Win korirkorir im dide yirdidi riga im. Si rinte ukoi jog yibim, gold e o minda yinamet e? Ma si ma yinamette itemb gold yinam yomnikeneny? <sup>18</sup>I kwa win ija emb ji riga auyaenenindam da, ‘Yet ra danda kima tirir yit opulis yina si omnikapu kap nyi kima, itemb re makwa nangga gog e yibim. Aji yet ra danda kima tirir yit opulis Godim si gasa nyi kima, itemb re iminjog gog e yibim.’ <sup>19</sup>Win yirdidi riga, si rinte ukoi jog yibim, Godim si gasa e o minda yina si omnikapu kap e? Ma si ma itemb yina si omnikapu kapte komkesa si gasa yinam amnikeneniny? <sup>20</sup>Si onggit paemb yet ra danda kima tirir yit opulis yina si omnikapu kap nyi kima, si ton danda kima tirir yit yopulis re ma yina si omnikapu kap nyi kima nena e aji daka kwa komkesa gasa nyi kima im rinsim re wekeny onggit yina si omnikapu kap kumbind. <sup>21</sup>I kwa yet ra danda kima tirir yit opulis yinamet nyi kima, si ton danda kima tirir yit yopulis re ma yinamet nyi kima nena e aji daka kwa tina nyi kima e yete re wimena yikeny yinametind. <sup>22</sup>I kwa daka yet ra danda kima tirir yit opulis pumb tungg nyi kima, si ton danda kima tirir yit yopulis re ma Godimna wip omnenapu kasa nyi kima nena e aji daka kwa tina nyi kima e yete re onggit wip omnenapu kasand omi yibim.

<sup>23</sup>“Ju riga waina gog ouyaena riga dide Parisai riga! Win re gim ke b'ogil aji ngor wa negir mile riga im. Si God ma sake win kima. Mop nokip win odede sobijog jog gasa nena im ten (10) ikalki wingirind yipa tab Godind wulpok yomnikenenya, opi re b'eag, wingarom o kima, aji win odede gog yitimna ukoi jog b'ingawa yit im nony ke ewaenenindam, opi re komkesa riga yipa ririrkip omnika mile, riga kear omna mile, i dide nony b'ijawa mile. Si win b'ogla opimemb b'ingawa yit b'obogil tamnikenenindam aji goro nony ke tewaenenindam! <sup>24</sup>Win yirdidi wang iyena riga, si win God ma sobijog jog yitkak im yimta undokenenindam odede wip im ringmim re rigap kapo bora ke ngemba b'iga apekenenanj nyi onayam, aji God ma ukoi jog yit im nony ke ewaenenindam odede wip im ringmim re rigap kapo borand ukoi b'angga kamel kupka emkurenenanj.

25 “Ju riga waina gog ouyaena riga dide Parisai riga! Win re gim ke b'ogil aji ngor wa negir mile riga im. Si God ma sake win kima. Mop nokip win gim ke mile im b'obogil amnikenenindam odede wip ringmim re rigap kapo ake disi bau ke b'obogil esekenenanj, aji waina gar re nonygor mile dide negirjog mile ke yindangir im wekeny. 26 Win yirdidi Parisai riga! Win naska waina kapo kuwar b'obogil esekinam, si ingkaimemb ket bau ke todaka kwa kilkesa taukanj.

27 “Ju riga waina gog ouyaena riga dide Parisai riga! Win re gim ke b'ogil aji ngor wa negir mile riga im. Si God ma sake win kima. Mop nokip win re odede b'obogil ispiki gopmet pila riga im rinsim re bau ke b'obogil pitakipind kilkesa wekeny, aji wingir ke re yindangir im wekeny uj rigaina kak ke dide itkiki ujgim ke. 28 Si widaka re odede yipa wip nya kaim riga wa wipind gim ke pita aukenenindam negir kesa dimdimjog riga pila, aji wingir ke waina gar re yindangir im wekeny gim ke b'ogil aji ngor wa negir mile ke dide nenegirjog mile ke.

29 “Ju riga waina gog ouyaena riga dide Parisai riga! Win re gim ke b'ogil aji ngor wa negir mile riga im. Si God ma sake win kima. Mop nokip win opima bageyam wa b'ogil gopmet arangkaenenindam dide negir kesa dimdimjog rigaina gopmet isnawa kima b'obogil ajgenenindam ninda gasa ke. 30 I win odede endenenindam da, ‘Rako sin wekenond onggit winind re sowa b'uwat wekenonj, sin ma rako yipand b'ingautondam bageyam riga uj ondrikam.’ 31 Si win odede yit ke kea walenggyam b'agenaindam da win re towaina b'igawar im yepiya re bageyam uj ondrika eyento. 32 Si widaka wa b'uwat waina tondon ririrind odede negirjog mile yundwata! 33 Win opimemb girem, win re negir guda kima giremimna b'igawar im. Si win makwa ririr im b'itkenindam dem Godimna b'isagikam pilke rinsim ra wen teskokiny de wul tungg wa. 34 Si onggit paemb Kon opima ninda bageyam i b'ogil multekip riga i dide ouyaena riga tetmikeninyin dem wa pilwa. Si win opima towa wingirind ninda uj ondrika teyenindam dem dide wul b'agbagind idrika teyenindam dem, i kwa win opima ninda iraska teyenindam dem waina yir opmitenapu met nata dide eaukena teyenindam dem yipa taun ke de kwa yipa taun wa. 35 Si onggit paemb ra Godimna b'isagika win ik dem, win opima negir ma mira takasindam dem komkesa negir kesa dimdimjog rigaina kus map rina re win opimemb God ma wiko riga kus egmarkenentondam onggit gowukoyind, ingkek negir kesa dimdimjog riga Abelimna kus ke ngirpu ama re de Barakiyomna b'iga Jakariyamna kus yena re win yongandonda yinamet ake yina si omnikapu kap ganggand. 36 Si Kon iminjog wen tamninyin da riga yepim re yu onggit gowukoyind wekeny, ton opima onggityam negir ma mira takatenanj dem God ma wiko rigaina kus map.

### Yesu ma Gar Kopa Yerusalem gatab

(Luk 13:34-35)

37 “Oo! Yerusalem, Yerusalem! Yete re man bageyam uj ondrika eyeninyit, i opimemb riga gimmo ke uj ondrika eyeninyit yena re God

etmikeniny mor pilwa. Leamogpyam na Kon singi miyenyimin mor b'iga yipand kupokupo omnam odede ringmim ra mogyam paurot tinajog b'iga tama ke tuwopinsiny. Aji man singi kesa na aukenenyimit. <sup>38</sup>Yir de, waina met Yonggyam, God ita wen terariny dem, si waina met ra ket kak e ibim dem. <sup>39</sup>I Kon wen tamninyin da win makwa ita ket Ken b'usaya yir notngya dem, ngirpu ra win tendenindam dem da, 'God ma b'ogil Ton kima yete re Yonggyamimna nyi kima ik.' ”

### God ma Yinamet gatab Bage Yit

(Mak 13:1-2; Luk 21:5-6)

**24** <sup>1</sup>I Yesu ket yinamet yiraronj, i Ton ket menon yokatonj. Si dikinda Tina b'auyaena riga tuwonj Ti pilwa dide ket Yesund ouyawam pumam ke utmurena eyento yinamet dide ninda met yinamet aba wingirind. <sup>2</sup>I Yesu mira amninonj da, “Win opima yir angindam opimemb ukoijog met? Si Kon iminjog wen tamninyin da makwa ita yipa motir ibim dem dikind onggit goujog motir kumbind, komkesa onggityam ukoijog motir opima tosmurkanj dem.”

### Onggit Gowukoi Kikitum Winind B'idgotnena gatab Bage Yit

(Mak 13:3-13; Luk 21:7-19)

<sup>3</sup>I re Yesu Olib dorind omi yibnonj, Tina b'auyaena riga nena Ti pilwa tuwonj dide ket wigawiga yerkiti da, “Wumir nomnine! Riim onggityam mile pita taukanj dem? I ra onggityam komkesa gasa taukanj dem, nanggamog im ji ongwata gasa taukanj dem Moina itenda win gatab dide onggit gowukoi kikitum win gatab?” <sup>4</sup>Si Yesu ket mira amninonj da, “Win b'obogil yir kima tekenyit! Ke rigap wen b'anyginena nya ke wip ramneninem. <sup>5</sup>Mop nokip jogjog riga opima tuweny dem Koina nyi kima, dide jogjog riga ugungatena teyenanj dem odede yit kima da, 'Kon itemb Keriso.' I ton ket jogjog riga onggit b'anyginena nya ke wip tamnenanj dem. <sup>6</sup>I ra win ik dem, win opima tutkundenindam dem tiriba geja yit dide tiriba geja gatab bage yit. Aji win yir kima na tekenyit dide goro moga taininam dem. Mop nokip onggityam gasa opima taukanj dem, aji itemb re ma kikitum win e. <sup>7</sup>I b'engabenga yitam opima gejam owinka tuweny dem ninda b'enga yitam kima. I kwa daka kantri b'engabenga opima gejam owinka tuweny dem ninda b'enga kantri kima. I opima ukoijog sou win pita taukanj dem i dide kwa opima jijig taukanj dem b'engabenga pipmetind onggit gowukoyind. <sup>8</sup>Si ra odede komkesa mile pita auka tuweny dem, itemb re b'idgotnena win otomapu e. <sup>9</sup>I onggit winind ket rigap wen kot wa oramka teyenanj dem b'idgotnena okatam dide wen uj ondrikam, i dide kwa komkesa b'engabenga yitam rigap wen singi kesa tamnenanj dem Koina nyi map. <sup>10</sup>I kwa ket onggit winind jogjog gar ke utkunda riga opima towaina gar ke utkunda mile irarka

teyenanj dem, dide ket towalenggyam towalenggyam kot wa b'aramka tuweny dem i towalenggyam towalenggyam singi kesa b'amnena tuweny dem. <sup>11</sup>I kwa jogjog b'anyginena bageyam pita auka tuweny dem, i ket ton opima jogjog riga b'anyginena nya ke wip tamnenanj dem. <sup>12</sup>I opima nenegirjog mile b'usmurena tuweny dem, si onggit paemb jogjog rigaina singi b'iyena mile opima ngimbla taukanj. <sup>13</sup>Aji yepiya ra mimkam wimena tuweny ngirpu ama re de onggit gowukoi kikitum win wa, ton ita okasi dem dadal ngirpu kesa yirkokar. <sup>14</sup>I Godimna wiko rigap ita pumb tunggimna b'ogil yirkokar bage yit pitapita omnena iyeniy dem kupka gowukoyind, nokim da idenat komkesa b'engabenga yitam rigap Godimna yir ungata yit okatena teyenanj. Seg onggit win natemb ket gowukoi undwatapu win ik dem.

### Negirjog B'idgotnena gatab Bage Yit

(Mak 13:14-23; Luk 21:20-24)

<sup>15</sup>“I bageyam Daniyel kea ija na yopulitonj da, ‘Ita moga kima negirjog gasa pita tainy dem, si itemb negirjog gasa makwa ririr e ti wimenam yina pipmetind.’ Si yir de, itemb negirjog gasa ita tonyis dem dikind yina pipmetind. —B'ogla ogenka rigat nony rawik— <sup>16</sup>Si onggit winind yepiya ra tekeny Yuda eriyand, win dor wa na mogamoga b'itkenindam dem. <sup>17</sup>I yet ra ton wimenand ibim dem de met papkak kumbind,<sup>o</sup> ton goro kwa nanggamog gasa imdam met wingir wa b'egarik dem. Ton komkesa gasa nony b'edasin dem. Aji ton wanakana b'ek dem. <sup>18</sup>I dide yet ra wikond ibim dem sopapund, ton goro kwa ritend dem tina oramiti kobirgim okatam. Ton itemb kobirgim yerar dem. Aji ton wanakana b'ek dem. <sup>19</sup>Si ukoi kear kima! Onggit winind dem, ngor kima kongga wa dide papa b'iga kima kongga wa pilind opima bebig dem. Nokip ton ma ririr im wanakana b'itkenanj dem. <sup>20</sup>Si win yir topmitenindam da itemb waina b'ikenam win goro ngiwir kima gibiljog winind o Ju riga waina wiram dide yir opmitena bibirind rawik dem. <sup>21</sup>Si ra onggityam win ik dem, ita ukoi jog bebig kima b'idgotnena pita tainy dem. Si odede b'idgotnena re naskand makwa ke yipa pita awonj onggit gowukoyind God ma gowukoi otobarki otomapu ke ngirpu yu, i kwa daka makwa ita pita tainy dem yimta ke. <sup>22</sup>Rako Yonggyam maka onggityam win kut yomnonj, makwa rako yipa rigat yilo okas dem. Aji Ton kea itemb win kut yomnonj Tina obagendi riga map. <sup>23</sup>I onggit winind ra yipa rigat wen tamneniny dem da, ‘Yir de, ite ta Keriso,’ o ‘Yir de, ama ta Keriso,’ si win goro odede yit gar ke utkunda ke takatenindam dem. <sup>24</sup>Si opima b'anyginena Keriso dide b'anyginena bageyam pita taukanj. I ton ukoi kid kesa kima danda

<sup>o</sup> 24:17 Onggit eriyand met papkak re rigaina wimenapu na wekenonj, odede it re mera kisini o met wirand kasa re dide.

wiko dide moga kima danda wiko tamnikanj dem riga b'anyginena nya ke wip omnenam. Aji daka ton kwa opima towaina kupka danda ondratena teyenanj dem, nokim da idenat ton b'anyginena nya ke God ma obagiki riga daka wip tamnenanj b'anyginena nya wa. <sup>25</sup>Si yir kima, Kon naska kana im wen wumir amneninyin. <sup>26</sup>Si onggit paemb ra rigap wen tamnenanj da 'Yir de, Keriso ita de wul kesa tungg wa,' aji win goro wuyim! I ra kwa tamnenanj da 'Yir de, Keriso ita de wingir wa yipa wigawiga rum wa,' aji win goro gar ke utkunda ke itemb yit okata! <sup>27</sup>Mop nokip ra Rigamna B'iga titenj Tina bibirind, Ton ija e wip tainy dem rija e re waral opngindeneny ilemet gatab ke de kwa kemagmet gatab wa. <sup>28</sup>Rokate ra ujjim ibim, yimbyak toda indaima bobo taukanj. Si Tina itenda mile ra pita nate tawik dem riga wa yirind.

**Rigamna B'iga Itenda Win gatab Yit**  
(Mak 13:24-27; Luk 21:25-28)

<sup>29</sup>"Aji onggit winind ra itemb ukoi jog bebig kima b'idgotnena seg tainy, odenja ket,

lomkongga sibib tainy dem,  
dide kwa mobiror awir tainy dem.

I dide iki isoka tuweny dem wub kumb ke,  
dide kwa danda gasa rinsim re pumb wa wekeny opima  
b'utuwongnenanj dem.

<sup>30</sup>I kwa onggit winind dem wub kumbind ita mal pita tainy dem ongwatam da Rigamna B'iga kaemb ik. Si odede natemb ket komkesa gowukoi b'engabenga yitam riga yii b'eagika tuweny dem, i ton ket ita Rigamna B'iga yir iyi dem wub kumb ke menonind moi kumbind ukoi danda kima dide ukoi b'ogil inyomarena kima. <sup>31</sup>I ket itemb Rigamna B'iga ita ukoi jog bibol ara kima Tina aneru tetmikeniny dem onggit gowukoi wa, i dide Tina obagiki riga bobo tamnikanj dem gowukoi komkesa gatab ke, gowukoi ngirpu ke ngirpu ama re wub kumb ngirpu wa.

**Pig Wulim pilke Win Ongwatam Ouyaena Yit**  
(Mak 13:28-31; Luk 21:29-33)

<sup>32</sup>"I Pig wulim pilke yipa tendam yit ouyaena yokata. Si yit ija emb ji da ra wul bia rina re rom kesa rogilkak wekeny gibiljog winind, bodaboda taukanj nyi kima dide sisil wil tikkanj salsal rom kima, si win ingkaemb ongwasya da, 'Kemb momta e pembpemb win.' <sup>33</sup>Si ra win odede gasa yir tangindam dem aukand rinsim re Kon amneninyin, win nony ke ongwasya dem da, 'Rigamna B'iga ke nya nate dide momta e openda mora wa.' <sup>34</sup>I Kon iminjog wen tamninyin da riga yepim re yu onggit gowukoyind wekeny yimta kaim uj taukanj dem, aji naskajog onggityam komkesa gasa

towa liyal im taukanj dem. <sup>35</sup>Si wub ake gou osiya b'eteomnnya dem, aji Koina yitkak makwa ngai opima b'eteomnenanj dem.

**Makwa Yete Wumir Kikitum Bibir dide Win gatab**  
(*Mak 13:32-37; Luk 17:26-30, 34-36*)

<sup>36</sup>“I makwa ita yete wumir onggityam bibir dide win gatab. Pumb tungg aneru toda makwa wumir im, i kwa toda B'iga ma wumir e, aji yipaina B'uta Tinta wumir. <sup>37</sup>Mop nokip ra Rigamna B'iga titenj Tina bibirind, si ija ima mile taukanj dem rija na re mile aukito Nowam winind. <sup>38</sup>Si yimta kena ngiwir ikonj, aji riga re odede yig nony wimena mile nat wekenonj, opi re owowind i onaikand i kongga imdand i dide leo imdand, ngirpu onggit bibirind re Nowa giga wa b'igaronj. <sup>39</sup>Aji ton makwa ke wumir wekenonj nanggamog im taukanj, ngirpu re ket ngiwir ikonj dide ket komkesa riga negir amnikinonj. Si ija imemb ji daka mile pita taukanj dem ra Rigamna B'iga titenj dem. <sup>40</sup>I onggit winind ra Rigamna B'iga pita tainy dem, ra nimog riga yipaina sopapund gilgil waland tebnya dem, Rigamna B'igat yipand ita yii dem de pumb wa, i daka yipand indama irar dem. <sup>41</sup>I kwa ra nimog kongga yipand sana ikmikand tebnya dem, Rigamna B'igat yipand ita wii dem de pumb wa, i daka yipand indama tirar dem. <sup>42</sup>Si onggit paemb win yir kima na tekenyit, mop nokip win ma wumir im ringgit bibir nate wa Yonggyam ik dem. <sup>43</sup>I win wumir im da rada met yonggyam wumir ai e yibim da siwiny onggit win nate yurowamam riga ik tina met wa, ton ma ita yiyag ondras tina met iporkam. <sup>44</sup>Si onggit paemb wida kwa b'ogla b'angonjeni na tekenyit, mop nokip Rigamna B'iga ik ra dem waina ongwati kesa win nate dem.

**B'ogil Nony Ijai Wiko Riga gatab Tendam Yit**  
(*Luk 12:41-48*)

<sup>45</sup>“Si yete ji b'ogil multekip kima nony ijai wiko riga ya yim nat ra ti yonggyam tina met komkesa gasa taramkiny yir iyenam? Si yonggyam ita ket odede nony ijai wiko riga obagenj komkesa tina wiko riga wip omnenam dide towa ita bibir win weanjweanj owou ogonam. <sup>46</sup>Si ton re b'ogil omni wiko riga e yena ra tina yonggyamit tin odar odede yipa wip mile omnikand ra ton titenj. <sup>47</sup>I Kon iminjog wen tamninyin da ti yonggyam ita odede wiko rigand obagenj komkesa tinajog gasa yir ipkam. <sup>48</sup>Aji rada yonggyam yipa negirjog wiko rigand tina komkesa wiko riga dide tina gasa yir ipka mopyamim obagenj, si ija emb ji ton ti nony mana indeny da, ‘Meda kor yonggyam ma wanakana e titenj.’ <sup>49</sup>Si ingkaemb ton ket b'atom odede negir mile omnikam, opi re ti wiko rigamadwar ipowam, i ikpip riga kima owou yiyand wimenam i ik onaika yiyand wimenam. <sup>50</sup>Si onggit wiko rigamna yonggyam titenj ra onggit bibir nate ridenat ra itemb wiko riga maka bibir wumir ibim dide onggit win nate ridenat ra ton maka win wumir ibim. <sup>51</sup>Seg



ti yonggyam ket tin mop owaras dide ket ti pipmet okau ra yipand gim ke b'ogil aji ngor wa negir mile riga kima wimenam rokasim ra riga yii kamil b'iyowa tuweny dem, dide kopa b'angnena kima or b'iinika tuweny dem.

### Ten (10) Pil Esopai kesa Ngimngai gatab Tendam Yit

**25** <sup>1</sup>“I onggit winind ra Yonggyam titenj dem, pumb tungg re ija emb ji tainy opi re ten (10) pil esopai kesa ngimngai pila yepiya re towainajog yipayipa lampa emdito dide ket opekto sisil kongga kima riga wipwip omnam. <sup>2</sup>Si towa wingirind ninda paib (5) re korirkorir na aji kwa ninda paib (5) re b'ogil multekip kima na. <sup>3</sup>I opimemb korirkorir ngimngayip kea towainajog lampa so omniki eito aji ton makwa ke ngai nyi eito lampa ongjikam. <sup>4</sup>Aji daka opimemb b'ogil multekip kima ngimngayip re kea lampa ongjikam nyi eito jirokakind yipand towainajog so omni lampa kima. <sup>5</sup>Aji re onggit ten ngimngayip sisil kongga kima rigand yir yungauko, si itemb sisil kongga kima riga maka wanaka opendonj. Si ket yitpat ten komkesa akasinonj ngirpu ket kea yit wungonj. <sup>6</sup>Seg sidirind ket ara ikonj da, ‘Yir de, itemb ke sisil kongga kima riga ik. Win opekina tin wipwip omnam!’ <sup>7</sup>Si odedend ket opimemb komkesa ten (10) pil esopai kesa ngimngai utnikto dide ket towainajog lampa wikind tim b'iskoka eyento i ket so omnika eyento. <sup>8</sup>I opimemb korirkorir ngimngayip b'ogil multekip kima ngimngai egekitto da, ‘Sowada ngai nyi nokaina lampa ongjikam, nokip sowaina lampa re momta im tosoukanj.’ <sup>9</sup>Aji opimemb b'ogil multekip kima ngimngayip mira amnito da, ‘Ka! Nyi re ma ririr im taukanj dor ririrkip ongjikam sowanim dide wanim. Si win b'ogla wuwe nyi osoga riga wa pilwa dide ket wainajog lampa ongjikam nyi temjindam.’ <sup>10</sup>Aji onggit ganggand re opimemb korirkorir ngimngayip yiwato nyi imdam, odedend ket sisil kongga kima riga ikonj. Si opimemb b'angonjeni b'ogil multekip kima ngimngai yipand itemb sisil kongga kima riga kima b'igarkito molkongga omna diyamdiyampu wa, seg ket wiko rigap kea mora yidoko. <sup>11</sup>I opimemb ket korirkorir ngimngai daka yimta ke tuwonj dide ket endento da, ‘Yonggyam, Yonggyam! Mora sowa yijge!’ <sup>12</sup>Aji itemb sisil kongga kima riga ket ten esmonggainonj da, ‘Kon iminjog wen tamninyin da Kon ma wumir en wanim.’ <sup>13</sup>Si onggit paemb win yir kima na tekenyit. Mop nokip win ma wumir im bibir dide win ridenate ra Rigamna B'iga titenj.

### Yiyag Wurar gatab Tendam Yit

(Luk 19:11-27)

<sup>14</sup>“I kwa ra Yonggyam titenj dem, pumb tungg re yipa wip e tainy odede yipa riga kima yet re tina wiko riga ara emokinonj dide ket towa tina gasa agoninonj yir ipkam, i ingkenaemb ket ton yiwatonj b'enga kantri wa. <sup>15</sup>Si re itemb riga tina gasa agoninonj yir ipkam, ton naska

tina wiko rigaina danda yir eyeninonj dide ket onggit towaina danda ririrind wulkip agoninonj, yipam re paib (5) ukoi gold kipol na, i daka yipam re nimog ukoi gold kipol na, i kwa daka yipam re yipa ukoi gold kipol na. Seg ingkenaemb ket ton yiwatonj. <sup>16</sup>I itemb riga yet re paib (5) ukoi gold kipol akasinonj, ton odenja yikonj dide ket onggit wulkip ke b'obogil wiko amnikeneninonj, ngirpu ton ket onggit wulkip ke kea b'usaya paib (5) ukoi gold kipol tumind akasinonj. <sup>17</sup>I odede yipa wip nya ke itemb riga yet re nimog ukoi gold kipol akatonj, todaka onggit wulkip ke kea b'usaya nimog ukoi gold kipol tumind akatonj. <sup>18</sup>Aji itemb riga yet re yipaina ukoi gold kipol yokatonj, ton ket yikonj dide ket gou yoskonj, ngirpu ton ket onggit gou borand itemb ti yonggyamimna wulkip yegitonj. <sup>19</sup>I giep ke opimemb wiko rigaina yonggyam itendonj dide ket ton yirik eyeninonj ridede na tina wiko rigap opimemb tina wulkip engaenento b'usaya tumind mira oikindenam. <sup>20</sup>Si itemb riga yet re paib (5) ukoi gold kipol akasinonj, ton opimemb tumind oikinti paib (5) ukoi gold kipol kima wulkip teyinonj ti yonggyamim pilwa odede yit kima da, 'Yonggyam! Opimemb ji mor paib (5) ukoi gold kipol rina re nokainot. Yir de, inaemb ji kon kwa paib (5) ukoi gold kipol b'usaya tumind aikinsinyimin.' <sup>21</sup>Si ti yonggyam tin yomnonj da, 'Oo, otomantijog! Si man re b'ogil dide nony ijai wiko riga et. Man kea sobijog gasa yir ipkam nony b'ijawa kima b'obogil wiko yiyenenyimit, si kon men motramisin ra jogjog gasa yir ipka riga ma. Si kon moina yonggyamte nitinjin da man metkim de kor pilwa koina sam yingg okatam.' <sup>22</sup>I kwa itemb riga yet re nimog ukoi gold kipol akatonj, ton osiemb tumind oikinti nimog ukoi gold kipol kima wulkip teyinonj ti yonggyamim pilwa odede yit kima da, 'Yonggyam! Osiemb ji mor nimog ukoi gold kipol rina re nokawot. Yir de, inaemb ji kon kwa nimog ukoi gold kipol b'usaya tumind aikinsmin.' <sup>23</sup>Si ti yonggyam tin yomnonj da, 'Oo, otomantijog! Si man re b'ogil dide nony ijai wiko riga et. Man kea sobijog gasa yir ipkam nony b'ijawa kima b'obogil wiko yiyenenyimit, si kon men motramisin ra jogjog gasa yir ipka riga ma. Si kon moina yonggyamte nitinjin da man metkim de kor pilwa koina sam yingg okatam.' <sup>24</sup>I dide kwa itemb riga yet re yipaina ukoi gold kipol yokatonj, todaka ket ti yonggyamim pilwa ikonj dide ket yomnonj da, 'Yonggyam! Kon wumir en mornim da man re wip inggrawa kesa riga et. Si man erngokeneninyit re ma moina iti kaim, i kwa man bobo amnikeneninyit re ma moina igmarki kaim. <sup>25</sup>Si onggit penaemb kon moga awond, si ket nekond dide ket moina ukoi gold kipol yegitond gou bora wa. Si yir de, itemb ji moina ukoi gold kipol.' <sup>26</sup>Seg ti yonggyam ket mira yomnonj da, 'Si man re negirjog dide dinderkak wiko riga et. Ma man ija naemb kornim wumir awot da kon erngokeneninyin nangga na re kon maka esinond, i kwa kon bobo amnikeneninyin nangga na re kon maka egmarkinond? <sup>27</sup>Si rako man odede wumir awot kornim, si man

b'ogil na rako koina ukoi gold kipol bengk riga wa akawot. Si kon kakoa ingkenaemb koinajog wulkip yokasin onggit wulkip kima it re koina wulkip ke oikinti wewe wulkip. <sup>28</sup>Si onggit paemb win yisata itemb ukoi gold kipol ti pilke dide ket yokawa onggit rigam yete re ten (10) ukoi gold kipol awaminy. <sup>29</sup>Mop nokip komkesa riga yepim re engaananj nangga im re towa pilind ebnainy, God opima b'usaya tumind tagoniny dide ket b'atiikendenanj. Aji yete re maka yingaeny nangga e re ti pilind yibnau, God ita onggityam gasa ewaikis ti pilke. <sup>30</sup>Si win itemb esourena kesa wiko riga yiska bau wa de sibib pipmet wa rokasim ra riga yii kamil b'iyowa tuweny dem, dide kopa b'angnena kima or b'iinika tuweny dem.'

### Mamoi ake Gout gatab Tendam Yit

<sup>31</sup>'I onggit winind ra Rigamna B'iga ik dem Tina b'ogil inyomarena kima dide komkesa Tina aneru kima, Ton ita Tina b'ogil inyomarena kima wip omnenapu kasand tomis dem. <sup>32</sup>I ket anerup komkesa b'engabenga yitam riga Ti wip wa yipand teomkuranj dem, i Ton ket opima onggityam komkesa b'engabenga yitam riga yipayipa isagika teyeniny dem wetaweta omniam, odede ringma ra mamoi yir ipka rigat mamoi wetaweta tamnikiny gout wa pilke. <sup>33</sup>Si itemb mamoi yir ipka rigat opima mamoi oramka teyeniny tina yimjog yim tab ke dide gout tina sawai yim tab ke, si odede yipa wip nya kae itemb Rigamna B'igat Todaka opima negir kesa dimdimjog riga oramka teyeniny dem Tina yimjog yim tab ke dide negir mile riga Tina sawai yim tab ke. <sup>34</sup>Seg ket itemb King opima Tina yimjog yim tab ke riga tamniny dem da, 'Tuyim win Kor B'uimna b'ogil omni riga! I win ket yowabinta pumb tungg rina re God gowukoi otobarkapu ke yongonjenonj wanim okawam. <sup>35</sup>Mop nokip re Kon owoupand nibnond, win kea Ken nongenonda owou ke, i re Kon nyipand nibnond, win kea Ken nyi ke nokikenonda, i dide re Kon tungg tib kesa nibnenond, win kea Ken ningaukenonda waina met wa. <sup>36</sup>I kwa re Kon wi kesa nibnond, win kea Ken kobirgim nikokenenonda, i re Kon kopa nibnenond, win kea odarenam nopenenonda, i re Kon sibibmetind nibnenond, win kea Ken nesmarenenonda.' <sup>37</sup>Seg ket negir kesa dimdimjog rigap Tin omnyi dem da, 'Yonggyam! Ridenat sin Men yir mongonda owoupand i ket mongenonda, o nyipand i ket sin mikikenonda? <sup>38</sup>I kwa ridenat sin Men yir mongenonda tungg tib kesand i ket Men sowaina met wa mingaukenonda, o wi kesand i ket sin mikokenonda kobirgim ke? <sup>39</sup>I kwa daka ridenat sin Men yir mongenonda kopand o sibib metind i ket sin Men mesmarenonda?' <sup>40</sup>I ket onggit Kingit ten tesmonggainy dem da, 'Kon iminjog wen tamninyin da si win nangga mile na onggit sobijogjog Koina gar ke utkunda yingganwar wa wingirind yipa rigam pilind omnika eyentondam, si win re kea Kor pilind omnika eyentondam.' <sup>41</sup>Seg ra ket itemb King opima

Tina sawai yim tab ke riga tamniny dem da, 'Win sake okati riga, Kor pilke ewaikisina! I ket b'aklansinam de ngirpu kesa b'irmatena wul wa rinte re ongonjeni yibim Satanam dide Tina aneru wanim. <sup>42</sup>Mop nokip re Kon owoupand nibnond, win maka Ken nongenonda owou ke, i re Kon nyipand nibnond, win maka Ken nyi ke nokikenonda. <sup>43</sup>I re Kon tungg tib kesa nibnenond, win maka Ken ningaukenonda waina met wa, i re Kon wi kesa nibnond, win maka Ken kobirgim nikokenenonda, i dide re Kon kopand o sibibmetind nibnenond, win maka Ken nesmarenenonda.' <sup>44</sup>Seg ket opimemb negir rigap todaka Tin omnyi dem da, 'Yonggyam! Ridenat sin Men yir mongonda owoupand o nyipand o tungg tib kesand o wi kesand o kopand o sibibmetind, i ket sin maka Men yim mokaenenonda?' <sup>45</sup>I kwa ket itemb King ten tesmonggainy dem da, 'Kon iminjog wen tamninyin da si win nangga mile na onggit sobijogjog Koina riga wa wingirind yipa rigam pilind maka omnika eyentondam, si win re maka Kor pilind omnika eyentondam.' <sup>46</sup>Si opimemb negir riga wui dem de ngirpu kesa negir ma mira okatenapu wa, aji opimemb negir kesa dimdimjog riga ton wui dem de dadal ngirpu kesa yirkokar wa."

**Ju Rigap Yesund Ongandam Yisamko**  
(Mak 14:1-2; Luk 22:1-2; Yoan 11:45-53)

**26** <sup>1</sup>I re ket Yesu opimemb komkesa yit useka seg amninonj, Ton Tina b'auyaena riga amninonj da, <sup>2</sup>"Maeda win wumir im da nimog bibir kak kae meraina Uj igwanti Nony Iyena Diyamdiyam Bibir tainy dem, si idenatemb Rigamna B'igand yimind usunasi dem wul b'agbagind idrikam." <sup>3</sup>I onggit winind ket yina mopyam si rigap dide Ju riga waina elda rigap b'eoma yokato yina mopyam si riga, nyi da Kayapa, tina met aband. <sup>4</sup>I ton ket odede yit yisamko da wigawiga rabem nya ke Yesund yimind usunasi dide ket Tin uj tama onganji. <sup>5</sup>Aji ton endento da, "Ma onggityam diyamdiyam win nate onganju, nokip ke riga wa wingirind soro kima bebig mile rawik."

**Yipa Konggat Ngirangngirang Gaya ke Yesund Yeaukonj**  
(Mak 14:3-9; Yoan 12:1-8)

<sup>6</sup>I yipa winind Yesu yibnonj Simonimna metind Betaniya tunggind yet re naskand leprosi kopa kima yibnonj. <sup>7</sup>I onggit winind yipa kongga Ti pilwa tikonj yipa ukoi mira kima b'ogil ngirangngirang gaya kima yipa otomanti alabasta gimo botolind. I re Yesu diyam awowind yibnonj, onggit konggat kea Ti mopind itemb ngirangngirang gaya yigmarkonj. <sup>8</sup>I re b'auyaena rigap itomb konggamna mile yir yongo, ton kea ket komliu aukito dide endento da, "Nangga pae ton jabakipind yesomnenny? <sup>9</sup>Mop nokip rako ton onggityam gaya yosog, ton keakoa ririr na ukoi jog wulkip akasinny dide ket tagoniny gasa kesa riga wa." <sup>10</sup>Aji re Yesu towaina yit

b'iglenena gatab wumir awonj, Ton ket ten amninonj da, “Nangga ma win onggit konggand bebigim il wongkya? Mop nokip ton kea Kornim b'ogil mile yomnik. <sup>11</sup>Mop nokip gasa kesa riga opima win kima wekeneny ita winind, aji Kon ma ita ita winind win kima nitibnenenyin. <sup>12</sup>Si re itomb konggat Koina jiwind ngirangngirang gaya yigmarik, itemb re Koina ji eungitam get ke b'angonjenam mile emb ji. <sup>13</sup>Si Kon iminjog wen tamninyin da rokate ra God ma b'ogil yirkokar bage yit pitapita omnenenyi dem komkesa gowukoyind, onggit konggamna omniki mile daka kwa ita ket usenenyi dem tinim nony iyenam.”

### **Yudas Tirir Yomnonj Yesund Tib Iyenam**

*(Mak 14:10-11; Luk 22:3-6)*

<sup>14</sup>I onggit winind Twelp (12) itmikitijog riga wingirind yipa riga, ogenaya da Yudas Iskariyot, yikonj yina mopyam si riga wa pilwa. <sup>15</sup>Si Yudas ket egekisinonj da, “Win nangga e kor notkaya, ra kon Yesund wa yim kumb wa oramisn?” Si ton ket ti teti (30) silba koin yokauto. <sup>16</sup>Seg onggit kak kenaemb ket Yudas b'ogil win oraka yiyenonj Yesund okawam towa pilwa.

### **Yonggyam kima Kikitum Diyamdiyam**

*(Mak 14:12-21; Luk 22:7-13, 21-23; Yoa 13:21-30)*

<sup>17</sup>I re Yist kesa Bred Win wingirind, naskajog bibir awonj, b'auyaena riga Yesum pilwa tuwonj dide ket yigekito da, “Rokate Man singi aet sin motngonjenau Mornim owowim meraina Uj Igwanti Nony Iyena Diyamdiyam?” <sup>18</sup>Seg ket Yesu nimog b'auyaena riga engawonj da, “Eka de Yerusalem taun wa, de yipa rigam pilwa dide ket tin omnya dor da Ouyaena Riga yindeny da, ‘Koina win re ke wus nate ainy, si Kon indamaemb moina metind meraina Uj Igwanti Nony Iyena Diyamdiyam omniken Koina b'auyaena rigawar kima.’ ” <sup>19</sup>Seg osiemb b'auyaena riga nimogip ija na gasa amnikinonda rija na re Yesu ten engawonj dide ket Ju riga waina Uj Igwanti Nony Iyena Diyamdiyam yongonjenonda. <sup>20</sup>I re si imokonj, Yesu diyamdiyampu kasand omitonj Twelp (12) b'auyaena riga kima. <sup>21</sup>Si re ton diyam awowind wekenonj, Yesu ten amninonj da, “Kon iminjog wen tamninyin da wa wingirind yipa rigat ita Ken tib nii.” <sup>22</sup>Si b'auyaena rigap gar bebig aukito dide ket yipayipa yigekeno da, “Yonggyam! Ma konten?” <sup>23</sup>I ket Yesu mira amninonj da, “Riga yete re Kon kima gilgil sana okatam yim yoramis de pleto wa, itemb riga tontemb Ken tib nii. <sup>24</sup>Si b'ogil e Rigamna B'iga, Ton uj okas dem ringma re yina peband iriki yibim Ti gatab. Aji onggit rigam yet ra Rigamna B'igand tib yii dor, ukoi kear kima e tinim, nokip ton ukoiyog bebig nate tau dem. Si tinim keako b'ogil na ji rako ton maka ukendonj ti mogim kom ke.” <sup>25</sup>Si Yudas yet ra Yesund tib yii dor Yesund yomnonj

da, “Ouyaena Riga! Rika konten?” Aji Yesu tin yismonggawonj da, “Owi, kemb man minjit.”

### **Kikitum Diyampund Areto**

*(Mak 14:22-26; Luk 22:14-20; 1Kor 11:23-25)*

<sup>26</sup>I re Yesu dide Tina b'auyaena riga diyam auto, Yesu yipa sana nganja yokatonj i Godind siteket yit yomnonj, ngirpu ket yipkikonj dide agoninonj Tina b'auyaena riga wa pilwa. I Ton yindonj da, “Win yokata! Itemb re Koina ji e.” <sup>27</sup>Seg ket Yesu kwa yipa kapo yokatonj dide Godind siteket yit yomnonj, ngirpu ket Tina b'auyaena riga wa kapo akawonj towanim onayam odede yit kima da, “Win komkesa onggit kapond nyi yonaika! <sup>28</sup>Mop nokip itemb kapond nyi re Koina outinti tirir omnijog yit kima kus e rinte re Kon yigmarken jogjog rigaina negir mile awir omnikam. <sup>29</sup>Kon wen tamminyin da Kon makwa ita b'usaya onaen dem onggit greip kip ke omniki wain, ngirpu onggit bibirind ra Kon sisil wain onaen dem win kima demb de Kor B'u God ma pumb tungg wa.” <sup>30</sup>Si diyamdiyam seg ke ton ger yitango dide ket yiwato de Olib dor wa.

### **Petromna Yesund Oena gatab Bage Yit**

*(Mak 14:27-31; Luk 22:31-34; Yoan 13:36-38)*

<sup>31</sup>I onggit winind Yesu ket Tina b'auyaena riga amninonj da, “Yu siwiny win opima komkesa sap totekindam dor dide kak nitiaya dor onggit mile map rinte ra tawik Kor pilind, mop nokip yit ija emb ji iriki yibim yina peband da,

‘Kon ita onganjin dem mamoi yir ipka riga,

si ket opima mamoi bobo wetaweta b'itkenanj dem.’

<sup>32</sup>Aji onggit kak ke ra Kon tutnyisin dem uj ke, si win yimta kaim wuyit dem de Galili wa aji Kon naska e neken dem.” <sup>33</sup>Seg Petro ket Yesund danda kima yomnonj da, “Nangga ma ji ra ton komkesa rigap sap totendanj dor dide kak mitiayi dor onggit mile map rinte ra tawik Mor pilind, aji kon kolenggyam ra makwa ita sap totenjin dor dide kak mitiaen dor.” <sup>34</sup>I Yesu ket tin mira yomnonj da, “Kon iminjog men motinyin da yu siwiny yimta kena pauro ara tuweny dor, aji man naska Ken ita nowapyam notiyenyit dor.” <sup>35</sup>Seg ket Petro Yesund yomnonj da, “Ra Man uj taet, koda b'ogla uj rawin Man kima. Aji kon makwa ita motiyenyin.” I komkesa b'auyaena rigap toda ija na yipa ririrkip endento.

### **Yesu ma Yir Opmita Getsemanind**

*(Mak 14:32-42; Luk 22:39-46)*

<sup>36</sup>I re Yesu Tina b'auyaena riga kima menon yokato yipa pipmet wa nyi da Getsemani, Yesu ten amninonj da, “Kon ama de neken dide yir e topmitenyin. Si win omandemb omniki wekene, ngirpu ra Kon titenjin

wa pilwa.”<sup>37</sup>I Yesu ina riga eyinonj Ton kima Petro dide Jebedaimna b'iga nimog. Seg Ton ket ngor wa gar kopa dide gar bebig b'atomonj.<sup>38</sup>Seg ket Ton ten amninonj da, “Koina wingawinga ma sobijog gar kopa e ainy momta uj okatam. Win wekene dikind dide yipand Kon kima yir opngiki wekene!”<sup>39</sup>I re ingkek ket Ton sobijog paja wa b'isonkitonj, Ton ket kum ujokonj dide ket wip gou wa yomnonj, seg ket Godim pilwa yir opmitenonj da, “Kor B'u! Si Man onggityam Koina b'idgotnena kapo yewaikite Kor pilke, rada itemb ririr e. Aji goro Koina singi ke, aji Moina singi kena.”<sup>40</sup>Seg ket re Ton ket itendonj nowa b'auyaena riga wa pilwa i yutunga nat ten adarinonj. Seg Ton ket Petronj yomnonj da, “Ringma, wa awir im danda yipa odede sobijog winind yipand Kon kima yirkokar wimenam?”<sup>41</sup>Yir opngiki wekene, dide yir opmitenina! Nokim da idenat maka win Satanamna otonkena takatenindam. Waina wingawinga ukoi singi im Kon kima yirkokar wimenam, aji waina ji re yarim im dide danda kesa im.”<sup>42</sup>Onggit kak ke Yesu b'usaya nimogim yikonj dide yir opmitonj da, “Kor B'u! Rada itemb ma ririr e onggityam b'idgotnena kapo ewaikitam Kor pilke dide rada Kon b'ogla itemb kapo onaen, si Moina singi b'ogla rawik.”<sup>43</sup>I re Ton kwa itendonj opimemb b'auyaena riga wa pilwa, Ton b'usaya adarinonj towa yutungand. I towaina yirkip re bebig na yutitip wekenonj. Si onggit penaemb ton yit wungonj.<sup>44</sup>I ket Yesu opimemb b'auyaena riga erarinonj dide ket b'usaya dea de yikonj. Seg ket re Ton nowam yir opmitonj Godim pilwa, Ton ina yipa wip yit usaireninonj rija na re Ton naskand yerkenonj.<sup>45</sup>Seg ket Yesu itendonj b'auyaena riga wa pilwa, Ton ten amninonj da, “Win yutunga dide wiram nasim dadal wekenyit. Yir de, win re kemb momta e. Yipa riga ke Rigamna B'iga tib yii negir mile riga wa yim kumb wa.”<sup>46</sup>Utnikinam, men ket wowin Kor tib iyoyam rigam pilwa! Yir, itemb ke ton ik Kor wus wa.”

### **Rigap Yesund Yimind Yusunato**

*(Mak 14:43-50; Luk 22:47-53; Yoan 18:3-12)*

<sup>47</sup>I ket onggit winind re Yesu didea yit opurenand yibnonj, Twelp (12) b'auyaena riga wingirind yipa riga Yudas yina mopyam si riga dide Ju riga waina elda riga wa pilke ikonj yipand ukoi riga bobo kima yepiya re geja giri dide kibam yimind teito.<sup>48</sup>I itemb Yesumna tib iyoi riga, Yudas kea towa pilwa wumir yoramitonj da, “Ra yena ra kon ikwasin dor omongnena kima, itemb ji riga. Si win Tin b'obogil yimind usunasya dor.”<sup>49</sup>Si re Yudas ikonj Yesum pilwa, ton odenja Yesund yomnonj da, “Ouyaena Riga, simesime!” dide ket Tin yomongnenonj.<sup>50</sup>Seg ket Yesu tin yomnonj da, “Kor riga! Nangga singi mile nat metket re yomni!” I odedend ket rigap Yesum pilwa b'isonkurto i ket Ti pilind yim aramkito i dide ket yimind yusunato.<sup>51</sup>I odedend ket Yesumna b'auyaena riga



wingirind yipa rigat tina geja giri yitringatonj metkak ke, i ket yina mopyam si rigamna wiko riga ma yipa yipya rom yipmarkitonj dide ket gou wa isendonj. <sup>52</sup>Seg Yesu ket tin yomnonj da, “Moina geja giri yoramite tina metkak wa. Mop nokip komkesa riga yepim re geja giri engaananj, ton opima geja giri ke uj taukanj. <sup>53</sup>Ma win ma wumir im da Kon ririr e Kor B'und igekisin da, ‘Man twelp (12) ukoi geja aneru bobo tetmikisinyit Kornim irmekam,’ i Ton odenja im ket tetmikisinyi? <sup>54</sup>Aji ra Kon Kor B'und igekisin geja aneru itmikitam, si ridede nya kae opimemb yitkak ririrkip taukanj rinsim re yina peband Kor gatab iriki wekeny da b'ogla odede mile raukinem?” <sup>55</sup>I onggit win natemb ket Yesu opimemb riga bobo amninonj da, “Ma win Kena okatam notupya geja giri dide kibam kima odede wip ringma ra win raskol riga okasya? Bibir weanjweanj Kon wa ouyaenand omi nibnenenyimin yinametind, aji win maka Ken yimind nusunasma. Aji win Ken otade odede nya ke nokasya. <sup>56</sup>Si komkesa onggityam mile aukanj re nok mim da idenat opimemb bageyam waina iriki yitkak ririrkip taukanj.” Seg ket komkesa b'auyaena rigap Yesund yiraro dide b'ikento.

### **Yesu Onyitonj Ju Riga Waina Memba Wipind**

*(Mak 14:53-65; Luk 22:54-55, 63-71; Yoan 18:13-14, 19-24)*

<sup>57</sup>I riga yepiya re Yesund yimind yusunato, ton ket Yesund yiyo yina mopyam si riga Kayapam met wa, rikind re Ju riga waina gog ouyaena riga dide Ju riga waina elda riga yipand b'eomkurto. <sup>58</sup>Aji Petro kea Yesund pajapaja yimta undoka yiyonj ngirpu ama re yina mopyam si riga ma met kara mora dunda wa. I ton ket kara wingir wa b'igaronj dide ket ninda yinamet yir ipka riga kima yipand omitonj yir ongongimangga e tawik Yesum pilind. <sup>59</sup>I re kot yipangendo, yina mopyam si rigap dide komkesa Ju riga waina Sanedrin membap Yesum gatab ijongki yir ungata yit oraka eyento ridede nya kae Tin onganji. <sup>60</sup>Nangga ma ji da jogjog b'anyginena yir ungata riga tuwonj Yesum gatab yit ijongkam, aji makwaangga yit na adarkito. Aji yimta ke nimog yir ungata riga tetkonda <sup>61</sup>i ket endenonda da, “Onggit rigat yindenonj da, ‘Kon ririr e Godimna yinamet iporken dide nowa bibir kima b'usaya orangen.’ ” <sup>62</sup>Seg re ket yina mopyam si riga onyitonj riga wa wipind, ton ket Yesund yerkitonj da, “Nangga pae Man maka mira nomninyit? Ropim Mor pilke yit onggityam negir yir ungatena yit gatab rinte re nimog rigap Mor pilwa iya?” <sup>63</sup>Aji Yesu re mumakesa na yibnonj. Si ket itemb yina mopyam si rigat Tin yomnonj da, “Si kon yilo Godimna nyi kima Men mitngaen da Man b'ogla danda kima tirir yit opulisit sowa pilwa. Rika Man iminjog Keriso, Godimna B'iga et?” <sup>64</sup>I ket Yesu tin mira yomnonj da, “Si kemb man mindenyit. Aji Kon iminjog wen tamninyin da, ‘Otade ke win ita Rigamna B'iga yir ongya

omiti Komkesa Dandam Rigib Rigamna yimjog yim tab ke juwai  
kima pipmetind

i kwa menonind moi kumbind wub kumb ke.’ ”

<sup>65</sup>I re yina mopyam si rigat Yesu ma yit utkundonj, ton kea ket soro kima tina kobirgin yinyowendonj dide ket ton riga amninonj da, “Nangga mim men ket kwa yir ungata yit arakindam Ti gatab? Yir de, otade win kea Ti pilke Godind isadrena yit utkunja. <sup>66</sup>Rija im win nony aindam?” I ket rigap tin yismonggawo da, “Tina negir map uj yek.” <sup>67</sup>Seg ton ket auya ke Yesumna wip itmanda yiyeno dide ket yimkik ke Tin ipowa yiyeno. I nindap ket ana ipokena yiyeno odede yit kima da, <sup>68</sup>“Keriso, man sowa b'agenae! Yete Men mipou?”

### Petro Yesund Yoenonj

(Mak 14:66-72; Luk 22:56-62; Yoan 18:15-18, 25-27)

<sup>69</sup>I re Petro yina mopyam si riga ma met kara wingirind kot aband omiti yibnonj, yipa yina mopyam si riga ma wiko ngimngai tikonj ti pilwa dide ket yomnonj da, “Madaka kea Galili tunggam Yesu kima mibnenenot.” <sup>70</sup>Aji Petro b'aenonj komkesa riga wa wipind da, “Kon ma wumir en nangga yit e man yopurenayit.” <sup>71</sup>I re Petro ket kot aba ke yikonj mora gatab wa, kwa yipa b'enga wiko ngimngayit tin yir yongonj dide ket riga amninonj yepiya re de wekenonj da, “Itemb riga re Najaret tunggam Yesu kima na yibnenenonj.” <sup>72</sup>I Petro ket b'usaya danda kima tirir omna yit kima b'aenonj da, “Kon ma wumir en emb ji riga.” <sup>73</sup>I sobijog win kak ke riga yepiya re demb de owinki wekenonj, ton tuwonj Petrom pilwa dide ket tin yomno da, “Iminjog e madaka Tina yimta undoka riga wingirind yipa riga et, mop nokip moina opurenate men pitand mominy da man re yipa Galili riga et.” <sup>74</sup>Seg ket Petro odede sake yit b'atomonj da, “Ra kon b'atinyginenyin, kon God ma sake ita okasin dem,” dide danda kima tirir yit ke Yesund yoenonj da, “Kon ma wumir en emb ji riga.” Re ket seg, odenja pauro ara yikenonj. <sup>75</sup>Si Petro ket kea nony aukonj Yesu ma opureni yitkak da, “Yu siwiny yimta kena pauro ara tuweny dor, aji man naska Ken ita nowapyam notiyenyit dor.” I ton ket bau wa opondonj dide ukoi gar kopa kima yii b'irinenonj.

### Yesund Yiyo Pilatom pilwa

(Mak 15:1; Luk 23:1-2; Yoan 18:28-32)

**27** <sup>1</sup>I ispari ke sitawarjogind komkesa yina mopyam si rigap dide Ju riga waina elda rigap Yesum gatab yipand yit iglenena seg auto dide ket tirir yomno Tin ongandam. <sup>2</sup>Seg re ket ton ket Yesund yijobiko i yiyo i dide ket Roma gabmani mopyam Pilatom yim kumb wa yoramito.

### Yudas Iskariyotimna Uj gatab Yit

(Itai 1:18-19)

<sup>3</sup>I onggit winind re Yesum tib iyena riga Yudas odede mile yir yongonj rina re Yesund ongandam tirir yomno, ton ma sobijog na nony bebig

awonj da, “Kon kea naemb negir mile yomniken Ti pilind.” Seg ton ket yina mopyam si riga dide Ju riga waina elda riga wa etendainonj teti (30) silba koin. <sup>4</sup>I ton ket ten amninonj da, “Kon kea negir mile yomnikmin nokip kon negir mile kesa riga na tib iyimin wa pilwa ongandam.” Aji todaka tin yismonggawo da, “Nangga e de sowa pilwa? Ma sin kima bebig e, moda mor ma.” <sup>5</sup>Seg Yudas ket silba koin b'iskansinonj yinametind i ket opmarkitonj i dide ket dea ta yikonj, ngirpu ket tilenggyam kai b'atoukonj. <sup>6</sup>Aji yina mopyam si rigap opimemb silba koin esika eyento i ket endento da, “Itemb re ma ririrkipjog e onggityam wulkip oramkam de yinamet gasa ongapapu pipmet wa, nokip opimemb re uj mira wulkip im.” <sup>7</sup>Si ton ket yit yigleneno dide ket tirir yomno, si ton ket onggit wulkip ke pam ke gasa omnika rigamna gou kipol yokato, nokim da idenat tungg tib kesa riga wa gop eukapu pipmet tainy. <sup>8</sup>Si onggit mop paemb rigap itemb gou kipol ogena yiyenyi ngirpu yu da, “Kus ke Gou Kipol”. <sup>9</sup>Si onggit mile kenaemb bageyam Yeremiyamna odede opureni yitkak ririrkip aukito da, “I ton opimemb teti (30) silba koin emdito re yipa riga okatam ogeni mira na, rina re ninda Ju rigap mira yogeno yipa rigand mira omnam itemb riga gatab. <sup>10</sup>I ton ket opimemb wulkip engauto pam ke gasa omnika rigamna gou kipol okatam. Si odede mile aukonj re onggit ririr nat rija na re Yonggyam ken ningaenonj.”

### **Pilato Yesund Yerkitonj**

*(Mak 15:2-5; Luk 23:3-5; Yoan 18:33-38)*

<sup>11</sup>I re Yesu Roma gabmani mopyam Pilatom wipind onyitonj, itemb Roma gabmani rigat ket Yesund yerkitonj da, “Man Ju riga waina king et?” I Yesu mira yomnonj da, “Owi, kemb man mindenyit.” <sup>12</sup>I kwa yina mopyam si rigap dide Ju riga waina elda rigap Yesum gatab negir yit apurento onggit kotind, aji Yesu makwa nangga ismongga yit na yopulitonj. <sup>13</sup>Seg ket Pilato Yesund yerkitonj da, “Ma man maka utkundernyit opimemb komkesa negir yitkak rinsim re ton apurenanj Mor gatab?” <sup>14</sup>Aji Yesu makwa ngai nangga yit na tin yismonggawonj. Si onggit mopip itemb gabmani mopyam riga ma sobijog na kid kesa awonj.

### **Pilato Tirir Yomnonj Yesund Wul B'agbagind Idrikam**

*(Mak 15:6-15; Luk 23:13-25; Yoan 18:39-19:16)*

<sup>15</sup>Ita Ju riga waina Uj Igwanti Nony Iyena Diyamdiyam Winind Roma gabmani mopyam yipayipa sibibmet riga apekeninonj Ju riga wa pilwa towaina singi ririrind. Itemb re Pilatom get ke mile naemb ji yibnawonj. <sup>16</sup>I onggit winind kea yipa ongwati sibibmet riga yibnonj nyi da Baraba. <sup>17</sup>Si re Ju riga b'eamto, Pilato ten arkisinonj da, “Yena win singi yomnya kon openjin wanim, Baraba o Yesu yena re yogenai da Keriso?” <sup>18</sup>Nangga pena Pilato odede b'arkita yoramitonj

nokip ton nony ke wumir na da Ju riga waina membap Yesund iyi re nonyik b'iponena mapae, aji Ju riga wa pilind re kea singi ebnawonj Tin opendam. <sup>19</sup>I re Pilato omi yibnonj b'isagikapu kasand, ti kongga ti odede yit yitmikitawonj da, "Man goro nangga na omnikim onggit negir kesa dimdimjog rigam pilind! Mop nokip yu siwiny kon kor wimand ma sobijog na b'idgotnena yokasin Ti map." <sup>20</sup>Aji yina mopyam si riga dide Ju riga waina elda rigap Ju riga bobo danda kima il onga eyento, nokim da idenat ton Pilatond igekisi Baraband opendam aji Yesund ongandam. <sup>21</sup>Aji onggit Roma gabmani mopyam rigat ten amninonj da, "Si osiemb nimog riga wingirind yena win singi yomnya kon opendam wa pilwa?" Si ton ket yismonggawo da, "Banaba na." <sup>22</sup>Si Pilato egekisinonj da, "Si win kea naemb Banaband singi yomnya. Si daka nangga e kon omniken Yesum pilind yena re yogenai da Keriso?" Seg ket komkesa rigap yismonggawo da, "Wul b'agbagind yidrike!" <sup>23</sup>I ket Pilato ten yit esmonggainonj da, "Nangga pae? Nangga ukoi negir mile na yomnikim?" Aji ton pumb wa b'okta kana ara yoikindeno da, "Wul b'agbagind yidrike!" <sup>24</sup>I re Pilato odede towaina mile yir yongonj, ton kea b'angwatonj da tina yit re kea kip kesa ainy, aji ukoi soro kima bebig re kea pita auka yik. Seg ton ket yipa besen nyi yokatonj dide ket riga bobo wa wipind yim b'isekonj odede yit kima da, "Kon re ma ita b'injawa okasin onggit rigamna uj gatab. Itemb re wada waina bebig e." <sup>25</sup>Seg ket komkesa riga bobop yismonggawo da, "Tina uj gatab bebig b'ogla sowa pilind dide sowaina b'igawar wa pilind rain." <sup>26</sup>Seg re ket Pilato Banaband towa apendawonj, aji ton kea tina geja riga engainonj Yesund ti wipind iraskam. I re iraska seg yomno, ton ket Tin towa yim kumb wa yoramitonj wul b'agbagind idrikam.

### **Geja Rigap Yesund Ji Malik Yomniko**

*(Mak 15:16-20; Yoan 19:2-3)*

<sup>27</sup>Seg ket Roma gabmani mopyamimna geja rigap Yesund yiyo de tina wikopu met kara wingir wa, dide ket komkesa Roma geja rigap yipand tuwonj Yesum pilwa dide ket Tin yiwatinto. <sup>28</sup>I ton ket Yesund kobirgim otogika yiyeno dide ket king pila kuskus kobirgim yikito. <sup>29</sup>Seg ton ket dingding kai dira pila yogauko dide ket Ti mopind itemb dira yikito kingimna dira pila. I ket yipa buskak Tina yinjog yim wa yoramitawo kingimna kutip pila. Seg ket Ti wipind kumop b'amka wuwenonj dide ket odede yit kima Tin ji malik omnika yiyeno da, "Simesime! Ju riga wa king!" <sup>30</sup>I ton ket Yesund auya itmanda yiyeno, dide ton ket itemb buskak Tin yisato i ket onggit buskak ke Tina mopind ipowa yiyeno. <sup>31</sup>I re ton Yesund ji malik omnika seg yomno, ton kea itemb kobirgim yotokendawo dide ket Tinajog kobirgim yikoko, ngirpu Tin ket wip yiyo wul b'agbagind idrikam.

### **Yesund Wul B'agbagind Yidriko**

*(Mak 15:21-32; Luk 23:26-43; Yoan 19:17-27)*

<sup>32</sup>I re geja rigap Yesund wip yiyo, nyawind ket ton yipa Kurene tunggam riga wipwip yomno nyi da Simon. I ket ton Simonind danda

kima yingawo Yesu ma wul b'agbag iyoyim. <sup>33</sup>I ket Yesund wip yiyo yipa sukak wa tungg nyi da Golgota, engendena yitkak da “Uj Rigamna Mopkak Wimenapu Tungg”. <sup>34</sup>I re ket ton onggit sukak wa opekto, geja rigap Yesum yokawo wain rina re sap nyi kima yisleko dimir okawam. Aji re Yesu met yotonkitonj, Ton singi kesa awonj onayam. <sup>35</sup>I re geja rigap Yesund wul b'agbagind nil ke yidriko, ton ket Yesu ma kobirgim itaika eyento pes b'arena wiba ke. <sup>36</sup>Seg ket geja rigap dikinda omniko onggit wul b'agbag wusind dide ket Yesund yir engenda yiyeno. <sup>37</sup>I ton ket Yesu ma ongandam mop nyi yoramito Tina wul b'agbag pumb ke rina re wulpagagind odede erikto da,

“ITEMB YESU, JU RIGA WA KING”.

<sup>38</sup>I onggit winind kwa kea nimog negir raskol riga Yesu kima wul b'agbagind edriko, yipa Tina yimjog yim tab ke i yipa Tina sawai yim tab ke. <sup>39</sup>I opandena rigap Yesund ugaga yiyeno towaina mop b'uwongnena kima da, <sup>40</sup>“I ite namb ji man riga. Man re mindot da, ‘Ita God ma yinamet iporken dem i nowa bibir kima orangen dem.’ Si molenggyam man yirkokar b'akae! Rada Man Godimna B'iga et, si molenggyam gou wa ae wul b'agbag kumb ke.” <sup>41</sup>I kwa odede yipa wip nya ke yina mopyam si rigap todaka Ju riga waina gog ouyaena riga dide Ju riga waina elda riga kima yipand Yesund ji malik omnika yiyeno towa wingirind da, <sup>42</sup>“Ton ninda riga wa yirkokar akainonj, aji Ton ma ririr e Tilenggyam yirkokar b'atkau. Si Ton re Israel riga wa king e. I ra Ton otade gou wa tau wul b'agbag kumb ke, idenatemb men ket gar ke utkunda ke Tin okasu. <sup>43</sup>I Ton Godind nony ijawa yiyeny. Si otade God b'ogla Tin gou wa yamin wul b'agbag kumb ke ra Ton singi tainy Tinim. Nokip Ton kea yindenonj da, ‘Kon re Godimna B'iga en.’ ” <sup>44</sup>I osiemb nimog raskol riga yepiya re wul b'agbagind idriki ebnonda yipand Yesu kima, todaka kwa yipa wip nya ke Yesund kea ugaga yiyenonda.

### Yesu ma Uj Wul B'agbagind

(Mak 15:33-41; Luk 23:44-49; Yoan 19:28-30)

<sup>45</sup>I re lomtik awonj, sibibit komkesa gowukoi yikangindonj, ngirpu ama re ket tri (3) kilok awonj simana gatabind. <sup>46</sup>I re ama rika simana gatab tri (3) kilok awonj, Yesu b'okta kana ara yikenonj da, “ELI ELI LEMA SABAKTANI?”<sup>p</sup> —engendena yitkak da, “Kor B'u, Kor B'u, nangga pae Man Ken kak niaet?” <sup>47</sup>I riga yepiya re Yesum wusind owinki wekenonj, ton kea Yesumna yit utkundo, i ton ket endento da, “Onggit Rigat Eliya na ara yemok.” <sup>48</sup>I odenja ket towa wingirind yipa riga b'itkonj i ket nyi ingmatenapu matres pila gasa yokatonj i ket tokiltokil ik besen wa

<sup>p</sup> 27:46 Ton Aram yit kena yopulitonj, nokip itemb re yipa opurena yit na Ju riga wa wingirind.

yisonggonj, i dide ket soksoke buskake ke yiponj, ngirpu ket itemb matres pila gasa yuwatonj Yesumna tugim wa onayam. <sup>49</sup>Aji daka ninda rigap endento da, “Tin yirara! Ma be men yir yangu Eliyand ita rika ik dor Tin gou wa omnam.” <sup>50</sup>Aji Yesu b'usaya ukoi kana ara yikenonj, seg ket wingawingat Tin yiraronj. <sup>51</sup>I yir de, re Ton uj awonj, itemb ukoi gutomgutom kobirgim rina re yinametind ewirinti yibnenenonj yinayina pipmet dide yina pipmet ganggand, inyinyind b'inyowendonj pumb ke ngirpu ama re de gou wa. I kwa daka gowukoi kea mumamuma aenonj dide kea kila b'akangka wuwenonj. <sup>52</sup>I gopmet kea ipangka wuwenonj dide ket jogjog yina riga waina ujugim utnikto. <sup>53</sup>I opimemb riga yepiya re gimo yiund oski gopmet ke opekto, ton yimta kena yina taun Yerusalem wa b'igarkito aji Yesut naska utnyitonj. I onggit kak ke ket jogjog rigap opimemb riga yir ongong eyento. <sup>54</sup>Si itemb Roma andred (100) geja riga mopyam yet re Yesund wul b'agbagind idrikam mile wip yomnonj dide opimemb geja riga yepiya re Yesund yir engenda yiyeno, ton kea yir angto jijig dide komkesa mile rina re aukito, si ket ukoi jog mogat kea ten akasinonj. Seg ton ket endento da, “Iminjog e! Itemb Riga re Godimna B'iga e.” <sup>55</sup>I dide demb de jogjog kongga daka kea pajapaja Yesund yir ipkand wekenonj yepiya re Galili eriya ke Yesund yimta undoka dide yim okaena iyo. <sup>56</sup>I opimemb kongga wa wingirind toda kea dikind wekenonj, Magdala tunggam Mariya i Yakobo ake Yose towa mog Mariya, i dide Jebedaimna b'igawar wa mog.

**Yosep Yesu ma Ujugim Gop wa Yoramitonj**  
(*Mak 15:42-47; Luk 23:50-56; Yoan 19:38-42*)

<sup>57</sup>I re ket si imokonj, yipa jogjog gasa kima riga Yosep Arimataya tungg ke ikonj yet re todaka yipa Yesumna b'auyaena riga na yibnonj. <sup>58</sup>I itemb riga ket yikonj Pilatom pilwa dide ket tin yerkitonj Yesumna ujugim okatam. Si ket Pilato kea geja riga engainonj Yesumna ujugim ti okawam. <sup>59</sup>Seg Yosep ket ujugim yokatonj dide ket kilkesa b'ogil kobirgim ke ponpon yomnikonj. <sup>60</sup>Re ket seg ton yiyonj tina sisil gopmet wa rina re ton gimo yiund yeskonj dide ket yoramitonj gopmet wingir wa i dide ket ukoi gimo ururkena yiyonj onggit gimo yiund oski gopmet mora utwangkam. Seg ton ket itemb gopmet ke yiwatonj. <sup>61</sup>I demb de Magdala tunggam Mariya dide kwa yipa ti nyimad Mariya kea omi ebnonda yir dea ta gopmet wa.

---

<sup>9</sup> 27:60 I opimemb towaina gopmet re met pila gimo dor yiu ke eski wekenonj. Si ma yipa kima ujugim na oramka eyenento yipa gopmetind. I ujugim eungitam re ma gou ke imanggurka kena, aji jaba ujugim oramita nena dide yipa ukoi gimo ke mora nena utwangki.

### Geja Rigap Gopmet Yir Yengendo

<sup>62</sup>I Yesumna uɟim gopmet wa yoramito re Ju riga waina wiram dide yir opmitena bibirim B'angonjena Bibir nat.' Si onggit penaemb yina mopyam si riga dide Parisai riga yipand Pilatom pilwa wuwonj. <sup>63</sup>I ton ket Pilatond yomno da, "Si ukoyam! Sin ita nonyind yowamu da re itemb b'anyginena riga yilo yibnonj, Ton kea odede yindenonj da, 'Kon ita uj ke tutnyisin nowam bibirind.' <sup>64</sup>Si onggit paemb man b'ingawa yoramite gopmet yir engendam ngirpu ama ra de nowam bibir, nokim da ke Tina b'auyaena riga tou dide yurowam ke Tina uɟim yakate. Seg ton ket kwa ke riga wumir ramneninem da Ton ke uj ke utnyis. Raemb odede tawik, rina re naska b'anyginena yit ke bebig aukonj re ma ukoi na, aji it re kikitumam b'anyginena yit ke tawik ra itemb re ma sobijog bebig e pita tainy meranim." <sup>65</sup>I ket Pilato ten esmonggainonj da, "Ninda yir engenda geja riga emjina, i ket wuyit dide waina wumir ke danda ondrasya b'obogil yirgong omnikam." <sup>66</sup>Seg ket opimemb yina mopyam si riga dide Parisai riga yipand geja riga kima wuwonj gopmet wa dide ket so erka mal gopmet mora utwangki gimo kumbind yoramito, ngirpu ton ket opimemb yir engenda geja riga engauto b'obogil yirgong omnikam dide ket ton itekto.

### Yesu ma Utnyita

(*Mak 16:1-10; Luk 24:1-12; Yoan 20:1-10*)

**28** <sup>1</sup>I onggit Ju riga waina wiram dide yir opmitena bibir seg ke naskajog bibir awonj re Sande na, i onggit Sande sitawarjogind Magdala tunggam Mariya i dide ti nyimad Mariya ekonda gopmet yir ongongim. <sup>2</sup>I odedend ket ukoi jijig awonj, mop nokip Yonggyamimna aneru ikonj pumb tungg ke dide ket gimo yiund oski gopmet mora wa yikonj i dide ket itemb gopmet mora utwangki gimo yururkitonj. Seg ket ton onggit gimo kumbind omitonj. <sup>3</sup>I itemb aneru tina wip re wenmam pila na dide tina kobirgim re bilbiljog na raya pila o rim pila. <sup>4</sup>Si opimemb yir engenda geja rigap ma sobijog na moga yuwado itemb aneru, si ton kea kaktiti aukito dide ket uj riga pila na itkobiki wekenonj. <sup>5</sup>I itemb aneru osiemb kongga nimog amnonj da, "Goro win moga tawa! Mop nokip kon wumir en da win Yesu na orakam otupya yena re wul b'agbagind yidriko. <sup>6</sup>Aji Ton awir e dikind. Mop nokip Ton kea utnyis rija na re Ton yindenonj. Tetka! Dide yir yonga pipmet rikind re Tina uɟim yoramito! <sup>7</sup>Si win wanakana eka Tina b'auyaena riga wa pilwa i ket ten wumir tamninya da, "Ton kea utnyis uj

<sup>r</sup> 27:62 Ju rigap Praide yogenaeneno da B'angonjena Bibir, nokip onggit bibir seg ke ket Ju riga waina wiram dide yir opmitena bibir e tainy. Si ton ma ririr na onggit towaina wiram dide yir opmitena bibirind uɟim uwonyiti iraram.



ke. Yir de, Ton naska e yik de Galili wa, aji win yimta kaim wuyit dem dide ket amaemb de win Tin yir ongya dem.' Seg, kor insimaemb yit wen wumir omnam." <sup>8</sup>Seg osiemb kongga nimog wanakana itemb gimo yiund oski gopmet ke yiwatonda moga kima aji ukoijog sam kima na, i ton ket b'ikonda Tina b'auyaena riga wumir omnam. <sup>9</sup>I nyawind odedend ket Yesu ten wipwip amnonj dide ket amnonj da, "Simesime!" Si osiemb kongga nimog Yesum wus wa tetkonda i ket kumsos b'amkonda dide ket Tina pis esopaya kima Tin yewangayonda. <sup>10</sup>Seg ket Yesu ten amnonj da, "Goro moga tawa! Eka dide Koina gar ke utkunda yingganwar wumir tamninya da ton wui dem Galili wa i amaemb de Ken yir notngi dem."

### **Yir Engenda Geja Riga Waina Yidir Yit**

<sup>11</sup>I onggit winind re osiemb kongga nimog ekonda b'auyaena riga wa pilwa, todaka kea odedend ninda yir engenda geja riga wuwonj taun wa dide ket wumir ammento yina mopyam si riga komkesa mile gatab rina re aukito gopmetind. <sup>12</sup>Seg ket yina mopyam si rigap yipand Ju riga waina elda riga kima b'eoma yokato i ket itemb bebig gatab yit yigleneno dide ket opimemb geja riga wa wulkip okawam tirir yomno. Si ton ket opimemb yir engenda geja riga wa ukoijog wulkip akawo odede yit kima da, <sup>13</sup>"Win ija na riga wumir tamnenindam da, 'Tina b'auyaena rigapiya siwiny tui dide ket Tin yurowam ke yiyi re sin yutungand wekenyin.' <sup>14</sup>I ra Roma gabmani mopyam rigat onggityam wa gatab yidir yit tutkunj, sin ita tin nony ngimbla omnyu i ket win idenatemb ket maka bebigind taukindam." <sup>15</sup>Si ket opimemb yir engenda geja rigap opimemb wulkip emdito dide ket inaemb yit warabag yomniko rija na re yina mopyam si riga dide Ju riga waina elda rigap ten engauto opurenam. Si kea onggityam yit warabag auka yikenonj Ju riga wa wingirind ngirpu yu.

### **Yesu ma Kikitum B'ingawa Yit**

*(Mak 16:14-18; Luk 24:36-49; Yoan 20:19-23; Itai 1:6-8)*

<sup>16</sup>Seg ket ileben (11) b'auyaena riga Galili wa wuwonj dide ket opekto onggit dor wa ritade re Yesu ten menonim engainonj. <sup>17</sup>I re ton Yesund yir yongo, ton kea kumsos b'amkito Tin ewangayam, aji ninda re nonysipsip nat wekenonj. <sup>18</sup>Seg Yesu ikonj towa wus wa dide ket ten yit amneninonj da, "God kea Kor kupkakupka juwai nokawonj pumb tungg dide onggit gowukoi yir ipkam. <sup>19</sup>Si onggit paemb win wuwene komkesa b'engabenga yitam riga wa pilwa dide ket riga tamnikindam b'auyaena riga awowim, i ket opimemb riga baptiso omnika teyenindam B'uim nyi kima i B'igam nyi kima i dide Yinayina Wingawingam nyi kima. <sup>20</sup>I ket win opimemb riga ouyaena teyenindam komkesa yitkak owamam rina re Kon wen engaeinond. Si yir de, Kon ita win kima ita winind ngirpu ama ra de onggit gowukoi kikitumjog bibir wa."